

近代中國史料叢刊第十一輯
沈雲龍主編

曾忠襄公（國荃）批牘·年譜

王定安編

文海出版社印行

御製五言詩

100/105

光緒廿九年癸

卯仲春月開雕

院之文用副詳祇候批示然而案牘之繁無逾於此今辦理已久成效昭然若不刪繁就簡未免實少文多且各局員逐月持有兩院之例批爲憑萬一將來偶有不肖書吏勇役從中舞弊驟難發覺則局員轉可視總局大員之嚴批爲具文反恐有防釐政嗣後仰各釐局每月報解釐金除申詳省城總局之件照常辦理外所有冊報本爵閣督部堂衙門之文應改詳文爲驗文既有月報清冊便可毋庸旬報以省繁牘而昭核實如該各局遇有緊要事件或有他務必須乞假應行稟請派員接辦之處仍准其據情稟報聽候批示遵辦合行會札飭知爲此札仰該同總局即便轉行通飭各局卡一體遵照毋違

院之文用副詳祇候批示然而案牘之繁無逾於此今辦理已久成效昭然若不刪繁就簡未免實少文多且各局員逐月持有兩院之例批爲憑萬一將來偶有不肖書吏勇役從中舞弊驟難發覺則局員轉可視總局大員之嚴批爲具文反恐有防釐政嗣後仰各釐局每月報解釐金除申詳省城總局之件照常辦理外所有冊報本爵閣督部堂衙門之文應改詳文爲驗文既有月報清冊便可毋庸旬報以省繁牘而昭核實如該各局遇有緊要事件或有他務必須乞假應行稟請派員接辦之處仍准其據情稟報聽候批示遵辦合行會札飭知爲此札仰該同總局即便轉行通飭各局卡一體遵照毋違

札通省各屬牙釐局

同治五年四月十五日

照得楚北釐金各局當胡撫部院創辦之始原係一手經理凡
委用局員或因事告假需人接替或局中偶有興革事宜相度
緩急權衡辦理無一不由院斟酌審量批札飭遵所定章程條
理井井以故商情愛戴輿論協和釐稅豐盈軍餉充裕良爲可
法本爵部堂蒞任伊始尙值邊防孔亟需餉浩繁之時自應整
飭釐務查照胡撫部院舊章辦理現在各局委員委紳多由總
局司道選派前往想必於釐務經畫得宜查局中所用之人頗
多其中聞亦賢否不一勤惰各殊倘或稽查稍疏卽是弊端之
伏如有刁猾巡丁以多報少詭有爲無或得賄而故縱或分外

以苛求則商賈寒心望而裹足亟宜思患預防早爲剔除所望
在局員紳以廉謹持躬以精明察下嚴懲暴虐之丁役密查偷
漏之商賈實征實解涓滴歸公尤宜於裕餉之中時寓恤商之
意買舶一到既經驗貨報捐卽當給予聯票迅速放行毋得額
外需索故意留難致干究辦嗣後仰各局委員或有事請假須
員接替或偶遇興革事宜急須妥辦均須先行稟報本爵部院
俟批准後飭總理通省牙釐局司道大員查照轉飭遵辦至每
月該局征收釐稅若干除支發本局委員幫辦薪水及各項應
用經費外不得以似公非公之款另假名目冒濫開銷所有實
收銀錢數目按月解繳總局充餉仍遵照前檄具驗文報院以

備稽查倘或任意乖違本爵部院查明弊端所在定當一發從前之覆按律治以應得之咎合行通飭爲此札仰該釐局委員一體遵照妥辦毋違

札德安府

同治五年十一月三十日

據統領慎字等營記名布政使彭毓橘稟稱竊本司於月之二十三
日在橫山店營次將追剿情形稟報在案旋於次日戌刻
追至五貴市據探稱該逆於二十一日大股竄踞雲夢縣城內
本司卽派營務處葛道承霖率霖字貞字武字敬字四營輕騎
跟追本司自率慎字桂字制字吉左等營從東北繞擊以顧德
安本司繞過白沙舖十里暫紮卽令軍士購買糧米炊爨午飯
後申刻接據營務處專弁稟稱該四營已追至雲夢所屬之斗
溝埠見該逆邊馬兩邊排列我軍卽列成一字陣四營並進追
殺至近城三里許見賊大隊約二萬衆依城站立馬賊兩邊包

操我軍王仕益率敬字營堵勦左路鄧泰福率武字營堵勦右路葛道承霖自率霖字營與吳次漢率貞字營堵勦中路該逆猛衝數次見我軍整齊壁立不亂遂漸漸收近城邊我軍卽行奮擊鄧泰福手刃騎馬悍賊頭目二名奪獲先鋒大旗二樹該逆抵敵不住遂敗退城內葛承霖王仕益鄧泰福吳次漢等以追勦至七十餘里暫紮東門外平山少息適本司率慎字營營官羅朝雲桂字營葛奇益制字營羅興祥吉左營朱名聲等趕到紮住東南兩門該逆見我軍雲集恐其被圍遂於四更時開西門突奔本司卽親率各營隊伍追勦十餘里克復雲夢縣城殺斃悍賊三百餘名生擒四十餘名內有僞主將宋金元僞指

揮劉二毛業已分別釋斬並解散難民無數奪獲騾馬百餘匹
旗幟器械甚多本司以士卒飢勞卽令收隊炊爨此連日追剿
獲勝並克復雲夢縣之實在情形也查我軍陣亡二名受傷二
十餘名容後單呈今晨適能提督登武譚提督仁芳各率所部
趕來向前追剿本司卽親自入城出示安撫難民招集逃亡粗
爲布置據生擒賊供稱該逆悉竄應城意欲由安陸西趨等云
本司卽擬於今天下午率隊追剿所有連日追剿大獲勝仗克復
雲夢縣城緣由稟乞查核等情到本爵部院據此除批示外合
行札飭札到該府立卽遵照查明該縣城池被賊攔入情形及
地方文武下落刻日據實稟報以憑核辦毋稍遲延切切

自正元皇公將等之別名

三

札武昌等各府州縣

同治五年十二月初十日

照得本爵部院現在出省督師駐紮德安府城居中調度會合水陸各軍籌辦剿匪事宜除尋常日行公事賈投本衙門核辦外嗣後凡遇有關軍務緊要文件務卽飛投德安大營核辦以期迅速而免遲誤至擒匪闖入鄂疆現今官兵合力勦擊屢獲大勝賊勢已極窮蹙惟經我軍痛剿之後該逆狼奔豕突難保無零星敗匪四出竄逸或土匪游勇乘間滋事假冒擒逆裝束希圖搶掠甚至勾結入寇均不可不先事嚴防倘該州縣不能預爲防範或臨時不能鎮靜固守以致貽誤大局定將該州縣嚴行參辦決不稍寬勿謂言之不預也合行札飭札到該府州

會身之掛考之月一
一
即便轉飭所屬一體遵照毋違

札按察司及各府

同治五年十二月十四日

照得賴任大股捻逆現敗竄鍾京一帶正軍務喫緊之際一切籌防籌勦調度指揮全憑探報文檄以通機宜凡本爵部院行營及各省督撫各路將領各屬地方官吏來往公文但係限日行五六百里者軍務戎機關係重大沿途驛站刻不容遲經本爵部院迭次嚴飭告誡無如各屬相率疲玩任意壓擱動致逾延查荆門京山天門等州縣相距本爵部院行營僅二三百里近日呈報軍情之稟遲至五六日或七八日始行到營實屬不知緩急深堪痛恨本應卽予撤參因各州縣均辦理防勦之際姑再嚴札飭遵札到該府司立卽通飭各屬嗣後凡遇限行公文

一經到站務卽火速選差快馬無分兩夜飛速依限轉遞並將
到站時刻於排單內分晰填註以備查考不准壓前等後片刻
稽留自此次嚴飭之後倘該州縣再不知振作仍前疲玩壓擱
遲延定卽查明從嚴參辦決不寬貸懍之切切

札彭藩司等各營同治五年十二月二十二日

頃據姜提督玉順稟稱捻逆以步騎各賊或數十人或數百人
不等盡打官兵旗幟身穿白色號衣冒充官兵伺何處防務較
鬆卽行賺入等情前來合亟飛飭爲此札照飭該某立即遵照一
體嚴防毋違再本爵部院會銜未及會印合併行知

札棗陽縣

同治五年十二月二十七日

頃據探報數日前青龍潭煙墩等處逃難民人稱賊有竄至隨境太子廟袁家灣等語不知確否而該縣久無探報稟呈不解何故查審度戎機緩急全以探報爲憑該縣於賊至隣近地方自應探明賊蹤隨時具稟前來民瘼所繫諒必格外關心合行札飭札到該縣立即遵照將附近地方及近日賊情有無蹤跡探明確實隨時專差星夜飛報德安行轅及鮑爵軍門行營以憑相機調度保衛地方而殄寇氛所費無幾而於大局實有裨益自接到此次札文之後仰卽多派健役確探源源馳報飛速火速特札

卷之二 詩經

九

札德安支應局

同治六年四月二十三日

據署蘄水縣事補用同知王丞震稟稱竊照卑縣本年二月爲大股捻逆四鄉竄擾經大兵往還追剿屢有斬擒彭藩司統領一萬數千兵勇十三日到此本紮卑縣城外十六日拔營至六神港距卑縣三十里之遙十八日聞賊已由廣濟回竄適逢大霧迷漫當出六成隊彭藩司親督迎剿先在港東與賊交仗將非不精戰非不勝殺賊三百餘賊已退却因過港河窮追十五六里由溪潭坳而至金彭山猝遇數千馬賊四圍衝突彭藩司見將勇傷亡勢不能支坐地大罵竟至投命於金彭山身首不全一片精忠萬民傷感卑職因相距數十里聞信時逆燄正熾

至二十二日民心稍定當即馳往各營已開差赴郡自六神港至溪潭坳一帶山前各屍骸均有淺土掩埋有插標與未插標者有已抬至江邊上船者山後僻路凡頽垣破屋中及暴露在

外者積屍十五里並有道旁遺棄殘毀不全者卑職察看殘毀遺棄之屍多係尺許長髮維時居民盡在寨上路無行人諒係兵勇忿憾而毀卑職當就本地將殘毀長髮屍首另歸一坑築土記明以便他日焚化其餘皆各就各地各照堆積之處卑職捐備板片蘆蓆或十具八具分別掩埋凡有湘營插標者記明祇加土加箬不准挖動內有本地長夫是日送軍火挑飯遇害者示召有屍親認領即優恤領回卑職住蘭溪旬日共計十五

里內安埋五百四十一塚內有十具八具二三具不等核計二千八百十二具出示曉諭三箇月後如無人認領者擬擇山攢葬一處名曰忠義塚現在一月之間已來搬遷者將及一半至彭藩司戰歿之處土人相傳前代金姓讓於彭姓之山故謂之金彭山合當彭藩司終身之地其山亦因忠臣而流傳矣惜山不甚高大且防江水泛溢卑職擬與士紳商議或就山上泐碑擇地另建忠義祠統俟

恩旨諡卹到日卽行舉辦以便載之志乘記之祭祠惟同時殉難三千數百人可知其姓名者惟文武官弁而已凡勇丁姓名卑縣無可稽考該勇丁雖無官職節烈可風此時不查明姓字

他日更湮沒難稽且卑職詣驗多有不瞑目者見之不覺傷心
淚下因思各營必有勇冊伏乞札飭湘營管理支應餉冊委員
查明殉難勇丁各姓名一爲抄示以便歸入卑縣專祠春秋得
以與祭等情到本爵部院據此除批查彭營戰歿將弁兵勇各
忠骸均經該縣照料分別掩埋浮屠辦理甚屬妥善至與士紳
籌商各情均屬允協應卽如稟辦理所有同時殉難弁勇各姓
名候飭支應局詳細查明另行開單知照該縣可也仍候督部
堂批示繳等因印發外合行札飭札到該支應局卽便遵照詳
細查明陣亡各勇丁姓名籍貫開摺費呈以憑飭知該縣查照
辦理毋違

統領桂字吉左營提督朱南桂稟批

同治五年四月

貴軍門舊恙尙未痊可力疾募勇成軍卽許親自統帶來鄂具見公忠體國之忱實深敬佩朱軍門惟堂因病不能前來由貴軍門一手經理料量必極妥善甚可放心惟念貴軍門體氣過勞如尙須略爲將養則就近咨請朱總兵寬義代爲效勞先行統帶桂字吉左二營來鄂早爲訓練亦甚有裨於營務一俟邊防將有戰守之事再行飛咨貴軍門力疾前來調度一切亦無不可總望貴軍門酌量近日體氣何如必先能保身而後可以衛民沿途加意珍攝調理飭朱總兵寬義等整飭營規約束勇丁是爲至要

批管帶武字營記名提督鄧泰福稟

同治五年六月

該武字貞字二營係派歸彭藩司統領節制理宜諸事稟報統領事權乃歸畫一卽起大口糧日期及清冊報銷章程亦應稟請統領訓示施行方有條理查兩營從湖南來均未帶錨桿竹可見於軍事未嘗隨處留心今到黃花澇數日想各隊須用之物均已齊全諒可拔營依恃統領左右諸事稟命而行庶幾營規益肅如初二日能啟行更好如尙未齊全仰該營官約會武字貞字兩營均於初五六啟行開赴德安城外聽候彭藩司號令駐紮勤於操練以資得力是爲至要勉力以圖有功於該兩營有厚望焉來稟稱二十三日到黃花澇准於二十四日起支

大口糧可也其應整頓營規各要語已批示貞字吳營官稟內
矣仰均會閱查照辦理毋違切切此繳

統領桂字吉左營總兵朱寬義稟批 同治五年七月

查各營開設護旗先鋒係統領一軍方准設立原係爲稽查各軍各營禁止騷擾起見該鎮統帶桂字吉左僅兩營業已檄令歸彭藩司統領節制若添設大旗護旗與新定營制章程不符礙難准行仰卽知照如果屬員太多不能不念舊日勞績設法收錄則由該鎮安置親兵隊中自行酌量津貼薪糧可也

統領慎字等營記名布政司彭毓橘稟批

同治五年九月

朱總兵寬義堅意欲請假回籍自不能不俯如所請仰該統領
卽在慎字營哨官中擇一善戰善守而又性氣和平無好利好
貨之病有愛勇愛民之實者接管桂字營以資得力仍賴該統
領親爲照料是爲至要

統領慎嚴等營記名布政司彭毓楸稟批

同治六年二月十七日

該司統率慎嚴及選鋒馬隊等營十三日已抵蘄水日來想已出境追剿矣張家榜本係英霍來鄂之要路應責成姜提督率開化營全軍在彼處嚴扼以固鄂東之門戶至於該司率熊提督伍提督馬步全軍與仁勝忠義兩軍總以伺賊所向跟踪追剿爲正辦或卽仿照淮軍規模以行營爲家奔馳數省亦是一法查慎嚴仁勝忠義馬步將近二萬人實可以制賊至於臨敵之際或分或合行隊或先或後均仰該各統領相機辦理總以克保萬全制賊死命爲要本爵部院不爲之遙制也該司胸有智略最能和衷共濟想必能與譚提督劉鎮隨時商酌進

止分合機宜入皖境後中路多高山峻嶺濱江多湖河港汊我軍誠能鼓勵士卒之氣無不以一當十以十當百定可望痛剿一場以副

朝野之望本爵部院十七日移駐黃州城內並調支應局易道轉運餉銀子藥前來卽當設法解入皖境該軍如有所需可先函稟卽可照函辦理耳再者申刻到黃州接十六日卯刻函稟知賊已回竄譚劉之營已在賊東惟慎嚴選鋒馬步各營在賊之西仰卽設法堵剿使賊不得上竄是爲至要如能會商仁勝忠義開化等軍偏賊於水斷山連之域從而圍裹之或有機會可圖亦意中事總以謀出萬全制賊保民爲上著仰該司督率

熊提督伍提督激勵士卒穩猛兼施共奏膚公是爲至要

諭德安府 同治五年十一月二十八日

照得捻逆敗竄鄂疆麻黃孝感等縣城守事宜俱係地方官紳自行籌辦並未請領公款前據該府以郡城防守經費請在釐金項下動撥當經批飭查看情形再行核示在案茲本爵部院到郡巡視城防兵勇並不整齊器械亦未全備實屬有名無實查兵丁本有守城之責紳民亦俱有身家賊氛密邇防守均屬分內之事該府何以率行具稟請撥公款當此大兵進剿之際正經費萬分支絀之時戰陣兵勇尙荷戈待食城防用項何能代籌諭到該府立即遵照督率同城官紳將城防事宜仿照鄰屬章程另行妥議辦理富者出資貧者出力同心禦侮共衛身

家一面嚴諭守城兵勇團民各分段落輪流巡防實力守禦仍責令縣汛同在防文武認真稽查如有怠玩偷安輪防不到者隨時究懲明定規條以示賞罰而均勞逸至守城兵丁有應領之餉毋庸另給口糧以節經費仍督飭該縣傳諭紳民鋪戶並移會城防汛弁人等一體懍遵切切

諭戈什哈及各役人等

同治五年十月二十二日

照得本爵部院督兵出省籌辦防勦事宜該戈什哈等隨營當差飯食夫糧均經照章給發前此道經德安隨棗卽聞該戈什哈等沿途有需索情弊茲住紮廣水復訪聞有向應山縣需索之事因均無實據未卽嚴究爲此示仰該戈什哈及各役人等一體懍遵以後務宜各安本分勤慎當差倘敢稍有需索一經查出定以軍法從事決不姑寬懍之慎之毋違

委員設局補發陣亡兵勇口糧卹銀示

同治六年七月初五日

照得慎字霖字敬字肅字訓字制字武字威字誠字信字保字貞字各營前在湖北蘄水蘭溪失利陣亡弁勇多係長寶衡湘郴桂人氏各營冊籍註載明晰該弁勇所有應領之口糧卹銀爲數甚鉅茲據湖北軍需總局籌畫銀三萬餘兩並兌撥湖南督銷局劃扣丁卯年鄂釐一項七萬餘兩除札委易道良豹龍守清垣徐守鎮楚王令冠珪先後回湘定於十月初十後在長沙城外設局督同該各營官幫辦護哨認明親屬按名發給外並議定十月底收局誠恐該陣亡弁勇親屬未能週知合先出示曉諭爲此示仰該陣亡弁勇各家屬人等知悉凡在慎字霖

字敬字肅字訓字制字武字威字誠字信字保字貞字各營當
勇陣亡而未領口糧卹銀者均於十月初十後到長沙城外赴
局認明該營幫辦護哨呈報某哨某隊具結請領聽候委員立
卽確驗按名發給該親屬等各宜沿途安靜毋得滋事如有假
冒混領一經查出定卽嚴究不貸懍遵

曾忠襄公撫晉批牘卷二

蕭德明稟懇恩宥梁守宗一案由

該參將奉批後查明詳細情形始知所部官弁不合之處難以按律深求自行呈請寬釋并稱梁守宗從軍多年稟懇准其回籍應俯如所請查什長王遐明業經該哨先行革退出營應飭中軍官與練軍營官陳丞以後不准收入營伍餘俱省釋回哨操練除分別飭遵外仰卽知照

藩司詳大同等府州屬實存節省兵米建曠瞻站軍谷石
開摺請示由

查核摺開大同等府州屬歷年實存節省兵米及建曠瞻站軍
等項穀豆至十八萬三千餘石之多陳陳相因紅朽堪虞現在
省城附近及南路各州縣被旱較廣秋成無望哀鴻遍野傷心
慘目亟須設法賑撫以救災民現雖奏蒙

天恩准留京餉並借直省海防經費銀兩奈荒災甚重恐不敷
用設局勸捐亦恐緩不濟急且至麥收爲日甚長轉瞬卽屆冬
令饑寒交迫災黎何以存活本擬將摺開大同等府州屬實存
米豆穀石撥用來省減價平糶以抑市價而便窮民惟內多距

省較遠之處運價頗鉅無款可籌茲擬酌提一半由各該廳州縣就近按照部價儘數出糶將價銀子限兩箇月照數解司存庫以湊賑撫急需仍挨捐輸收有成數將糧價照數劃還存俟豐收之年儘數採買糧石作爲省城儲備之糧不准別事借動以備不虞倘各該廳州縣畏葸推延逾限不解定以玩視民瘼立予撤參尙餘一半米豆穀石俟明春酌量緩急情形再行飭令照數出糶所得糧價仍應解司如前辦理仰卽分飭遵照迅速妥辦依限將糧價解司不得觀望稽延違逾定限致干撤參切切

薄州府稟陝西韓城縣游匪勾結饑民滋事請飭沿海州
縣實力巡防由

十一月接統帶練軍衛鎮天成稟報情形大略相同秦晉僅一
河之隔偷渡宜防除飭沿河州縣會同營汛一體嚴密稽查外
仰卽轉飭所屬認真嚴查渡口毋令鄰封韓城滋事之流闖入
晉疆是爲至要至於境內被災饑民自應留心撫恤不可稍涉
漠視山西民風本極純厚誠恐外來游勇潛踪託足勾結滋事
一經烏合成羣則境內受害不淺全仗地方官預爲防範清查
鄉村不准遠方歹人逗留滋事各州縣皆有地方之責該府亦
當率屬振刷精神妥爲辦理遇有實在災民則分別戶口之極

貧次貧設法以賑濟之遇有滋事不安本分之徒則盡法以懲
治之庶幾良懦有所依倚不至竊發防患未然是在賢守令慎
固封圉勿得視爲尋常具文致貽後悔切切

榮河縣稟陝西韓城縣屬土匪滋事

本日據蒲州府稟情形大略相同業經詳
矣韓城尙有大河之隔原無足慮晉省旱甚
需辦理者以查災放賑先安民心爲要務
未修此際臨渴掘井經費不敷民力維艱
大工則不可至於添募民壯該縣自爲護
強各鄉按村練團則不可蓋以災荒太甚
擾民以失民心不如鎮靜無譁而固取志
歹人不准逗留滋事稽查渡口不准游匪
本境之饑民利其涓滴之賑足以活命而

宵小憚吾嚴密之防無從勾結而不敢生窺伺此防患未然辦法庶不至臨事張皇也該縣是否親率公正紳耆詣鄉按村查明實在被災饑民戶口分別極貧次貧若干戶大口小口若干名傳諭靜候示期賑濟未據詳細聲敘仰卽妥爲辦理稟司核奪飭遵該令毋得疎懈干咎

統帶南路練軍總兵衛天成稟請調隊回防並提餉接濟

由

該鎮布置以紮營爲根基以稽查禦外侮以儲糧備兵食以謹
埃待不虞所辦悉合機宜至於地方游手好閒素不安分之徒
藉偏災爲由造作謠言蠱惑鄉愚思欲蹂躪富室以快平時借
貸不遂之報此等刁風斷不可有地方官理宜嚴密查拏盡法
懲治方足儆一戒百預遏亂萌卽該鎮與太原鎮軍就近亦宜
如此辦理陝西韓城土匪聚眾滋事乘機爲亂陝境旣已萌動
足爲殷鑒且其地在在與晉省毗連僅止一河之隔尤宜百密
之防仰卽派弁嚴查渡口倘係面生歹人不許偷渡軍中糧草

最關緊要自宜早爲預備現在採辦糧米爲艱卽應分途購買
項已面諭藩司寬爲籌畫該軍餉項兩個月儘可派員請領以
備彙總買糧之用仍當偵探確情嚴防轄境如係晉省境內之
事該鎮與太原鎮卽當相機辦理毋得稍涉疎懈早晚隨時函
報以備查考要切要切來稟辦糧委員薪水獨力難支擬均攤
於糧價之內行軍原有此種辦法但所委之員宜擇潔己奉公
之品不可稍有淨冒庶幾體恤兵丁更爲周備除行籌防局存
案外仰卽知照

軍裝局委員裕厚稟整頓軍裝以肅軍容由

晉省軍裝局製造前據摺開存項無多又據各營領出者多稱不甚合用所以有遴員添造之舉該令稟請揀派曉暢軍旅府州大員入局添造以備不虞足見留心時事旬日前已飭籌防局司道遴選詳委在案候到局日逐件查清分別等第擇其可用者妥爲修整其不合用者廢置改造必求其精良合用而後已晉省經費支絀全在辦理得人化無用之器爲有用之材方不至於糜費時值久旱人心思動兵者可期百年而不用然不可一日不備仰卽在局照常供職虛心明理實心任事勿存自是之見以收日新之效

軍裝總局委員知縣裕厚稟爲敬陳管見由

所稱家丁弊端更僕難數魑魅情形繪如圖畫凡爲官者均當錄之座右引爲鑒戒然要皆爲憎憤糊塗之官寫照至於真正爲好官者左右無此伺候之人卽有這種伎倆亦決不獻於好官之前所謂方以類聚物以羣分也試嘗考諸典籍有曰物有欲則可制又曰人無慾故能剛大凡官之爲家丁所制者有欲居其強半官之能施剛於家丁者無慾是其全體若利則佔其全知有已而不知有人則上下左右前後無一可許之人而抵隙以相投乘間以相欺者難保其不紛至沓來又況家丁本無恆產以奔走營生原少一定之性情心術往往視其主之好惡

愛憎爲轉移主盡忠則僕有義主尙仁則僕亦滋氣誼之相感然也主貪利則僕行私主好殘則僕亦刻忍近墨者未有不黑者也凡有能爲好官者必先清署內以端其本署內之人家丁其一耳凡能清署內者必先自治其身立於不敗之地身者萬彙之所瞻仰雖有掩著之工不能瞞近侍之人周官六事以廉爲本廉爲體六者其用也

朝廷立法有懲貪戒墨之條而獨嚴於監守自盜之輩防官員則法獨重自官以下則各以其罪罪之未聞於管攝家丁專立一條家丁者丁也固各有其主耳用家丁者主人也信從家丁者主人之心也又各有好尙耳不責其主之爲官乃欲責散而

無稽之家丁恟悅果何所憑來稟請明定章程嚴垂告示事不
徵諸經典法不載諸律例碍難允行

平遙縣稟該縣被災請飭包頭等處流通米價以便採買

接濟由

據稟及另單均悉除咨綏遠城將軍並飭知歸綏道外仰布政司速飭潞安沁州等處毋得閉糴遏糶并飭所屬遇有運糧過境如有匪徒聚眾阻截立即查明嚴拏懲辦並即出示嚴禁以通糧運是爲至要並行該縣知照

歸化城稟西路游氛不靖擬將勸賑捐輸緩辦由

纏金一帶游匪滋事業飭樹字三營及駐河保之三營均隨張軍門前往刻日進剿並咨會大同鎮馬軍門選調鎮標馬兵千名來包頭駐紮以爲後勁我軍兵力既厚想匪烏合之眾當不難撲滅也地方官理宜靜鎮以固人心阿道來稟頗涉張皇已訓飭之矣包頭捐輸稍緩勸辦自無不可然民心大定之後又不得不設法辦理至歸化商民所議公捐如有成局仰仍會同妥爲勸繳及早輸將期濟賑務急需已經買定之米或由水路或田陸路應卽趕緊起運不可聽商民藉詞延緩是爲至要

鳳臺縣賴令稟請借給貧民麥種並移取高平縣倉谷由該縣地方荒旱過甚種麥必多災民既乏所食力難預備麥種自應准如所請照例借給籽種仰布政司速飭該縣妥爲辦理至所請撥散高平縣倉谷前經批司准借撥在案除逕札澤州府轉飭高平縣酌量借給外並卽轉飭知照至所收養幼孩辦理甚善惟方乳之兒與其另雇乳母哺養曷若就便招養其母以全其子更爲周備

河津縣趙令稟勸諭地方紳富捐資辦賑由

查辦理災賑民命攸關全在地方認真剴切勸諭紳富具有天良官有善政未有不輸將踴躍者官有虐政民未有不怨咨者該令一味虛應故事上則飾稟塘塞臨下則玩視民瘼試思身膺牧民之責時當大禘之年豈可徒託空言一稟了事耶該縣捐項業經捐輸總局委員隨同絳州陳牧勸辦應俟陳牧等至日商同妥爲辦理仰絳州轉飭該令遵照

聞喜縣謝令稟紳富任作楨等捐輸銀兩現在購糧備賑
由

據稟該縣現已捐銀九千六百兩業經購買糧粟何以不呈報
確實數目又稱業能購買雜糧三千餘石又稱核計人數不敷
兩月口糧稟內詞氣似乎戶口已經查明實有若干而其如何
散給之法自何日起可至何日止如何通盤計算未據聲叙從
前捐輸局刊發冊式該令並不遵照填註具報尤不可解勸捐
原爲辦賑而設如果遵照捐輸局札飭有條不紊卽以該縣所
捐之款撥爲該局縣辦賑之用原無不可若意存朦混商富必
不樂於効捐該令將何以善其後也仰仍一面將應賑大小戶

口分別極貧次貧應賑日期之久暫統需賑款若干據實迅速
明白稟覆一面會同委員剴切勸諭俾殷富之家咸知官爲救
饑起見庶幾激發好義之心可望輸將踴躍乃不貽誤賑需致
干未便

黎城縣徐令稟擬窮民諭令各養各村並清查戶口由
查該縣禁止販糧出境雖因糧價日增以平市價起見但被災
之邑同屬晉土禁糧出境隣封災黎大受其害祇知保全本境
愚民不顧通商大局若各屬紛紛效尤實於荒政大有關碍仰
卽仍行弛禁任其出入販運疏通糧道是爲至要餘如所稟辦
理

臨晉縣方令稟該縣分派練勇及查賑放倉穀各紳董銜
名由

據稟該縣濱臨黃河現當河西防務緊要且恐本地飢民藉災
生事請會同紳士籌款練勇巡查彈壓如果實心爲民其事原
屬可行若稍涉私心則衛民實以擾民仰該令務宜遴選公正
紳董認真辦理並會同汎弁選派兵役在於河口及各鄉村加
意巡查一則不可令匪徒溷跡滋事一則不可徒爲開銷地步
致竭良民之脂膏以飽私人之囊橐致干未便至所請告假回
籍之都司崔樹華准暫留爲幫辦

標太三營會稟已故羅鎮虧款無力繳還並靈柩眷屬在
晉久羈壑請恩施由

查羅故鎮帶勇多年在甘在晉屢著戰功從前管帶精銳營勇
尙有應領欠餉爲數將近鉅萬嗣經何前部院批准止發銀二
十兩陳奏有案在前部院爲節省餉項起見不得不慘淡經營
而在羅故鎮因此受累情殊可憫此次虧欠練餉爲數無多如
該鎮家屬有衣食自應進繳茲據該將等稟稱查明羅鎮身後
衣衾棺槨不全靈久羈晉寡妻幼子流寓無依又據大同鎮馬
軍門查明羅鎮原籍貧無立錐之地族少五服之人卽欲追繳
所虧之項無從索取分釐惟此款業由藩庫墊發未便虛懸本

爵部院查晉省扣留文職三成養廉一項係爲晉省事故人員
彌補無着交代之款羅故鎮雖係武員與文員事同一律所有
司庫借發羅故鎮虧項銀一千六百二十兩應准在於所扣文
職三成養廉項彌補以後不得向羅家眷屬咨追其靈柩不能
回藉寡妻幼子不能存活應准在於節省湘平項下酌提銀五
百八十兩發交大同鎮馬軍門派員領收妥爲料理俾該家屬
扶櫬回籍安葬以資存活而示體恤除行布政司並籌防局卽
日遵照辦理暨咨大同鎮馬軍門外卽卽知照

歸綏道稟探報匪徒搶掠現在歸化布置情形由

後山游匪勾結漸多十九日接到來稟當由五百里飛行張軍門准其將分駐河保之三營調至包頭以厚兵力現在情形如此防勤自不可緩張軍門到日諒必偵探確實相機痛勦方不負晉省養勇衛民之至意該營將官零星出隊初三十一兩次派出勇丁是否業已得手未據樹營稟報尙不得知文丞及歸化廳召募勇丁臨時招集以之壯胆則可以之勦賊則不足恃第與其聽壯丁迫而從匪固不若預爲招之尤可以助守也惟須加意挑選預防奸宄混入伍內是所切要至土默特兵有馬者多但無久經戰事之人爲之領袖亦難望其得力不過藉壯

聲威而已每名月需銀一兩五錢奎都護遣參領至道面商思欲就地籌畫該道能否籌給應由該道自行相機斟酌辦理當此亢旱之年司庫不能撥分釐此該道之所知也地方一遇警報人人皆謂知兵人人皆願爲將絕不思餉項之難籌又不計及民力之已竭無事則優游燕飫於高衙有警則集眾以自衛未知所以善其後也除咨請大同鎮馬軍門選調鎮標馬兵千名卽日來包察看情形妥爲辦理外仰該道靜鎮無譁

歸綏道稟山後匪賊搶掠情形由

昨據來稟當經函復並照會張軍門督率所部相機勦辦如或兵力不敷准其調河保三營向前敵通力合勦茲據所稱賊情不過千餘人要皆猝然烏合以理論之樹字三營應足捕勦以遏兇燄張軍門身爲統領有勦賊保民之責斷不至坐失機宜該道儘可候張軍門到營相機酌辦不必過於張皇轉至搖惑眾心所請籌撥兵勇一層應候寇情畢露再行籌畫且明係游勇勾結土匪其中必無良民可想而知出示招撫至再至三豈能向化歸善惟有兜勦圍而擒之盡殺無赦使頑莠知所畏乃不至於相率效尤況賊旣以擄掠害民爲業官軍之威聲未樹

自是事之有司才月二

賊黨之羽翼未除縱以美意招之亦未必帖然就撫也明理可
以治懼此次之稟恐懼戒謹有餘而明理尙嫌不足所管之歸
化營兵爲數無多儘可無庸派往仰卽知照

統領南路練軍衛鎮稟可否賞給兵丁綿衣以示體恤由來稟爲兵丁請領綿衣足見體恤所部無微不至該統領第知練軍之苦而不知未練軍之兵丁更苦也緣營之兵僅有坐餉比練軍之口分更輕而循例之扣成不少且今年春季之餉尙未領齊身有無衣之歎常懷枵腹之憂大同迤西至於口外冷且十倍腹地非惟無綿衣之可領卽坐餉亦欠至七八個月不等其苦楚爲何如耶查晉省出入之款無絲毫外銷之項兵勇請給綿衣未登則例之條其不能按實奏銷明矣况今年亢旱異常報災者已六七十州縣司庫徵收難望十之二三京餉協餉羽檄紛馳無以應之坐支例支停發短解不可勝數該統帶

深明大義在晉多年耳所常聞目所親覩諒必洞悉情形明知司庫艱難萬狀不過以此稟外塞練軍之口內結將士之心而已然德歸於營闈怨歸於省城亦不相宜自當剴切示知所部不必作此奢望慎勿視兵丁如驕子馴至於毫不可用則該統帶之報効

國恩者大矣若無事之時而安坐而食

天家之餉有警之日毫不能抵當寇氛於心何忍以此災荒之年凡屬在晉之防兵防勇練軍守兵如有稟請綿衣銀兩者概不准發查舊章有給發者半係徇撫軍之私好非公義也以後如有希圖發銀者應卽責成統領統帶各官自行製備不准向

司支銷大凡治軍治民治吏皆自當上懷

國法下秉至公若一味違背則徇意存見好非本爵部院之所
敢爲也除行司局官吏凜遵外仰卽知照

卷之二

孔子世家

三

歸化城玉丞稟報偵探馬賊搶掠情形由

游匪肆行搶掠擾害商旅前據河道稟報皆照會樹字營張軍門添調駐防河保之三營同至前敵助勦以厚兵力日內想已偵探匪踪相機勦辦矣所慮山後地方遼闊被勦逃竄東擊西逃又恐烏合之徒一聞大軍之至分投四散官兵去而賊復來昨又咨會大同鎮馬軍門挑選鎮標馬兵千名親率來包以爲樹軍後勁來稟稱辦團練保衛地方未嘗不是一法惟得其人則擾累較少不得其人則糜費滋多以不教之民驅而禦賊不亦難乎况值飢饉之歲民不聊生籌備經費尤不容易歸城五方雜處良莠不齊臨時招募更恐奸宄混入反致受害不淺務

須格外慎重乃無他虞雖古有徵兵滿萬不如召募三千之文
此爲知兵者而言非爲草率開銷地步也仰卽靜鎮以待官軍
之進勦不可張皇以致人心之失措仍隨時確探具報查考

歸化廳王丞稟報樹軍追勦斃賊三四十名在土默特公

營營盤一帶駐紮由

據稟均悉一係二十二日據舖民李威稟稱十九日樹軍跟踪追勦斃賊三四十名在土默特公營盤一帶駐紮該匪賊竄往達爾漢貝勒旗屬地方盤踞一係二十四日據探勇席慶等面稟茂明安旗屬民團詐稱樹字營勇斃賊數名賊往土默特公營盤一帶逃竄民團在厥漢嶋鶴村屯集各等語兩稟情節懸殊均難憑信如果張士義眼見民團三百餘人詐稱樹軍卽能擊賊獲勝可見賊不强悍人數亦不甚多營勇不敢出隊恇怯固屬可恥然樹字營節節設卡兵以分而益單慎重或出有因

假令弁勇十分得力於該匪初起之時立即出隊捕滅何至如此蔓延夫以數百名之游勇馬賊橫行後山地方官不能覺察於機先徒事張皇於臨時已覺可笑營哨官率勇丁半年駐守其地商民被賊殺戮牛俱被賊焚搶行旅被賊滋擾驛路被賊梗塞

國家何貴有此地方官與營哨勇丁也現已檄調馬步兵勇前來仰即靜鎮以待官軍會合進剿仍確探實情具報備查

平陽府稷鄉甯縣屬有飢民結黨借貸由

商撥練軍前赴太平古城擇要駐紮藉資鎮攝所辦尙屬允協惟被災之飢民本以乏食而待哺情形亦殊可憫現經籌畫款項以資賑濟各屬均宜及早設廠放賑其安分良民必能靜候俟賑惟無賴之徒或有乘饑饉而藉端生事者其意欲播弄愚民以訛索富紳思圖一朝之飽然此風斷不可長前已出示禁止地方官一經訪查得實自應不動聲色立即設法緝拏盡法懲辦以儆勾玩而遏亂萌仰該守轉飭該縣認真訪查毋稍游移寬縱慎勿養癰貽害是爲至要凡辦地方事件總以化大事爲小事化小事爲無事方見真實本領全在地方大小官吏體

會通彙考卷之四十一

察情形妥爲撫馭耳

三

吉州稟酌撥防軍移駐該州防河抑或准其借賑練勇防

守由

沿河千里均與陝省一葦可杭水橋凝結處處可通不僅該州爲然韓邵土匪勾結饑民滋事早經陝省派兵肅清蒲城刀匪戕官係因挾隙報復亦已勦散安靜無事晉省司庫頻年拮据萬分本年被災極重下忙錢糧征收無幾該州諒有所聞又從何籌款在在設防至於勸辦捐輸係屬萬不得已專爲賑濟而設無論何項急需絲毫不應騰挪該州欲借賑爲名倡練勇防河之說自爲計則得矣其如通省億萬饑黎何所請不能准行並戒以後少涉妄想仰卽知照

孝義縣稟四鄉被災分數由

據稟已照刊發冊式填註具報所需賑款候飭捐輸局核明酌發至於成災分數例應蠲緩錢糧仰俟委員到日會同覆勘明確照例妥議詳請核辦一面會同勸捐委員督率公正紳耆邀集富紳剴切勸諭激發好義急公之心俾皆踴躍輸將多多益善以期賑撫有資災黎乃不至於失所一俟捐有成數准留該縣辦理賑濟或盈或絀據實稟報盈則協濟隣縣絀則由省補給該縣斷不至視該縣之災於不顧此大公至正辦法非有奪此予彼之意良以通盤籌畫必需有大致數目而後可以酌劑盈虛也仰一併知照

隰州稟誤決圖財害命人犯自行檢舉由

本爵部院前因被旱成災恐有不逞之徒煽惑饑民劫掠富戶謀爲不軌是以通飭所屬如有前項匪徒乘饑倡首爲亂卽行就地正法以遏亂萌而靖地方今竊賊殺死巡夫一案無論事後挾嫌謀殺或臨時圖財害命總係尋常命案自應遵照定例填格錄供通報覆審按擬解勘方爲正辦該州前請就地正法已屬草率卽或實應就地正法之犯亦應候示遵辦乃既經具稟請示於前竟敢不候批示遽行正法辦理殊屬冒昧非尋常疎忽可比本應立予撤參以重人命惟業據自行檢舉稟請照例議處且該州並屬被災較重正當清查戶口辦理賑撫緊要

之時未便遽易生手姑從寬記大過三次以示薄懲該牧仕晉
有年情形熟悉才識尙能辦事所有該州並屬賑濟事宜勿稍
存取巧之見務期餉不虛糜民沾實惠若不實心籌辦稍涉含
糊及嗣後遇有似此案件不候批示擅專自便定行嚴參決不
再寬凜之凜之除行臬司移明藩司外仰卽遵照

榆次縣稟拏獲搶劫毆傷事主首夥盜犯請批示遵行由查獲盜趙汶保李二財仔二名白晝持械夥眾攔搶得贓傷主兇暴眾著現當荒旱成災恐匪徒煽惑人心肆意搶劫滋生事端既經該縣訊明確情應卽就地正法以資震攝而遏亂萌未便拘泥成例致稽顯戮至殷四仔一犯轉糾黨羽拒毆事主多傷更屬兇惡未便因被其兇捆送量予末減應一併正法以杜後患除行籌防局並臬司知照外仰趙汶保李二財仔殷四仔卽行就地正法並嚴緝逸盜董來柱務獲究報

河東道稟虞鄉縣匪徒滋事並委同知暫攝虞鄉印務由時值大禮宜存戒慎恐懼之心地方各官應如何撫綏防範以儆奸暴而安良善解州距該道咫尺間耳虞鄉乃蒲州府屬該道所轄相距均不甚遠鹽梟結連片刀會匪與土惡肆行搶掠事非細故八月二十以後卽有其故可見已非一日人數聚至二百餘名之多放礮持械紮縛事主明火搶劫並非詭密之謀牧令旣不知彌患於前又不能查拏於後且不據實稟報該管道府亦不以一字報院任匪徒恣肆猖狂閭閻日受驚恐迫張儒學奉臬使轉諭之後始據查得匪徒名曰滋事村莊係在解州地面何以興事之始絕不稟報在已經撤任尙未交卸之解

州沈牧及帶病代理虞鄉之李縣丞固不足責而在該管道府
胆敢置民瘼於不顧殊出意料之外現在解州改委馬牧丕瑤
兼署虞鄉已催黃令縉榮迅速赴任並札飭衛鎮酌帶練軍會
同馬牧體察情形妥籌辦理以後該道所屬如有捕務廢弛釀
成事故及辦賑不力罔恤民難與私征錢糧藉圖肥己仰卽隨
時查察據實密稟如必欲替人受過扶同徇隱通飭在前本爵
部院亦惟有據實陳

奏之一法耳

陵川縣稟佈置紮營地方設局運糧盤獲奸細三名訊供
請示由

豫省修武饑民擾及鳳台業經賴令會督兵勇彈壓出境周遊
擊岳亭所部練軍馬隊此時計已改赴該縣並經澤州營瑞參
將撥兵前來該匪諒必聞風而遁決不敢與官軍相抗此股匪
徒皆由饑寒所迫遂有不逞之徒從中煽惑鄉愚無知相率入
場貪圖果腹究非甘心作賊者可比雖爲法所難容尙屬情有
可憫無論晉民豫民皆係

朝廷赤子驅之出境足矣如果真有抗拒情節則拏首犯以散
其黨若遽當作軍務痛斫大傷天地好生之德於心未忍凡有

牧民之責者切宜戒之來稟製造有局收支有局等語不道爲他日開銷地步豈真如此辦理耶措詞旣太張皇居心未免殘忍總以實心行實政以不忍人之心行不忍人之政爲是楊先科旣據供認隨同裏掠甘心從賊罪有難逭仰卽就地正法楊春玉暫行羈押俟風聲稍定遞解回籍可也以後仍宜會同營汛嚴加防範毋令隣匪入境擾害良民是爲至要

孝義縣曾稟勘明合邑各村成災分數請將未完錢糧分別蠲緩

查前據該縣以饑民眾多倉谷不敷動放請發款賑撫等情稟報到院業經明白批示並飭捐輸局核明酌量發給在案仰俟賑銀到日督率公正紳耆認真散放務使災黎實惠均沾勿任胥役人等剋扣滋弊一面會同委員邀集殷商富戶勸勤務期輸將踴躍勿任遷延觀望仍俟捐有成數即行稟報查考至所請蠲緩錢糧候飭局核明照例妥議彙案詳請核辦並移該委員知照

管帶南路練軍馬隊稟遵將防哨事宜覆陳由

各處饑民蠢動其故不在饑民也地方官姑息縱容始則使如恃愛之驕子爲所欲爲繼則使如無押之虎兇爲所得爲而後其膽始張其心始肆誠使於未動之初早爲鈐束彼雖餓填溝壑固不敢萌異心也該將官揀選謹慎之兵一十六名作爲兩班每班分四起輪流稽查要路布置最爲得法但能使民間屢屢見有兵來奸民自懼良民自安每起二名不嫌其少若多則不敷分布且恐益民間雞犬之驚惟巡哨之兵最宜安靜必須使莠民見之有畏心不至使良民見之亦有懼心則地方從此安謐矣又稱商賈糧車過境任意截劫毫無忌憚或三五同夥

攔阻孤身行客奪搶物件如此則糧販無人敢來境內之糧安
得不日形缺之所關非細仰卽加意巡防遇有截糧攔路行劫
之案一經挈獲卽行會同地方官訊明情節確實稟請就地正
法以安商而裕民食是爲至要

署解州稟拿獲搶匪並遵札擬辦虞猗陸三縣捕務由

所議次第清釐以免顧此失彼辦法甚是平陸岳家莊等村時有搶奪若不迅速緝拏良善不得安枕候飭衛鎮酌帶練軍先行前往會同魯令府經王佶不動聲色密爲購線先將滋事首犯拿獲訊明分別懲辦重則就地正法輕則准戶族牌甲切結保釋仍宜嚴加管束不准作奸犯科前飭捐輸局發給該縣賑款銀六千兩其被災應賑饑民魯令應以確切查明戶口妥爲賑濟以免迫而爲匪賑款如有不敷准其預爲稟請以便酌量撥給但須將戶口確數及如何散放之法以何時起至何時止通盤計算錢米搭放實需銀米若干據實詳稟不得稍涉含混

該牧此次於所屬賑捐緝捕各事宜均能認真督率妥爲辦理儘可一面將解州料理就緒一面會商衛鎮將平陸滋事匪徒趕緊清釐以衛地方是爲至要晉省兵力無多不敷分布而地方不法之徒乘饑煽惑勾結生事者所在皆有若處處分兵駐紮覺兵分力單於事無濟似不若隨時哨探無論何處有事卽派兵往何處彈壓事定之後仍回原營駐紮運用較靈保全亦大蒲解絳各屬遇有須兵之處均可移請衛鎮練軍立即出隊設兵所以衛民帶兵理宜防盜衛鎮勤慎耐勞聞警卽應馳救不必候本爵部院札飭卽當迅速前往現調樹軍六營移駐南路河津一帶爲水橋河防之計將來衛鎮練軍卽可專顧蒲解

該牧所請分哨駐紮該州一層如衛鎮力能兼顧則飭衛鎮派練軍兩哨分駐其地交該牧節制以資得力如實不敷分布則由該牧自募壯勇二百名每名每日酌給銀八分無事則操演技藝有事則由該牧分派彈壓保衛地方明春事竣統由該州捐輸項下報銷可也除分別飭行外仰卽遵照辦理

靜樂縣生員李廷芳爲報明丁憂未蒙批示不敢擅辦哭
懇恩給假事由

細查全案卷宗本係京控已奏案件被告之書役惡棍等名理
宜按名提集訊究且曾經前撫部院委員確查稟覆原告所控
各款均屬有因又迭經行司飭府嚴勒限解審在案本爵部院
遵

旨清釐庶獄面諭太原府及發審提調至再至三何以遲延數
日置若罔聞是李煦姚聖濬等京控矜棍黨役惡款害民並控
發審局委員杜嵩年張喜田等有意翻斷與毒責原告勒結羈
押等情不爲無因一見之於屢次提被告而不到一見之於不

准告回籍奔喪無非袒護同列之丁書衙役以遂久存該縣陋規之私見而已案關京控奏結咨結均有限期各有職守之考成太原府發審局久已暗無天日以致上千天怒亢旱三年今若不及時清釐積獄且任聽京控案內有名之委員杜嵩年張喜田等顛倒是非變亂黑白萬一上達

天聽則巡撫與藩臬兩司均無顏面上答

聖朝知遇之恩且晉省殃民之州縣頗不乏人不得不早爲整頓靜樂縣李令不知理訟正所以息訟膽敢包庇劣矜蠹役奸書抗不解審藐視憲綱貪圖一己之陋規不顧百姓之殃害似難寬縱合行札飭到該司即日遴派幹員星夜前往提集被告

王慶成倉書溫秉中兵書周文銘工書張文明及差役張鳳翔
門下何二等尅日到案聽候本爵部院示期審訊完結所有全
案人犯勒限一個月到齊如再任意延宕定惟靜樂縣李令是
問仍將派委銜名具報毋違此札

朔州稟教匪滋事會營訪拏並調樹軍駐紮彈壓由

該州民熊六娃妖言惑眾勾結入會意圖滋事昨據署雁平劉道來稟當經札飭葛鎮酌帶練兵會同該州確切查明購線緝拏如能弋獲首從各犯則就地正法以昭炯戒其餘被誘之民可以全不問罪至於地方官清釐此等匪類全在平日稽查戶族牌甲各長不准相習爲匪自可不動聲色潛消默化若平常不講究保甲之法臨事又多疑慮張皇之見動煩兵力深恐累及良懦當此大禋之年何可多樹一敵以理論之該州與葛鎮清泰當可勾當此事頃已鈔錄來稟函致張軍門順道與該州及葛鎮密爲面商妥速辦理該州謁見張軍門即可具陳此意

總以化大事爲小事化小事爲無事爲妙切不可稍涉張大之詞致啟民心之惶惑是爲至要

平遙稟奉撥糶米五千石現接委員來函勻給各處分買

由

前據請撥採買米石業經批准以糙粳五千石悉數撥給該縣
購買並行什貼局在案不意汾陽榆次需米孔急竟先派人在
什貼守候葛令以三千石撥給該縣而以二千石分潤榆次兩
處亦屬權衡緩急萬不得已辦法在平遙視之則謂爲可議而
在汾榆視之則應爲可感究之葛令亦非敢厚於汾陽榆次而
薄於平遙也時有先後勢有緩急故耳現在後路米石源源而
來除已撥給該縣糙粳三千石應再撥大米二千石以足該縣
糶買五千石之數斷不使該令失信於平遙之萬民雖云救災

如救焚然有三千石先到究竟慰情聊勝於無定可暫時敷衍其二千石不過稍緩數日卽到值此大祲之年時局艱難要當共濟然必和衷乃可共濟若一味顧己而不顧人轉覺局量褊淺細閱來稟旣喜其救民之切又嫌其所見之隘願該令以此自戒方不背全己全人之道至於運糧車輛自應聽其僱覓不准行店從中把持此至理也如由各行代僱什貼車驟照依民間酌給行戶辛勤之貲原無不可然應有一定之限制不能聽行戶之過取若係別處僱來車輛或各縣自行帶來之運糧車驟雖落行戶公議行店不應需索行用以昭公允如敢故違卽應從嚴究辦決不姑寬應由葛令卽日出示曉諭行戶裁革行

用以利各屬車運之行其什貼本市之車驟行用仍聽其昭舊可也

什貼轉運委員葛士達稟晉省賑糧兩路分運益爲捷便

由

細繹前後函稟條理尙屬井然而意見特重西則不見容於汪令東則觸忤朱道張守天下豈有一人能辦之事哉全仗和衷共濟方能補救時艱無論做官做民皆有絜矩之要道聖訓絜矩二字之義不外上下前後左右六面着想此次什貼設局但司收糧發糧原不必旁及其他該令前次函致獲鹿謂什貼糧價大減倘源源而來恐形擁滯究竟米糧之來無多糧價之減無聞斯言一出傳播天津以致未起運者大有觀望不前之意已起運者突有保定截留之說殊不知省南饑黎餓殍載道其

存者望糧情切如嬰兒之望慈父母未知何日乃有米至也晉省賑濟舉世之人皆慮糧少該令獨慮糧多計及擁滯果何所見而云然哉一言以爲不智關係非輕可不慎與又該局與獲鹿局往來文牘移而不申同是晉省候補之員縣與府平列一般憲綱未免稍紊試思人品之軒輊豈盡視官秩之崇卑然素位而行遵時之制亦讀書之士所宜講究也至於行商把持舞弊是其慣技廣泰固無足責公義豈盡可恃不過以人見我見橫梗胸次而可愛可憎遂判於目前矣各屬自行帶來運糧車輛由外僱覓之車什貼不應索取行用索則出乎情理之外爲局員者不應左右於其間倘不留心體察行店膽大安知不更

甚於廣泰前日之所爲者又聞該行店經手用秤有高收低發情弊獲鹿腳戶深懼賠累畏憚不前因而糧運遲滯竊思委員用意氣於上行戶舞小弊於下值此大災大難以不易得之銀錢運數千里難得之米糧或阻於小弊或遲於意氣本爵部院將何所持以救饑餓待斃之災黎也該令奉批後務宜猛省力禁行商市僧從中舞弊用秤宜照獲鹿局之秤以定餉兩不可分毫高下其手致啟車騾載腳驚疑並宜諸事慎重實心實力虛衷協恭不可草率尤戒侮傲經此次勗勉之後倘或再逞私見好議論人短長遲誤轉運機宜或殆不止譴責之辱耳

自是舉之於世未見

三

太原府詳榆次縣曹鳳來呈與王繩武代買字畫等件由衙門書吏恃威逞詐原堪痛恨惟例載吏典犯罪笞杖決託仍留役必須罪名稍重按有端倪乃能革役也又長官使人有犯一應公私等罪所部屬官等流罪以下不得越分輒便推問皆須開具所犯事由申覆本管上司區處若犯死罪方可先行收管曹鳳來既有充書執照便是庶人之在官者該府於未申詳以前輒將曹鳳來充書執照追出存案並先發交陽曲縣看管已屬不諳例意索債細故斷非死罪可比案既未定率爾先行革役尤與名例不符細閱詳詞王繩武故父王文瀨及王賀氏係欠債賴債之人曹鳳來係放帳收帳之主債未討得業已先

被羈押又請革去吏役各省向無此等章程豈獨晉省別有新例耶且王繩武故父王文灝生前託曹鳳來代買字畫古玩珠飾等件至欠銀一千三百餘兩之多則其家本屬巨富已可概見來詳謂無帳據可憑究有清單爲據王繩武旣被指控並不投案質審輒令其母王賀氏出頭恃婦狡賴以孀居之婦能與衙門書吏對獄其中必有訟棍主唆難保無恃富賄賂行求等弊該書所控蠹役納賄未必無音仰按察司會同布政司提集兩造被証人等遴派明白律例之員會同發審局提調秉公悉心研訊務得確情以期水落石出該書果有訛詐情事自須取具結狀卽行詳請斥革按律究辦以爲恃書逞詐者戒倘審出

其中別有訟棍主唆及賄賂行求各弊亦應將王繩武所借之項追究全還以爲特富行賄取巧賴債者戒仍將訊明緣由先行詳報察奪

河津縣詳請該縣捐輸不敷散賑迅賜飭發銀兩由

查該縣前經札委絳州陳牧督同委員地方官勸辦現在各處捐項均有頭緒河津雖無巨富頗有殷實該令到任已久迄今仍祇捐銀萬兩不自咎勸辦之不力而諉爲紳富慳吝究竟晉省紳富實多急公好義之士雖其中間有慳吝如原景文者然官不可概以慳吝目之亟宜苦口勸導曉以大義破其慳吝之見激發惻隱之心官旣可得捐輸以救百姓紳亦樂有體面以對鄉鄰卽將原景文解赴絳州卽應聽候陳牧勸辦其餘未捐各戶仍當會同委員剴切敦勸以期踴躍輸將至所請賑銀並不查照本爵部院札飭將應賑饑民究有若干自某月起至某

月止每口日賑若干共需賑款若干除動用捐款倉穀外尙短若干遂一聲敘明晰遠請發銀五萬兩試思晉省普災何能發此鉅款仰卽將已捐銀兩趕緊催令呈繳一面遵照前札逐一聲敘除劃留捐款並放倉穀外究短若干限文到三日據實稟覆以憑陸續給發銀兩事關賑務毋再混延致悞饑民性命是爲至要

曲沃縣稟勸諭紳商捐輸助賑由

檢查該縣先後來稟詳加覆核勘報成災六分被災尙非奇重例應撫卹一月加賑一月所請賑濟九個月已與例意不符如成災不止六分則原報之不實已可概見又該縣戶口據報分別極次親自核實統計合邑大口一萬柒千九百六十五名小口五千七百六十七名照數發給賑票必係照戶口之總數發給次貧當在數內乃此次來稟又稱尙有次貧大小八千八百二十餘口聲有聞賑歸來陸續加增一層是否屬實無從懸擬然前後戶口之不符情形已畢露矣大約始念尙屬實心其繼念顯係因捐輸稍旺希圖在該邑儘數開銷而先以一稟預爲

地步卽令實有此項次貧戶口而前次詳稱次貧尙非迫不及待一時勢難兼顧是發給九十兩個月賑銀之時此項戶口並未散放已露端倪此次又復極次通計朦混掩飾不解是何居心竊以該縣報災分數而論撫卹加賑例祇兩月該令自知原報不實乃議加賑九個月本屬民命攸關省局何忍訛議駁詰自應照准辦理惟計自九月開賑起至來年五月底止加賑撫卹均在其內姑准合極次大小三萬二千五百五十餘口計之照該令所議每月祇需銀五千七百八兩零是九個月祇共需銀五萬兩零內除九十兩個月未發次貧銀三千餘兩核以該縣捐輸實屬有盈無絀乃該令因捐輸局撥解銀六千兩遂以

爲賑銀易得於是託名謂曰撫卹又以平陽設局轉運漕米托名請米加賑是該令希冀冒領之心未嘗須臾忘也試思該令作宰多年豈遂不諳例意况復勾稽明白詎得謂爲一時錯誤倘竟據此詰責該令將何以對其能當此重咎否耶水牧吳令身任查災之責並不詳細查明遂爾率行會稟科以扶同舞弊未免跡涉近似現均從寬暫免置議再行察看以後辦理情形何如本年災變非常南路情形尤爲吃重若盡如該令居心省城果倚賴誰氏爲民之父母也吾恐曲沃縣之民不願呼該令爲民之父母也夫照例撫卹加賑兩月原不足以全活曲沃之民若賑濟九個月悉行折銀散放又恐曲沃之民有銀無糧無

處買食除九十兩個月已放賑銀無庸另議外應就該縣倉穀無論極次按口均分一個月以濟目前之急一俟奉撥漕米運到平陽再酌撥賑米一月亦無不可雖不能照例每口給米五合然較之每月賑銀二錢饑黎沾惠多矣米穀賑濟兩月極貧又賑銀七個月已符九個月之數矣次貧九十兩月未放祇須賑銀五個月合米穀兩月計之便可賑至明年五月通盤籌畫合省城撥之六千兩不過共需賑銀三萬六千八百八十兩准卽在於該縣捐輸項下動用下餘捐項銀二萬一千兩該令自應悉數催繳呈報省城總局聽候捐輸局核明分撥各屬斷不准該令取巧希圖中飽除飭捐輸局出示曉諭該縣城鄉士民

以杜該令尅扣外合行詳晰批明詰責此後該縣賑務該令如再不認真核實辦理或有絲毫短扣浮冒情事一經訪查實據定卽照奏定章程治該令以應得之罪勿謂言之不早也

澤州府等稟探得匪因晉省各要隘添兵防守折回修武

由

饑民越境掠食擾害安分災黎固屬可恨揆厥由來因饑迫而爲匪但冀獲食苟延殘喘卽身限重罪亦不暇計情殊可憫細閱會稟不覺潛然淚下本爵部院迭次批飭祇准防守隘口不令客民入境所以不准越境會勦者恐傷天地之和也就令關入晉境亦祇可設法拏其爲首之人斷不可當作賊匪懲辦夏牧另稟所見甚是思慮亦極周到河南撫院遠在南岸不知河北情形不免爲屬吏朦蔽夏牧此行裨益於兩省之民不少仁人之言其利甚溥如果豫撫採納嘉言知必有不忍於心者且

晉省卽以萬金全活鄰封數千人命原無不可正值自顧不遑之際亦不敢惜此欸項惟聞鳳臺大路一帶餓殍已多亟宜散賑放粥以度民命晉省亦李撫部院舊治赤子如訪聞晉民饑苦更有甚於豫民或不忍奪晉民之食以食豫民此事之未可知也陳丞業經帶隊起行前來自應至澤州會同賴令防守各隘斷不可妄戮無辜一名俟夏牧回澤州後修武之事辦有端倪再行撤隊回省可也所獲田發全一名暫行看管予以口食待豫省料理就緒資遣回籍以明不殺一饑民之苦心鳳臺陽城兩屬災黎尤多饑苦尤甚無論銀錢米穀皆可搭放若專恃買米始行放賑非獨無此鉅款亦且緩不濟急以銀折賑各村

所得雖微究竟可以通用雖難必其果腹究可延活數旬便是
大幸應卽酌量情形變通辦理不可拘泥一法則所全多矣一
俟吳編修糧到清化鎮則澤潞之民大有生機晉省平陽府轉
運局未便再緩已委安丞頤會同丁丞啟前往開局代辦十一
月中旬夏牧回晉卽可前往接辦安丞卽可回省仰卽遵照並
移夏牧知照

什貼轉運委員葛士達稟起運平陽麥石並擬賑務章程

由

查接收轉運來源路各有二途一採買平糶運到什貼由各該州備價購取一奉撥漕米分撥散於賑糧此接收轉運之應行分別不應混淆者也前經迭次行知在案此次將平小糧起運千石解赴平陽提前辦理俟漕糧抵撥小糧到日仍應劃出千石撥歸平糶項內以免軫轉所有獲鹿轉運漕糧概應由捐輸局分撥數目指派定妥行知該局即便遵照起運不應另出主意南路糧價更昂平糶米麥原亦可以運往平陽交安丞等仿照什貼辦法於民食不無裨益然應統歸捐輸局迅速核

議飭知該令遵照凡辦官事各有地位惟君子思不出其位故鮮隕越若地位不應出令而其才識又不能令乃概以不受命承此官事未有不差池者也該令有博思遠慮之見而少反約折衷歸於一是之衡宜虛心以戒之該局所需押運練兵已飭劉參將照撥至於南鎮靖字練軍現已分駐靈石平介以南候咨會太原鎮轉飭所部俟運糧經過就近接遞迎獲可也趙城洪洞本無匪徒出入且既有練兵護送更可放心所請札飭該二縣照料應毋庸議

黎城縣稟秋收款薄糧難掃數請准寬限以紓民力由
查閱該縣所稟秋收五分有餘並無一村成災何以錢糧不能
掃數須請展緩且復請辦賑若非以前匿災未報卽係目下希
圖冒領賑款二者必居其一况查明貧民僅止五千一百餘人
該縣捐數可得萬金鹽款可得一千四百餘串按口分給每名
幾及二金較之各處被災應賑之民所得已過一倍而該縣有
無倉存並未據切實聲叙顯係有心含混始則匿災不報欲征
銀糧嗣因錢糧追比不齊則藉辦賑濟爲名旣欲開銷鹽款又
欲混領賑銀值此大祲萬分難籌在省局則深慮災黎難保而
在該令則以未嘗報災之處竟欲從而中飽居心豈復可問似

此情形民間之拮据不問可知民既非常拮据理宜加意體恤
應卽一面就現有之款妥爲撫恤毋得從中尅扣一面將零星
貧戶應納錢糧年內無力完清者准其展至來春征收以紓民
力至於自秋徂冬四月之久該縣因何並不稟報災荒此次條
忽請款辦賑其中必有所因仰將緣由據實稟覆以憑核辦毋
得再涉含混致干未便

榆次縣稟續捐殷富銀兩確數暨辦理情形由

地方貧富不一民間苦樂不均本年被災以平蒲汾霍解絳爲最鳳臺陽城次之此通省官紳士民所共聞共見者也若論民間之財富則榆次祁太平介爲最亦晉省公道之論也而榆次殷實巨富以濟貧民藉膏腴之屬以補瘠苦之區此至當不易之理耳時值大祲救災卹隣古今之通誼各省尙且捐輸以助晉賑况本省凡屬官紳士民豈可稍分畛域目下祁太兩縣已各捐定十餘萬兩平遙有按家貲每兩萬捐銀六百兩之議卽如介休侯家其貲本不滿六十萬便捐二萬兩冀家貲本不滿二百萬便捐銀六萬兩由此類推則榆次各富戶更可多捐明

矣理宜捐二十餘萬兩似不爲苛潘令雖有差委陳署令素明
大義當能力願晉省全局決不至爲一邑之富民徇隱倘能竭
力敦勸益徵官紳一氣亟公好義之德除計算該縣辦賑需留
用若干外尙可盈餘若干可以備撥隣封之賑義冠河汾全在
該邑官紳踴躍爲之限文到五日後卽行稟報大概以憑核奪
是爲至要

天津籌辦晉豫賑捐轉局記名按察使丁彝綬等稟奉撥江
鄂漕米六萬石若以此價值運費購辦紅糧可得八萬
石上下應否仍照前案以紅糧抵交仰卽糙粳本色兌
交或卽現銀起解請示由

來牘閱悉具見恤隣高誼其所以爲晉民計者無義不周全晉
官紳士民同深感佩查江鄂漕糧雖係糙粳而饑餓之民得之
實爲至寶不得舂熟除糙卽可煮粥充饑非若紅糧粗糲之多
而不精也無錐之說由於什貼局員函致獲鹿總局想像之詞
究屬過慮前此奉撥漕糧五萬石比因迫不及待又北方向能麩
食是以用麥抵數其糧精於漕米迨後以紅糧抵米尙未敢承

此次續撥江鄂漕米六萬碩復改購紅糧縱可多得數百可以多活饑民計非不善然糧粗價賤節節添出運費終不合算且紅糧皮重而仁輕遠不如粳米之果腹而耐飽如概向奉天採買本年晉省固屬大災卽齊豫燕三省歲收亦非十分豐稔三省商販糴運全恃奉天一線來源若驟於彼處購買八萬碩其價陡然高昂恐於數省民食均有窒碍糙粳出於東南來路較廣卽不奉撥山西賑糧亦係應行運解通倉之項無所謂酌盈劑虛於其間多紅糧二萬碩糧價雖不過三萬兩而自獲鹿運至蒲解便須增益運費九萬餘兩誠恐愚民無知始聞有漕米六萬碩莫不喜溢眉宇繼而但見紅糧之至不見漕米之來心

生疑慮口出怨咨此種議論或亦不可不防既承垂詢自應仰
仗鼎力仍以糙粳本色兌交更爲切實目下晉省別無可望奉
撥東漕八萬碩縱能年內上兌亦必明年水泮開行約計達於
饑民之口其在三四月之交乎二三月所盼之賑糧全恃此項
漕米爲大宗夙欽貴局救災弭患以己饑已溺爲心務望迅速
商稟爵閣督部堂酌奪訓示並懇特派得力大員一面馳赴鄂
省稟商李督部堂一面馳赴江右稟商邵撫部院劉撫部院迅
速領款採買糙粳及時屯聚上海一俟明春開泮卽用輪船運
至天津改換小船運載保定以西相水面之淺深爲登陸之遲
早統祈始終見憐竭力趕辦迅賜源源接濟俾晉省賑務不致

中輟間斷實爲萬幸是否有當仍候

李爵中

部堂批示

遼州稟遵札查覆該州與和順二處報災征糧放賑情形

由

據稟及另單均悉該州四鄉旣已成災何以違例征收錢糧以困民耶從前乏食貧民嗷嗷待哺曾詣大堂叩求速賑人皆謂之曰聚眾闕堂勢頗洶湧而該牧獨謂之相率乞恩民間之迫不及待情形已可概見大禘之年官不預謀之幾先必待百姓多方要求始俯如所請以應之已落後着至十月十五動放倉穀何以旋又停止託詞專意供奉學院按臨考試夫考試大典固地方官所應號召士林早夜恪恭治具也災民環於境內旦夕待命亦地方官所宜預爲安置發棠以拯救之耳如該牧所

云然則該州之民自十月二十五至十一月初五學院起節豈
遂可半月不食耶稟內情詞節節支離辦理殊覺荒謬爲民司
牧每事必先有利於己而後敢爲若無利於己而僅有益於民
不曰於我無與則曰何苦乃爾及至流民卽於饑餓死亡則曰
歲也非我也是何異以槌與刃刺人於死耶若因荒歉錢糧停
征官無平餘可得衙內日用不支遂不遑計及斯民民因歲荒
可望得賑官因歲荒反受賠累以該牧之讀書明理當不至此
若果如此則遼州之民愈無所託命矣夫以此種居心而爲官
何以爲子民之父母何以爲屬官之表率所屬和順縣夏令本
係科目出身當民間疾苦萬狀之餘敲骨吸髓旣按畝而苛捐

修理衙署復匿災而不報征收錢糧括萬民之脂膏供一己之燕安任聽民間賣兒鬻女盡填貪吏之慾壑該牧近在目前何以於本爵部院未經札查之先不以一稟上達司廳其曲爲夏令諱乎抑自爲地步乎殊難懸揣如夏令之忍心害理貪鄙不職立予參革請

旨治罪亦何足惜况該牧稟內所揭情真罪當逐條臚列罰不止於逆諸遠方然此際令其去官謫戍萬里之外而不許夏令之一日自新尙歉然類於不教而誅姑爲摘去頂戴勒令將和順縣賑撫事宜妥爲辦理以觀後效方爲仁至義盡該令如果從此改過贖愆本爵部院斷不爲已甚之舉定當量從末減該

令儻竟執迷不誤不難疏陳實跡登諸白簡立請從嚴治罪言
出法隨惟夏令自審所擇焉所有已征下忙錢糧候札飭藩司
委員查明紅冊勒追提省除通飭凜遵外仰卽轉飭夏令知照

榆次縣稟遵批籌辦捐賑大概情形由

該縣被災較輕富戶甚多如果官紳同心協力共濟時艱則該縣紳富捐銀必不止湊二十萬兩此次通省奇災全仗富者出費官場出力方救全大眾性命貧民之心志帖然靜謐斯富民之身家乃能永保無虞若富民但爲一身一家之計不肯出餘費以救人牧令又常存一邑一隅之見亦竟置大局於不顧則賑務不易辦矣周禮有不任不卹之刑雖比不孝不友罰有等差然未聞置之不論罪也近接

欽差閩部堂咨開凡屬抗捐之戶有先褫衿頂遞解節轅之條何等凜烈本爵部院獨不可仿而行之乎該縣著名巨富二十

餘家聞其家貲大者亦五六十萬不等何以此次僅捐銀十四萬兩耶此上富未能盡力捐輸之實據也又聞中富三十餘戶其家貲均在二三十萬以外至十餘萬十萬之家及二三萬之家均可屈指數其姓氏此中富急宜盡力捐輸之實在情形也從前上富捐數過少者亟應加捐現在中富次富之未捐者亟應補捐揆之天理人情方爲公允該署令若能督同紳士剴切敦勸一律踴躍輸將豈不甚妙如或瞻徇情面希圖見德於上富市恩於中富次富一任該富紳取懷而予所得幾何且事急之際各擁厚貲坐視梓鄉之難而不一拯亦萬萬無此理卽按名遞送來省以憑加倍勸諭捐輸亦不爲過如祁縣之喬致鏞

在籍肯捐銀五千兩到省便捐二萬六千餘石介休之侯蔭昌
在籍祇肯捐銀數千兩到省便捐二萬兩並未嘗絲毫勒抑優
之以殊禮動之以至誠該紳等無所藉口不得不慷慨仗義以
了此未完之公案當經本爵部院予以匾額致送其家遂皆鼓
舞勸欣而去可見惻隱之心人皆有之天下無不可動心之人
特患官場不肯出誠意以感孚之耳至於辦理賑濟查該縣大
小僅十萬餘口乃謂需銀至二十餘萬兩之多未免謀款太豐
試查通省有此辦法否若謂一律買米給放夫以被災八十餘
廳州縣儻盡仿此施賑則合天下之財力亦恐不足以自給安
得不酌量變通錢米搭放既可以苟延民命又可以節省賑費

否則難乎爲繼該縣既有倉穀八千餘石又有捐輸二十餘萬兩猶云設有不敷再求撥發漕米所以爲榆次一邑計則善矣其所以爲全省六百餘萬饑民計則吾不知也該縣自十月二十日開賑起至來年四月底止計六個月零十天錢米各半除倉穀外實需賑款若干仰該署令再行通盤計算限五日內據實稟覆毋得稍涉含混現在採辦之米轉運之糧運費米價需用萬分緊急該縣捐輸姑就其少數而言之亦必坐二十萬兩計算自應先提銀八萬兩以資運費撥濟隣縣仰將已捐各戶刻日催齊呈報聽候指撥不得藉詞搪塞至於該縣賑需將來如或不敷俟來年江廣漕糧山東漕米到日准其酌撥接濟該

縣原無不可斷不使該署令爲難亦萬不至使榆次饑民賑濟
中輟該署令與該縣紳富毋再游移致干嚴譴是爲至要

全日本書之抄卷之十一

三十一

孟縣稟擬救荒五條懇請核示飭知被災各州縣照辦由
所議章程井井有條官能如此存心民必實受其福惟在已有
尺寸之柄而不能施行徒託空言轉欲使他人效法未免高自
位置且安知人之好善盡不如我耶本年陽城被災夏麥顆粒
無收該令上半年實官陽城征收上忙故既無一字報災而且
敲骨吸髓民氣因之大傷晉省被災之重不僅陽城而惟陽城
之民流離死亡獨甚幾於溝壑盡滿該令捫心自問能無內疚
神明歟後汪盧令接印停征痛哭陳請案卷釐然足據輿論公
道具有尙未可証也孟縣雖未據報成災民間物議亦有騰至
會垣者該令才力心思有一綫之明始則不聞行之於陽城繼

交不肯施之於孟縣何以責人甚明而自責獨昏耶天下未有
自謀不臧而能忠於爲人謀者仰將所議各條實心實意力踐
躬行爲治不在多言亦願力行何如古有明訓儻能亟圖後效
悔悟前愆不患其不上進也

和順縣稟該縣辦理賑務實在情形由

兩稟均悉據稱該縣修理衙署稟請在前查該令到任已及兩年未聞善政及民輒派民間出錢修理衙署祇圖一己之安不顧民間之苦雖非私收肥己究屬藉公苛斂况本年夏秋之交大旱如焚遍地皆赤正爲民父母者食不下咽寢不安枕之時應如何滌慮洗心自省咎責乃猶興土木之役耶且至九月始行停止尤爲不識時務八月間被霜成災延至九月二十六日始行稟請委勘其稟遲至十月二十二日始行到省謂非倒塌日期其誰信之若謂因簽差不慎以至遲延何以未聞究辦種種不合情節顯然災務處分綦嚴此次僅予薄懲已屬格外從

寬原爲策勵後效起見該令與其嘵嘵置辯希圖掩飾愆咎何如趁此振刷精神力圖補救若再怙過不悛竊恐自悞不小亟宜審所擇焉可也

候補直隸州劉牧平遙縣汪令會稟委查該縣災歉情形
由

該縣荒旱情形秋夏收成歉薄現在分別籌辦所議四條均尙
妥洽惟款項太鉅亟切未易籌畫應候各路查災委員逐處查
明稟覆到齊由司通盤計算須視被災之輕重議給賑款之多
寡庶幾廣播

皇仁乃無偏枯向隅之患至於該縣所得自行主辦者准由該
員卽日詳慎次第興辦先救目前之急務宜多全民命實惠均
沾爲要

鳳台縣稟動用倉穀以資賑放由

該縣就食饑民至一萬餘人之多殊爲可憫現經設廠放賑足見加意恤不愧爲民父母仰卽照常督率紳耆認真經理不假吏胥之手自然實惠及民目下甘霖未沛仍宜隨時察度情形酌量撫綏是爲至要

朔州姚牧稟陳救荒條目情形由

該牧所答各條有已行者有未行者類皆洞悉民情切中機要
洵堪嘉許惟所稱嚴禁閉糶一節欲令富民餘粟至百石以上
閉糶專利者一經告發卽籍之以賑貧舖戶囤積不糶者亦照
此懲治此令一出實肇紛爭非爲萬不可行亦不可發爲言詞
律載閉糶者籍下卽繼之曰強糶者斬係治亂國用重典之意
重在下句不重上文富民舖戶之有囤積也猶倉廩之有官粟
也官粟以待荒年之賑囤積以待荒年之糶其物雖分公私而
其有益於荒年則一也一州之內囤戶有幾餘粟至百石以上
者又有幾卽令掃數出之未必足供闔境數日之糶糧價豈遂

能減即使果減而各囤戶糶盡之後糧貴將復依然地方官又將操何術以救之耶聖賢經濟之學皆謂富民爲國家之元氣周禮養民之條亦曰安富誠以富民者一方之貧民所資以爲生也今欲籍富民餘粟以賑貧旣大乖前賢安富之道尤易啟奸民覬覦之心富民藏粟多少村鄰未必知其確數一聞此說則無賴惡豪勢必乘機嚇詐其過百石者報之官其不及百石者亦報之官告訐紛紛訟端滋起是未使貧民得惠而已先令富民遭殃矣非仁政之持平也且時值大祲小民需糶之日方長固賴有速糶者先供目前之急尤賴有不速糶者徐備日後之需俾民間得以常常有糧更爲地方之福若勒令富民鋪戶

一時掃數出糶豈謂窮民將來遂不需糶乎况各國戶之不糶非終不糶也不過待高價耳糧價之貴賤其權由時與地與勢操之非官之力所能抑亦非國戶之力所能昂此項國戶地方官卽不速之糶彼必不肯久留之待豐稔而賤售也因來稟微有語病用特詳爲詰誡其餘各條法良意美濟世之術有本有原非第思慮周到且多閱歷心得之語勉爲循吏以副厚望切切

臨晉縣方令稟遵札稟覆垂詢各條由

細繹所答鋪張有餘按實不足且自足之意橫梗於胸次滿紙皆自是之談理無根據而又以大言出之用心既欠細密放膽亦嫌特大至於訾議臨晉之民多爲商賈視爲痼疾而不可瘳持論殊不平正爲民父母應有容人之量若輩安分守法貿易營生聖賢且不厭棄

朝廷亦加體恤何該令疾惡之深也胞與之量果安在哉身居民上刻刻當敬以持己又宜凜若朽索之馭六馬可期慎而不敗該令驕矜如彼立論如此竊恐未及病民而已先自受其病矣可不謹歟又稟內別字迭見併飭奉批後仍仰縷晰稟復以

驗該令自治之學能否虛心治民之政果否實心言爲心聲不可掩也切切

陽曲縣李令稟遵飭覆陳教養士習民生各事由

按民間之生計婦功常居其半五方之物產女紅居其二三粗者則織葦編蒲芒鞋草帽精者則昌綢魯布潞緞秦紗以及西江之書湖州之筆皆待婦女而後成者也如斯之類不可枚舉故婦女不可以安坐無事嘗見農家一婦之勤隋即可考驗一門之豐畱逸則生淫勤則不匱皆至理也該令所答晉省土宜水利物產民風以及樹藝學校盜賊詞訟諸端頗能悉心體察其論女紅一節尤得其受病之源果能諭令士紳設法勸導民生可賴以厚民俗亦可望轉移幾分第小民可與樂成難與圖始易俗移風悉仗賢司牧勸導士紳以爲之倡率昔賢云變民

風易變士風難變士風易變仕風難欲變士風先須仕宦茲士者以身作則而後可欲變民風則非官場苦口勸導士紳戒奢崇儉則其風不能及民也明知言之易而行之難然吾輩既一日在官不可不深明斯義耳

委員張鵬稟接運米石改用行秤發腳並腳價數目由

該守接收津局糧石查照原來數目填給印收轉運發腳照依行秤除批給價係爲撙節起見所辦公允之至至於災民有補又於津局無礙朱道來函據稱該守所議所辦得適中之宜以後即可照辦所稟接運章程及辦理情形前已具稟咨達直隸爵閣督部堂備案施行另稟葛令函稱榆次一帶近日糧價大減津糧腳價較昂以後源源而來深患不免擁滯所慮亦有可採殊未計及南路情形無糧則人心惶惶糧少則市價陡漲糧多則市價頓減倚仗乘除盈虛消長皆至理也晉省來糧之多少視乎津運之遲速今日之頓減安知明日之不陡漲乎商人

將木營利自應計較毫釐至於救荒賑撫計較之術太工則民間之困愈甚吾輩但求糧多則價不平而自平於晉民自然有濟假令糧少則價不長而自長晉民必至大困商米當計成本官賑不必計及成本也津糧之來源有三晉省之分撥甚繁各局辦理亦宜分別不能統作一律一係津商自備糧價運腳到晉銷售者是謂商米應由該商合算價值什貼局但爲之幫同照料不准晉商勒指把持聽商人與晉民自相貿易而已如銷售遲滯則由什貼局呈送米糧價值稟請省城總局收買所以優待客商而廣招徠也一係天津招商局代晉採辦之糧由津局轉運無論糧之多寡價之貴賤悉交晉之委員接收合算腳

價若干開單飛報省城總局敘詳請咨李爵中堂在於天津所存晉款項下按批劃扣清款獲鹿局將所收之糧悉數轉運什貼加以腳價合之原來腳價共銀若干按批開報先儘各屬備價來什購領值晉市價昂之時則照原本合算如值晉市價減亦不得不照原價算與各富縣萬不得已必須折本乃可出脫則所折之本係賑捐之款暗中墊賠斷不令委員墊賠分毫也如各屬購領之後尚有餘剩斷無令晉省各舖戶販商賤買賣賣之理至於各縣官賑局備價來買無非賑救晉省之民則總局不復計較盈絀矣要知此次招商局採辦之糧非專爲平糶起見實係爲多救晉民起見其所以准各屬備價購買者不過

因賑銀缺乏藉資周轉於一時耳招商局果能源源而來則來源可期不竭來源不竭則晉省各郡中等不受賑而必須糴糧過活之民全賴有此項糧石以活命否則本地無糧可糴名不列於次貧不能喫賑豈忍聽其餓斃也該令所慮糧多悉至什貼無人過問此明年夏間事耳若真有此好消息則省城總局便可將糧悉數分撥被災較重之縣更可大慰民望矣一係天津賑捐局代運欽奉

諭旨所撥之糴糧專備賑濟之需其由津局轉運至獲鹿一路者交晉中委員接收轉運什貼按批分報聽候省城總局分撥各屬以備賑濟其由清化鎮一路者亦係如此辦法明春東陽

關一路一應如此辦法各路收糧委員第有額收之責而無奉撥之權總局相其先後緩急之宜酌量分撥假令將來採辦之糧延滯未到無論屬備價求買亦不得絲毫挪用糟賑之米作爲商運之米此皆至當不移辦法獲鹿什貼固宜遵照卽清化鎮澤州府及東陽關平陽府各路均宜遵照特此詳爲批示仰卽恪遵毋稍紊亂並不必爲眾論所搖是爲至要至於運費理宜早籌已據藩司面稟准將十月底領回之部款項下經過獲鹿由該局就近劃扣三萬兩以充運費合併飭遵

--	--	--	--	--	--	--	--	--	--

曾忠襄公撫晉批牘卷三

邢縣蕭令稟奉札詢各條目謹陳管見由

居官以培養元氣爲要以顧恤民隱爲先此學道愛人之篤論也善政不貴於泥法譬之良藥期於利病不期於執方尤爲切中要害郡邑之情形各有不同治術之先後因之而異卽寬嚴猛威剛柔緩急所施或失其當而地方之受病卽隱伏乎其中如驚偶然之利而貽經久之害或執偶然之弊而訾常然之法大凡天姿高明者往往易蹈此轍須知爲治與爲學毫無二理斷無甫行而卽易成之業亦決無百利而無一弊之政朱子有七分利三分害或利久而害暫卽當行之至於三分利而七分

害或害久而利暫則不當行之之說可垂爲萬世牧令之譜該
令來稟有察看緩急情形次第舉行不以暫時權篆稍涉疎懈
其用意良可嘉也勉之勉之

籌防局詳試用同知松昌由包提到車局董事人等並帳

簿由

包頭車局董事人等業經提到并呈繳出入帳簿五本自應切實根究惟查明所謂車局者實係車行而所謂局員者實卽行中之董事民捐民辦乃市鎮行戶支應往來各差之常細閱帳簿每年除抽收費用外行戶歷年均有私墊之款供應往來軍差則包頭行戶急公好義已可概見且並未嘗經官辦理官無經手銀錢之責卽不能強商民以就衙門之範圍倘或操之太切反恐激出事端上負

朝廷體恤商賈之意亦非所以適利師行之道至於行中董事

人等有無浮冒舞弊不難照帳核算仰飭孔守廣泉會同太原府清守卽在籌防局迅速逐件清查傳該董事等入局取具供結核算清楚如無浮冒卽當令其回鎮執業限五日內詳覆聽候核奪覆

奏免滋擾累繳帳簿五本併發

翼城縣石令稟覆遵飭議陳各條款由

牧令之道與民興利不如爲民去弊去其弊而後利足以及民興其利而不防其弊則利或反爲民害卽如該令所稱社倉法之善者也然不善行之則擾累無窮官不與聞旣恐飽社長之橐官稍與聞卽慮恣吏役之奸蓋貸粟之戶類多飢貧其出借難緩須臾其還倉不無延宕一經官爲鈎稽則借戶或受追呼社長或多賠累官簽役索井里騷然以致良懦畏事者莫敢膺筦鑰之司蠹棍牟利者轉得竊收發之柄迨至此輩經手而侵蝕虧挪或僅存空籍而社倉遂爲虛設矣來稟稱沃土之民多不材瘠土之民常思善晉省民情猶厚民俗尙純足見局量寬

宏絕無疾視斯民之意又稱清靜甯一可以事簡刑清忠信明
決可以政平訟理吏胥書役馭之宜嚴威克厥愛而後心有所
畏語皆精當能識體要至其餘各條言之太易且有高遠難行
之說誠恐於利弊之間猶有思之未熟而慮之未周者仰隨時
畱心體察爲要

陽高縣程令稟遵札稟覆辦理地方情形由

該令於通飭十餘條目未及分晰登答第因革生馬經一節致慮於學校之健訟民情之逞刁并謂此弊不除則抗官梗化之風殆將日熾所論誠是但欲除之弊必先官自處於無過之地而後可以責人大凡劣監刁生控官雖在臨時而其心之所不滿於官者亦未嘗不在平日平日苟無以服其心遇事又被之執其短則若輩挾其桀黠奸猾之伎倆尋瘢索垢列狀上聞比比有之然昔賢所至吏畏民懷能使奸猾斂迹豪右側目者果操何術哉良以平日潔己愛民足以服其心信賞必罰足以懾其志若輩具有天良方懷德畏威之不暇何至以一端偶失遂

斷斷而起與官爲敵哉如馬經者何地無之一邑之中不肖之類奚止一馬經哉匹夫一能勝予克己之學所以慄慄於先律已而後律人也來稟稱一切差徭力行撙節從前糧粟小費及所有陋規一概裁免嚴督書役不使掊克小民詞訟隨到隨結俾無管押守候之苦果能如此實心實力勤始勤終已足使奸猾豪強無所藉口倘有捏無爲有希圖把持妄行上控者朝廷自有功令治以應得之罪非地方官所宜憂也

代州阮牧稟遵札條覆地方情形由

該牧所答於興養立教除暴安良等件均能窺其本原識其大要而於辦賑一節尤爲畱心洵堪嘉尙惟欲勸富民調急使各保其一村此法恐多窒礙難以普行村有大小富亦分上下一村之富戶未必能贍一村之貧民卽使力足以贍而合村之親疎老幼安坐以待富民之爲之謀旣無此情亦無此理非惟富者所不欲抑亦貧者所不安况富民者一方之貧民所資以爲生也荒年民迫於饑無物不賣且稱貸者多富民利其價之廉息之倍也於是什器房產無物而不買粟米銀錢無日而不出愚而無能者旣以物易富之財勇而有力者又以身効富之用

在富民雖爲利起見而貧民之賴以活者固已多矣今欲使之
村保各村出自富民之好善樂施則可若垂之爲救荒之憲典
恐起無端油火之案彼無賴者垂涎富民久已耽耽環視特憚
於官法而不敢狡焉以逞耳官有村保各村之說則強求硬借
攫取瓜分之患無所不至矣究之分一家之粟不足供百家數
日之食分一家之財不足給百家數日之用而富者方慄慄危
懼病富之爲累幾欲求爲貧民而不可得者目前之財粟且不
能保其長有豈又假置房田廣借貸以營日後之利哉於是富
民以富爲諱而貧民必愈窘餓殍必愈多警諸人之疾病業已
奄奄垂斃平日既未儲參耆之藥臨時又莫獲救急之方亦惟

聽其自然或可冀其復蘇耳而乃多方戕賊使之不得安枕誤
下刀圭重傷其氣其有不遽懼溝壑者幾希矣該牧此說發於
愛民之篤摯特恐見其利不見其弊則爲害或多用特詳示及
之其餘各條尙有遠慮足見實心勉之勉之以副厚望

新編 國語大辞典 第三卷

七

鄉甯縣許令稟遵札稟覆地方利病及辦理情形由

該令所答已行者不作夸大之詞未能者不爲粉飾之說於地方情形利弊皆能體以實心察其原委微特識其所當然並無不究其所以然非平日盡心民事閱歷有得者不能道其萬一洵堪嘉許惟所稱蠹棍上控一節大有中夜聞雞起舞之意必有所爲而後爲此言究之此等積習皆係實在情形然爲長吏者亦良難矣謂官爲可控則若輩恃爲護符而愈逞其詐謂官不可控則汙吏無所忌憚而得濟其私未便有所左右致滋流弊且若輩之控官雖在臨時而其心之所不滿於官者亦未嘗不在平日地方官誠能潔已愛民以服其心信賞必罰以

懾其志則戴父母者既眾而其黨自孤頌神明者既久而其氣自柔一時縱有小失豈遂至斷斷而起與官爲敵哉經云內省不疚無惡於志吾輩但求無疚於己倘有捏無爲有假公濟私希圖把持衙門妄行上控者

憲典具在固不能爲若輩寬恕也勉之勉之

吉州段牧稟覆臚示十餘條以憑核辦由

該牧所答於民事最肯用心且數年瘡苦之區令賢者不得一試其展布之具遇合良難閱之惻然惟所陳多高遠之說可言而不可行卽行之未必能效如所稱族黨戚友勸其通融借貸善矣然不嚴以馭之遂啟無賴油火之漸又稱下等饑民按名按日分給錢粟復借給籽糧牛馬俾資耕種善矣然賑卹之法不過接濟一時之急若必統闔境貧民終歲養之則一邑一州之費動以萬計

朝廷之力豈能給盡又稱清門牌聯保甲善矣然保甲之法所以能清盜源者以其連坐耳今徒使之互相稽查而幸其或相

告發不知九家既與盜同編一甲非其親族卽其鄉鄰平昔既有相狎之情既犯又無株連之累卽明知爲盜孰肯以素相習之人不干己之事忽起而鳴之官况若輩本非善類良懦畏之如虎既慮反噬又恐結嫌苟非迫不得已誰敢貿然出首搜若輩之鋒哉夫一家爲盜九家連坐酷烈之誅固不可爲訓要不可科以失察之罰施以薄懲使彼畏官法之嚴知盜之爲我累也痛既切膚其勢不能不急於自救不敢養癰遺患不敢從井救人則盜之得容其身於茲土者鮮矣凡地方官之於民事必須察其由來究其歸宿與其利必先防其弊務其實不自矜其功而後實惠可以及民經久可以無弊盡一分心力必有一分

效驗譬之舉業素習枯窘之題必能馳驟於長節連章此可以
理信之也勉之勉之

香林集方書目錄卷之三

三

試用府經歷陳延蕃稟遵諭酌擬條陳由

所陳各條多能識其大要至稱查災之際分別重輕放賑之時訪明貧富尤爲辦賑之先務認真辦理則蠹役奸吏不敢舞弊惡僕家奴從此斂迹更屬防弊之要圖移民就食不如以食就民間溝引泉以工代賑官紳鄉耆協辦育嬰均可以見諸施行者一旦窮民社持平辦理始終不懈政績當有可觀勉旃毋怠

霍州楊牧稟所屬各鄉情形地利籌辦教養急需之事由該牧所答該州水利民風土宜物產歷歷如繪非平日關心民事熟悉地方情形者不能如此惟稱棉花一種蠶桑一事查詢土人僉謂地不相宜按棉花之性雖惡溼而喜燥但止宜於土之燥而柔者不宜於土之燥而剛者該州地處萬山山地率多堅硬謂此項不宜其說誠然至稱該州不宜蠶桑則殆未之試行耳考周之唐地卽今太原周之魏地卽今解州該州介居唐魏之間土宜大略相似魏詩曰彼汾一方言采其桑又曰十畝之間桑者閑閑十畝之外桑者泄泄唐詩曰肅肅鴉行集於苞桑此皆該州宜桑之確證惟蠶桑一事本係女紅來粟稱地宜

柳葦是否以柳編筐以葦織席二者皆係婦女所爲
出女手固不必格外添設致令務廣而荒否則教
非教養之急務蓋婦女不可安坐無事非但民生
并且民俗純漓之所繫逸則生淫勤則不匱固至
細故也該牧於治民各務最肯用心又思以不取
爲安足見志趣之所尚第此二語亦未容易學到
篆曰用飲食衣服之需何一非

天家之所賜何一非從民膏民脂而來此不取之
也至於一郡一邑之公務借資於民力者指不勝
難之會全仗眾力以擎舉西北各省車馬絡繹於

民價以償其辛力物值乎此不擾之說所難共信也惟日以不
取不擾爲心則所以與之安之者多矣願與該牧共勉之

靈石縣楊令稟遵札覆陳地方情形並次第舉辦由

該令自陳履任來未及三月於地方情形已能悉其大要足見
畱心摺開八條尙協機宜若果能以實心行實政則興養立教
之大端除莠安良之急務亦不外乎此第言之甚易踐之頗難
苟能一一見諸施行勤始勤終著循聲而書上考卽此便是根
基又摺開社義倉一稱社首等將倉穀私自動用不行買還遂
致有名無實而歸咎於官不經手不知官若經手此項社義倉
之流弊更不止此凡屬鄉里義舉官一經手無非遣吏胥不時
鈎稽差役不時查問徒有紙上之空文益增格外之枝節此輩
凶殘逼人鄉間畏之如虎需索錢文逢迎酒食猶其患之小焉

者耳追呼借戶嚇詐社首叫器嚇害井里爲之騷然而官莫之知也良懦畏事者莫敢膺筭鑰之司奸豪牟利者轉得竊收發之柄又有一種狡黠之徒結丁書衙蠹爲黨羽任意虧挪侵蝕始則官不得而知之繼則官亦代爲掩飾是官衙經手之弊更甚於社長蠶食一鄉之害也夫名曰社倉義倉乃一社所捐輸一鄉之義舉非若常平惠民之本爲官物必待地方官處處經手也社正社副遴舉出於鄉眾則主政者未必一定匪人春借秋還操縱掌於官衙則待哺者反難及時接濟有弊端而後官爲之整頓則可否則不若聽其自爲有告訴而後官爲之剖斷則可否則不若置而不問良以奸胥蠹役無孔不入假令其過

問盤查若輩卽可因緣爲奸其尤要之語勿勒派富戶之捐勿
旁撓社首之柄握其事之大綱勿與其細目總其成於事外勿
入乎局中夫而後一鄉之人視其倉廩以爲此我民之所有也
好義者樂其捐輸以爲此我父兄子弟之所藏也卽典司諸人
亦甘爲勞勩不忍侵漁以爲此我鄉人之脂膏性命之所在也
如是則流弊可少而社義倉可不廢矣其餘各條志在有爲旣
多遠慮勿驚近功勉之勉之以副厚望

浮山縣楊令稟覆民風地利籌辦教養情形由

該令所答如書院詞訟並教民紡織樹木諸節辦理悉協機宜於保甲衙蠹二項言之尤切中情弊爲治之道如爲學然學無止境爲學之心亦無盡境惟有所歉然也學而後知不足知不足也而後能大有功故爲治者不可以矜功矜功則驚目前之利或遺日後之害又不可以自足自足則囿淺近之効反失遠大之圖况自足則必自是自謂無弊卽弊之所由生也自足則必自滿自恃有功卽功之所由隳也惟持一至誠弗二之心而又業業兢兢如有不及則治身治民之道兩得之矣願與該令共勉之

偏關縣任令稟覆該縣士俗民風並勸辦創設義學由

一邑之治與不治百姓之安與不安全係乎牧令之一身何也其地近而其權專也近則耳之所聞目之所見無非實情專則一一則事事身親身親則灼見真知而勢之緩急情之重輕皆思慮之所能周力行可以不惑故雖處邊遠僻小之區亦必有可興之利應除之弊固不可操切紛更亦不可因循廢弛但使盡一分心力必有一分成效民如能免一分苦累便有一分生機爲民司牧道固應如此也來稟稱欲添建義學並勸民種薯樹木於教養尙肯用心又稱自理詞訟隨到隨結遇有頑梗之徒立即懲辦於除莠安良亦能識其大要此外一切利弊凡力

之所能爲者尙望次第實心辦理呂氏當官三字其一曰勤願
與該令共勉之

沁源縣訓導許作霖擬呈善後章程四條由

擬呈善後章程四條細加披閱無非爲體恤災黎起見具微
心民瘼與時變通之意嘉悅曷已第其中有業經籌辦爲外
所不知者亦有用意彷彿尙須陸續勸辦者亦有利弊相因
碍難行者如請將錢糧半收折色一條查徵收糧賦完銀宗
悉有定例非疆吏所能意爲更變卽可據情上請而糧價巨
無定收受難於畫一上官無從周查流弊豈堪究詰將優循
恤民則折收現糧合銀不無虧折將跌價以交官則折收現
在糧仍有長餘是定價之難如此又况交兌糧石如包攬淋
拋散畱難諸弊至爲民累若查禁稍有不到鄉愚受害無窮

交兌之難如此查州縣倉穀諸有額設數目

國家丁賦悉爲經制之需亦何能以一半丁賦銀兩改收糧石充倉行之二三年之久是折收之窒碍者又如此惟倉廩空虛與穀賤病農二者實爲現今切要之圖刻已籌措巨款俟秋穀登場卽行發價採買民間以糧易銀卽可早完正賦地方有倉儲穀弗至再慮凶饑此後有款可籌仍當接續舉辦總期錢穀流通公私兩有神益方可通行無弊此半收折色之不能行者也又如請平工價一條查大禳之後丁農稀少雇值昂貴此乃一定之理若需索酒肉與坐曠工作諸弊省城亦有所聞惟欲繩以官法示以定價則斷無此政體官若出示禁止昂價其如

民之不爲工何此斷非地方官所能令行禁止者也蓋短雇本無名分統屬願意則來不願意則往曷能以無定之人立有定之法更何能以有定之法繩無定之人現在丁農短絀方苦招之不來若再加厲禁有不西之秦南之豫者乎晉之人尙且不爲晉用更能使秦豫之民襁負而來乎且彼不依官價果能盡加懲創乎懲創之後又能悉力耕作乎是爲循其自然屈及糧賤人多自有不期減而減者此平工價之不能行者也又如請廣招佃一條查晉省被災日久荒地過多招墾之難誠有如來稟所慮者刻已委員馳往被災之各廳州縣查勘荒地確數設法招佃認種並籌款分往隣省採買牛隻減價發賣所得牛價

再以散給有主無力貧民置備農具籽種以資耕作其有承墾荒地者亦擬酌給牛具籽種分別停徵糧賦大約招佃之法亦不出由本村紳富社首以及編民本村之無人者以次及於外村外州縣與夫外省之人小民趨利若鶩如果確有工力自無不踴躍承佃倘實在無人墾作雖或旌以匾額獎以虛官亦屬無從激勸計惟陸續勸辦得寸則寸而已此設法招佃刻已舉辦不繫乎獎勵也又如請禁吸食洋烟一條查種植罌粟地畝充公吸食洋煙科罪至重無如陷溺日久雖上有嚴禁之科條而下無奉行之實際以至流毒今日迄未有已每一念及良深憤懣查吸煙之害甚於砒毒夫人而知之也如果父兄勗其子

第官吏勗其書役人民將領勗其兵丁則此風早應斷絕亦不待士子考試兵丁入伍之時出具無癮甘結如其互爲容隱則出結亦屬具文又焉能盡除吸食之弊至私種一層有碍五穀尤屬可惡本年業將外州縣查出種植罌粟地畝勒令入官此風一傳當可知所做畏若令地保具稟事後訪查在各州縣年年所辦何嘗不是如此而其效安在况以之充賞尤不如閩部堂所定充公辦法爲妥蓋充公之罰鄉里正人猶可出首以無私於己也充賞辦法苟非鄉里無賴斷不作此行徑一有不慎在煙禁未能盡絕而村惡藉以容畱反爲里中無窮之患似亦未便輕於定議此洋烟一節刻正從嚴查禁毋庸再事紛更者

也仰卽知照

天

統帶北路練軍葛鎮稟哨官鄧參將毆傷右玉縣家人劉

升究辦由

鄧參將既經摘頂卽可以平右玉縣之氣似可不必撤去哨官
既撤哨官卽可不必摘頂議罰乃爲平允但分防右玉兵丁既
與官民不甚相安仰卽遵照前札撤回歸伍以後務當隨時約
束不得稍有需索滋擾此營伍應盡之道也李令其滋前次來
稟亦不無袒護家丁氣習大凡地方官遇警則望兵如歲待兵
如友一經安靜則嫌之如鼠棄之如履此官吏之恆情也究之
文武交涉事件總宜先平意氣方能和衷共濟切勿事後回護
是爲至要該總兵其切記之毋忽

署興縣葉令稟富紳固積多糧居奇閉糴由

該縣自上年十一月二十八日本城四鄉各設官糧局每斗定價一千六百驟閱之似平糴之善舉矣又閱二稟終幅該糧局竟無成本不過恃該令之捐糧二十石及紳商捐集之制錢九百餘千耳來稟既稱斗米需滿錢三千糴糧稱是制錢九百餘千不過買糧三十餘石卽該令果捐糧二十石合而計之亦止五十餘石自上年十一月二十八開局之日起至今年正月二十四共五十五天而城隍廟米廠五百貧民又按大口一合小口半合散放以大小口各半計之每日需放糧三斗七升五合五十五天共應放糧二十石六斗二升五合則五十餘石之糧

所剩不過三十石耳若城與四鄉各設一局共係五局是五十五天之中五局每日所糶不及六斗各局每日所糶不過斗餘無數貧民紛紛來糶卽一人與以數粒亦恐不敷天下豈有如是之糧局哉該令旣欲藉糧局正大題目欺罔上憲正月十九日發一稟二十四日發一稟同日到省其實二稟應是同日併發前稟作虛冒之勢後稟證以實案無非欲藉以迫脅富紳無怪牛錫琳温育才等斷斷起也且來省控告者尙不止温牛二家所控情節以來稟所辦推其所終極流弊必至於此非虛語也吾聞有以善政得民財者矣未聞以官爭鬪其民而施之以劫奪之教也絜矩之治豈如是乎勸紳富捐糧本好若因偶不

聽從遂將富民積米封存勢與查鈔相似况該令又已羈押多人凌辱其家主乎萬一激變人心衅起禍端咎將誰任且該令果以何罪名加於富戶頭上哉如此辦理非惟不利於富戶縱不因虐政而生他變抑亦大不利於貧民何者富民者貧民之財之來源也微論荒年也卽在豐年極貧者地無立錐詎有升斗之穫次貧之民雖小有收穫亦斷不足敷闔家卒歲之糧然而貧民終不至餓斃者賴有富民故也富民而貿易則市肆之中爲之持握算籌奔走給役者皆貧民馬頭之上爲之裝貨卸載荷擔負囊者皆貧民道路之間馱脚推脚拉脚者皆貧民逆旅之內賣酒賣茶賣飯者皆貧民其因貿易而買辦什物千零

百碎與貧民相交易者更不勝數也富民而耕作則爲之耔耘者皆貧民爲之刈穫者皆貧民爲之叱犢牽車築場納稼者皆貧民爲之糞田莠種荷耒扶犁者皆貧民其有無相通緩急相濟日與貧民相通融者更無論也故有一富室而貧民資以活者恆數千百人數十百家呂氏實政錄謂富者爲貧民者元氣之所存特世人習而不察耳豐年且如此荒年則尤甚地方官但能護衛富民使之安然而無憂坦然而無懼則彼將因荒年物價之賤而置房田買器具或大爲貿易以求數倍之贏或出放粟米銀錢以營數分之息謀利既切用人自多而貧民之有才有力有器具有房田者遂人人得以效其奔走易其錢財雖

在凶年何至遂填溝壑哉若如該令所爲於并訓導溫千總尙且如此則其他富民慄慄危懼可知彼無賴惡豪見地方官之疾惡富民如是也必將乘官之勢以施其欺訛假官之威以肆其魚肉富民之性命家財已幾幾不能自保彼又違置買物產服買放錢以冀日後之利哉如此辦法該縣將來必多搶奪之案搶奪一開其風不可驟遏富民懼不敢動則貧民之財之來源旣絕而四遠糧販又因地方不靖裹足而不敢來將該縣之米糧日少糧價益增而紛紛無數貧民遂盡入死地矣查該令去年到任一稟稱勸諭富戶各保各村業已將威福之權全授之無賴貧民恐開地方亂衅今復如此飢黎尙有生活之望乎

官糧局非不可設紳富捐糧亦非不可勸但須好爲開導使之樂輸若如此苛派勒捐而又動輒稟革訓導干總以肆其毒虐百姓之威不特不能准行并勒限該令將業已羈押各富戶立即釋放與以體面令其回籍安業倘該令竟敢倡率貧民搶奪與邑富戶一俟案有端倪定將該令奏參治罪良以此次該令之罪實倍重於牛訓導温干總也爲官治民不論貧富祇留問其犯法不犯法不必吹求其慳吝方爲公允且近在咫尺不先稟請訓示擅作威暴以激動一邑人心之怒待至事已決裂而又以兩稟欺弄上憲自爲地步殊屬可恨倉穀一節飢民既待哺嗷嗷准如所稟酌量動用以濟米廠之需但須實惠及民不

可縱令胥役家丁絲毫侵吞剋扣仍將動用石數及散放章程隨時具報查考本爵部院不時遣人密查該縣從前糧局既屬烏有子虛若再於倉穀稍有弊端定卽嚴參不貸

管帶練軍葛鎮稟爲朔州請兵急迫帶隊前往由

練兵原以鎮壓地方護衛百姓無論何處有事一經得信卽應
星夜前往以期及早撲滅而免擾害且近在百餘里外營中理
宜常有偵探先行具稟報院能六非安分之徒上年曾飭該鎮
前往查辦該鎮不得諉爲不知此次聚眾滋事地方官備具印
文移請該鎮撥兵該鎮乃不迅速前往猶謂爲恐或不實何其
所見之謬復據該州飛函告警營探回報屬實乃曰未奉院飭
不敢擅動託詞尤爲荒唐再據姚牧函告情詞已極迫切且云
城垣可慮始令兩哨並馬隊前去而該鎮仍復安坐不動幾忘
其爲當勇出身忘其應打仗救民性耽安逸膽氣恇怯已可概

見該鎮向來勇往可嘉而辦事明理非其所長此本爵部院所深知者以爲人甚結實昔年能耐勤勞今當有餘勇可賈不料保至提鎮身膺統帶遂沾染無用氣習一至於此該軍挑練數載每年糜銀數萬餘兩駐紮北路距朔州近在咫尺而平日往來需用車馬無一不取之民間此次坐視熊六滋事擾害鄉村任聽地方官羽書告急而莫之援

朝廷設兵之謂何該鎮有何面目以對百姓耶昨據朔州來稟當經五百里飛飭該鎮自行酌量或率馬步三營前往俟朔州事竣再令易副將前赴歸包嗣據該鎮來稟又復明白批示各在案大同所屬現極安靜所稱畱四成隊伍仍在各防加意巡

查此等搪塞之詞豈足以欺惑眾人耶仰卽督率全隊星夜馳赴朔州遵照前檄會同姚牧等妥爲勦辦毋得稍涉遲緩探稱熊六聚有二千餘人定係鋪張其說就令屬實無非饑餓烏合之眾斷無槍礮器械未必能與官軍惡仗該鎮毋庸疑慮必需督率弁兵將該犯盤踞處所扼要紮定斷其出竄之路使賊黨不得出而掠食容易制勝仍剴切出示曉諭解散脅從不難一擊卽散而首犯可望就擒矣惟稱匪黨潛行進城者已有一二百人姚牧守城之疎忽已露端倪應卽先行搜查以清內患總之文武官僚和衷共濟一一妥爲商辦斷無不了之事倘或推諉有意違誤恐該鎮與姚牧均不能當此重咎也切切

統帶練軍萬鎮稟逆首熊六盤踞情形各營一律進城由熊六盤踞高山恃險固守其黨無非饑民計圖搶掠其器械必不齊全其心志斷不堅固附近村莊畏其兇暴勉強隨附未必甘心從賊官兵既至良莠尚易分明良民方恃官兵以無恐又誰肯舍身家性命而與官軍相抗哉如果辦理得法百姓斷無始終爲匪之理該鎮審定地勢度量情形謀定後戰尚係老練辦法但主意穩慎站定脚跟卽當鼓勵士卒奮勇前進一戰作氣挫賊兇鋒則搗穴擒渠當如探囊取物若再畏葸遲疑被賊能料我軍動靜遂益猖狂而無忌憚矣兵貴神速又貴出其不意攻其不備該鎮昔年南征每遇大股悍賊壕深壘堅鎗礮如

雨何等盪決無前一攻則勢如瓦解此次熊六初起之徒號召
饑餓烏合之眾赤手空拳斷難抵禦有用之軍該鎮以馬步千
人又有撫標練軍兩營由甯武繼進何患熊六不就擒耶倘以
遲滯不進竟令免脫或傍溢肆竄恐該鎮後來難當此重咎也
仰卽會商吳守恰中機宜設法迅速殄滅毋稍疎懈是爲至要
並將此批分送吳守姚牧閱看

葛鎮朔州姚牧會稟勦匪獲勝由

閱稟慰悉熊六等謀爲不軌僭用黃服雕造僞印糾集無賴匪徒千人倏忽叛逆竟敢蠱惑饑民千餘人相從爲亂恃險盤踞肆意搶掠焚燒又復分路抗拒官兵圍攻盤道梁傷亡外委二名兵丁數名兇醜愈肆似此罪大惡極亟宜駢誅幸該鎮從容佈置一戰而搗巢穴殺斃匪黨四百餘名生擒首犯熊六殷興世二名餘黨四散地方因而又安辦理悉協機宜具見調度有方勇氣百倍以未經戰陣之兵該鎮親率前進踴躍用命足徵平日訓練成效殊堪嘉尚仰卽會同姚牧將首犯熊六殷興世等訊明錄供通報梟首示眾其餘未獲要黨及熊六之子迅速

搜拏懲辦毋畱餘孽是爲至要至於迫脅饑民並非甘心爲匪
之徒准其分別保釋責成朔州甯武牧令交保甲族長管束不
准出外生事所有陣亡受傷兵丁悉准造冊彙報照章給予卹
賞以示體恤

候補知府張守稟委員接辦獲鹿轉運事務以聽便候查

辦由

查前據報獲鹿馱脚甚少欲於平定設立分局復因窒礙難行是以由捐輸局飭派黃令家楨帶同陽曲脚戶前赴該局包運糧五千石赴什貼交納並令該守督同局員將存糧陸續全數起運係爲廣籌運脚多多益善起見然仍以該守所辦督運爲大宗原期糧米多運一石即可多活十數命早運一天即可早活數十人以解饑民倒懸之急凡此苦衷該守所能相喻於不言之表也茲據該守稟請開去差使查該守自到獲鹿以來晝夜辛勤任勞任怨不特一塵不染百事具有成效亦且卓著頌

聲乃重以自責曰聽候查辦本爵部院祇有倚重委辦之意絕無顛倒是非之說豈該守將批札中詞意誤會耶抑別聞無稽之言不敢毅然任事耶若以批中意氣用事一語則朋友尙有切磋之義同官爲僚豈無互相勉勵之詞况學問旣深意氣自平凡學古入官治民辦事者均應克己以治一時之怒惟平心靜氣斯足以宏濟艱難獲鹿米糧擁擠祇恨脚力之少不嫌分運之多該守恐上司見疑而先存退志其如飢民盼望糧米早到何黃家楨祇有分運五千石之責該守總握全局不可自啟疑端轉致運務停滯所請應毋庸議仰卽遵照疊次批札俟黃令帶同脚戶至日卽於存糧內撥出五千石交令分運其餘各

糧概係責成該守督飭局員儘數源源速運是爲至盼

候補知府謝仁溥稟稱祈禱雨澤十事由

神之爲道尊而不親古者祭有常期不敢數舉以疎爲敬祭天以特牲祭山林川澤四方百物以埋沈醢辜薦腥而不薦熟以簡爲敬皆所以尊異神明固不敢頻數以相干尤不敢瑣屑以相瀆也所陳禱雨十事自建壇誦經設神牌辦旗色以及慎選僧眾擇用道童諸般祈禳之法至詳且悉條理井然足徵愛民發於至誠值此艱難危迫之秋意在爲民請命洵屬可嘉但如此布置則挑揀演習非晉省之所易籌旣需時日而後成又非旦暮所能集且令每戶各出一人早晚赴壇焚香三步一拜若出自各戶禱切之誠則可若地方官竟以此垂爲憲令則不可

經云敬鬼神而遠之又云禮煩則亂事神則難又曰天道遠人道邇吾輩於此祇宜自盡其心安能舉千門萬戶之心而盡糾之哉來稟固云至誠感神矣我之誠與不誠與神之格與不格均係夫人事之得失不係夫禮數之繁簡連年荒旱乃本院德薄不足以感召天和非事神不虔之過尤非晉民事神不虔之過也何敢尤人以重吾罪過焉

神池縣稟訓導吳桂南攔輿辱詈請撤省查參由

查該縣因隣封滋擾撥兵募勇守門自應嚴於啟閉以免匪徒混入訓導吳桂南豈無守城之責乃將眷屬避居城外卽欲仍回城內亦應於白晝進城乃於定更後扣關欲入已屬謬妄輒挾不爲開啟之嫌伺赴

文廟行香將該縣補服朝珠拉毀復用石將轎打壞所稟如果屬實抑或別有緣由該縣有無挾嫌妄稟均未可知官箴所係斷難縱容亟應查明深究仰布政司會同按察司委員行查切實稟復然後將該訓導撤任委員接署是否該縣田令處置同寅未能和衷致招橫逆之侮或平日立品有不足以見信士林

之處雖經因病乞退已委員前往署事均應查明確情據實詳請參辦以肅官常

獲鹿局委員張鵬稟設法起運賑糧並請嚴飭應賑州縣

備脚逕來領運由

據稟及另單均悉轉運艱難固由於脚力稀少第該局現在積糧將四萬石未到之糧尤多將來日積日鉅賑務完竣作何安頓該守專司其事豈可不謀一策不置一詞此次所請待賑州縣自備脚力前赴什貼領運一層查此項賑糧大半轉運省南各屬節經運至什貼平遙平陽該州縣尙且無力來運豈能千里而赴獲鹿承運乎如果可以辦到早經通飭各屬照辦何待今日此事之窒礙難行者也前飭練軍幫運明知無濟然以理度之似不至於有碍仿如蟻拖一粒聊以輔馱力之不足而已

茲據稟稱自分段設卡以來節節招留脚戶來獲益少驟驢抵
有此數練軍能運該局卽不能運該局能運練軍卽不能運是
練軍不惟無益而反有損於該局之運也細繹來稟直若如果
練軍不運則賑糧無虞積滯也者該守若確有把握仰卽明白
稟覆不獨將練軍可以星夜撤回卽新軍駐紮幫運一層亦可
不必辦理特恐非盡事理之實也該守讀書明理有素仍應縷
晰詳稟以憑核奪辦理切勿過於拘慎茹而不吐爲要

署解州馬牧稟境內罌粟禁絕現禁開設煙館並請停免

貼釐由

查晉省各屬於抽收坐賈釐金之外向有膏釐一項誠恐民間以膏釐未裁禁止罌粟有所藉口業經札諭籌餉局通飭所屬將抽收膏釐卽行裁去其行商坐賈外來藥料與本境裁種罌粟無涉仍應照常抽收以清界限在案仰卽遵照前札辦理至民間吸食鴉片錮習旣深愈禁愈甚卽如一家之中至親莫如骨肉一室相處終歲相守而竟父不能禁其子兄不能禁其弟夫不能禁其妻賢師亦不能禁其弟子舉世滔滔靡所底止又如一署之中吏胥官役半皆以此爲癖革去一吃煙者又一吃

煙者踵至試問今之天下有一賢者能禁合族之人乎有一良吏能禁合署之人不犯此弊乎有諸已而無諸已而後非諸人今吾輩不能行此令於一族一概行於所治也賢有司熟悉地方情形欲挽積習如握原可俯如所稟酌量辦理若便欲垂爲典章萬一其人適滋擾累使民間室家雞犬不甯且恐激生事不深思遠慮至請發告示一層各處地方情形各有該州自行出示曉諭大禳之後子遺之民氣息奄奄毋使胥役人等借端殘擾轉爲地方之害該牧洞悉年矣切宜慎重爲之毋負期望之殷是爲至要切切

榆社縣樊令稟覆所詢各條事件暨現在籌辦各事由

該令勸諭鄉眾幾於按日程功脣焦舌敝但教民之道須以政刑爲實際未可僅以口舌爲功勸諭止可以教良民若桀鷲頑梗之徒則非威嚴並用不足以靖其凶燄以德服民豈易言耶嚴察胥役使之不得苛索舞弊果如所言能使胥役生畏則惡豪之不畏者寡矣能使胥役不敢擾民則凡事之擾民者亦寡矣詞訟隨到卽審及早結案果如所言兩造不至羈留守候蠶役何暇勒索刁難所議救荒二法尙屬可行但小民可與樂成難與圖始苟非地方官實力督勸久而弗懈恐不能成前一法用意良佳然恐捐糧不能如許之多村有小大富亦分差等一

村富戶之存糧卽令埽數出之未必足供一村貧民之食況止
量捐少許卽支分一二次尙虞不足又能收存以備下月之用
乎惟以卹民爲心痛癢在抱一日在官辦一日之事盡一日之
職居之無倦不言效而效自呈矣毋託空言斯爲實際

山陰縣李令稟遵照札詢事件謹就情形分別開呈請示

由

到任未久所述川原道里形勢土宜民俗及地方困苦凋敝情形於民事尙克究心派教師兵役送差查夜並添做各城門門扇及兵役駐守小房於弭盜頗知畱意是誠當務之急時值大纒奸宄最易煽動稍一懈弛卽恐有萑苻嘯聚之虞周禮十二荒政所以終以除盜賊也社倉之在民者最不宜官爲經手一經辦成卽宜聽民自爲雖久後不能無弊其弊較少若令事事稟命於官則權歸胥役擾及閭閻得不償失一定之理至該縣鄉約一節向係按月輪充該令欲改爲按年輪充自係爲辦公

起見但來稟既稱村小戶稀貧多富少充當鄉約地保有害無利率皆視爲畏途則是輪充一月民已畏之若復令終年充當則其害不將愈甚其畏不將愈深乎此事必先使民無害乃能使民無畏果能使民無害無畏則一月一易可也一年一易亦可也否則地方官之德望既尙未能感孚於民而遽下更張之令恐民不知官之是何命意狐疑觀望嘖有煩言勢所不免此似小事亦民生利害之所繫闔邑口碑之所關不可不慎也仰再酌奪爲要

蒲縣鄧令稟接奉札飭謹就管見所及條陳籌辦由

治民如治家斯不愧民之父母可謂要言不煩引周官荒政十
二曰除盜賊並引鄭注不可緩刑故縱之語尤爲當今第一要
義鄰氛之不靖正由緩刑故縱來也智勇之士百不一覲命世
之英旦暮難遇此論則未可爲定評淮陰侯釣城下之時誰知
其他日有佐漢之功斬王爲邏卒之時誰知其他日建中興之
業自古豪傑當其溷跡齊氓亦齊氓而已固非有三頭六臂使
人一望而卽知者編查保甲則宵小不容嚴拏窩戶則奸宄斂
迹一以清盜源一以除盜藪皆古人治人當治其首事當治其
原之意所舉賑卹諸法大半可行惟稱增價招商平糶濟民此

雖趙清獻越州之事而不可行於晉省之今日爲政者斷不可失信於民此法近於詭譎已非政體且慮可一而不可再能暫而不能恆外糧雲集之時糧價頓減善矣然糧價減則糧商無所獲利且或虧本彼知爲所賺以後必將裹足不來卽再懸高價以招之彼必不信恐境內之糧一盈之後將永歉一賤之後將愈貴矣糧價之貴賤乃時勢使然非人力智術之所能爭強抑糧價固恐外糧之不來故增糧價亦慮再試之不效清獻此法意必在青黃不接之時偶爲一試迨糧將復貴而新穀已登故其術尙屬可行今連年荒旱小必需糴之日方長卽能使糧價暫時輕減亦無益於事况一經輕減之後將有大不輕減者

在乎古人用法皆所以用法之意往往史冊止載其法而其意不傳仰再以意逆之辨賑一節尤宜盡心勸民紡織種藍告示及小兒痘方如能著有成效則衣被斯人保赤誠求可以踴躍
滿志

壺關縣鹿令稟遵札就地方情形議條呈送由

挖濬西域外土池既資綆汲且令無食貧民得以借工餬口辦理尙屬得宜賽會演戲糜費者皆富民之財於貧民無損貧民且得於戲場小作貿易借以謀生故演戲賽神最爲艱苦小民之利該令禁其演戲將各村社舊存經費及新斂錢文買穀存儲以備凶荒之用如果能辦好則貧民之獲益尤多可謂善於變通但此項存穀不必復加以社義倉名目緣社義倉頗有流弊民多畏之且宜聽民自爲地方官不可爲之經手官一經手則胥役得以藉端肆擾爲利有限爲累無窮反不如聽其賽會之爲愈矣勸諭各村社辦理民團自衛邊界如果辦有成效可

免盜賊之虞但來稟有人心惶惶之語恐今之所慮非僅盜賊
已也時值凶荒奸民最易煽動倘地方官意存姑息稍事遷延
卽恐滋蔓難圖釀成地方之患陝省韓城縣優人聚眾之事其
前車也雖饑民烏合未足爲憂然不可不預防之其餘各條尙
識大體

清水河通判恩倅稟蒙札詢地方情形據實稟覆由

該倅所答於地方情形尙能周悉倡捐糧米擇貧撫恤又復捐給籽粒民間藉以耕種頗能顧卹災黎惟稱冬春之際鄉間有不法之徒糾眾強借粟糧此乃亂根所伏所關匪細該倅分別嚴挈枷責鎖絆辦理尙屬得法現在陝省韓城界內饑民肆擾嘯聚千人未嘗不因地方官失於姑息不及防患於未然遂致紛紛望屋而食此雖烏合之眾容易削除然有地方之責者不可不以此爲殷鑒也至淤復地畝一節言之殊欠了了既係歷屆報荒奉准豁免之地則與現徵地畝無干何至有累現在額徵之糧且既議清丈卽須升科該倅於此項地畝係自何年淤

復坐落何方約有幾多頃畝或係有主無主並未一一指明而但稱淤復堪種堪乃僅可之辭是尙未成膏腴此日之奏請升科雖易異時之顛懇豁免甚難遽議清丈殊嫌冒昧來稟旣稱連年歉收人心思去未便舉辦應俟連年豐稔之後周歷履勘認真察看如果係已成膏腴且爲地甚廣必須升科以杜爭端方可丈量辦理現在歲荒時艱不得縱令家丁胥役向種戶索取分文致干察議切切

綏遠城同知覺羅丞稟地方情形請查核由

該丞管理支放駐防兵餉二里十三戶應徵糧石並旂漢蒙民一切案件責任匪輕而於弭盜一節尤宜加意口外馬賊游勇聚散不常時值大稔此輩尤虞煽結况該廳遠處晉之極邊毗連察哈爾地界亂山叢雜倍易藏奸倘非嚴密稽查難保無莠苐之患現在陝省韓城界中饑民蠢動此雖烏合之眾不足爲憂要不可不引爲前車之鑒民間或有糾合多人強求硬借之事便須痛爲懲治以遏亂萌否則此端一開惡豪成羣而起又將蹈覆轍矣可不懍歎切切

平江府志卷之四十五
名二

三

大甯縣崔令稟遵札稟覆教養宜亟催科乏則敬陳管見

由

恩惠兩字文皆從心未有無實心而有實政者未有無實心實政而能使民沾實惠實恩者蓋有實心則視民事如家事視民間田里樹畜詞訟盜賊之小事悉如創鉅痛深附骨剝膚之大事故所以經營其事者不遺餘力所以規畫其事者不遺餘策必期至善盡美實實有裨於民而後慊於方寸斯不必市惠市恩而所以造福於黔首者固已多矣來稟稱興養立教隨時盡心與百姓相信以心此雖未可易言要於實心實政之說尚有體會又稱藉小懲爲大誠弊去其太甚不爲已甚不以苛察爲

能催科非其所長撫字不敢不勉等語悃悃慈祥之意溢於溫語之外但治不貴暴而貴猛法不宜苛而宜嚴時值大稔尤不可以姑息仁柔長宵小跋扈鴟張之志此輩小有不法卽當立予痛責以儆其餘庶地方可以安謐其餘各條辦理尙稱妥帖惟冀以所稱盡心二字實實見諸施行毋託空言是爲至要

長治縣袁令稟遵陳興利除弊各事宜由

勤理詞訟非僅免兩造之羈押省衙臺之需索已也詞訟理則
是非明賞罰判良民知所趨向惡類戢其兇頑民間之怨氣一
舒天地之祥和百集故詞訟之教民其功捷於學校也胥役慣
以斯民爲魚肉凡地方妨民之事半由此輩生出嚴束胥役最
是爲民除弊下手緊要工夫地方官安民之政雖有多端而此
二事則極爲切實者也至於弭盜賊懲強暴於荒年尤爲切務
稍或寬容卽恐奸民結隊橫行釀成巨案該令乃置數者爲後
圖何也來稟拳拳於勸民種桑蠶桑本興養之要務惟復之於
久廢之後亦殊非易近年所辦綢絹悉以市價購買係因本境

產絲無幾買之他境不得不然若本境產絲官役之勢力不能行於他境之民獨得行於本境之民則因公苛斂勒價強買之弊又將逐漸而興民感於舊說既入目堅未可盡以斯民之過慮也該令既欲興復蠶桑先須將此道破使民知日後可有無限力作之利必無百般苛斂之害或可底於有成至牙稅一節言之痛切淋漓如係實在情形自應量予變通以蘇民困但此項牙稅應由藩司主理未便以一紙單稟遽蹈侵職之嫌應俟將各稅應免應留逐一查明照例詳請藩司核准辦理方成政體仰卽知照

大谷縣張令稟覆奉札籌議地方應辦事宜由

廢弛二字乃近來之大病法制弛而因循頹惰妨民之事日多政刑弛而盜賊奸宄憚之情日少又且泄泄沓沓公事顛頂官常骸髀禁不期其必止令不期其必行徒有紙上之虛文更添格外之枝節以致有弊無利有名無實此正有志者力圖整頓之秋也來稟稱地方應辦之事積習相沿多有廢弛既已洞見其弊自當力爲湔除能爲地方去一件弊端卽爲窮黎添一分活計地方有一分起色卽可規官吏一番精神此皆在官者平日矢以實力之成效也民有素習不端曾經行竊者則爲另戶責成保長隨時稽查恰符古者移郊遂之意身與良民區別

則愧恥易生法有地保鈐制則畏憚滋甚處置頗爲得法四鄉
派撥路捕分段巡查何路失事卽提該路捕役嚴懲勒限比緝
各有汎地各專責成勤者不慮他人分功必樂於見長惰者難
藉大眾諉過亦責無旁貸馭捕之術最協機宜倘遇因饑生事
恃眾逞凶之案尤當盡法懲治不可稍涉寬柔其餘條陳各節
均識大體勉之無倦

河曲縣恩令稟覆遵諭覆陳地方情形辦理由

該令以團練之義行於保甲之內自云部署森嚴欲使鄉丁盡成勁旅談何容易能如此者洵可以禦盜矣是之謂體用兼備求之於古不可多覩矧今日乎吾竊慮其能說而不能行何也禦盜與禦流寇異流寇之來貧者卽無家財亦有老小卽無老小亦有身軀故其懼流寇之心貧與富同而其禦流寇之力亦貧與富一此團練之所以易成也若禦盜則不然盜劫皆擇富家不及貧戶富者旣不能盡貧民而養之而使貧者冒竿槌之險爲富者守財是貧者所不樂爲貧者旣不樂爲而令富者製器械備燈鑼先耗無益之費亦富者所不樂爲况時值大稜民

方朝不謀夕而又使之紛紛設局紛紛攤資此民間之所萬不願者未有強民以所難而可幸其事之有濟者也然則保甲不可行乎曰否周禮族師五家爲比十家爲聯四閭爲族八閭爲聯使之相保相受此後世保甲之祖但其時井田未廢無人非兵且貧富相等故相保相愛其令易行今欲施之大相懸殊之世則難矣後世保甲輕於防外盜而重於清內盜蓋以里閭相熟之人察耳目最近之事聲息易知踪跡難掩十家有盜則治盜而並以失察之罪責其甲長百家有盜則並責其保証一鄉有盜則並責其保長保長等懼盜之爲累自不敢包容徇隱自取剝膚之災於是比閭族黨無往非誥盜之人而盜又何所容

其身哉該令知言保甲而不知保甲所以清盜源之意竊恐生
事擾民地方未能受福一身先已蒙垢可不懍歟其餘各條尙
屬妄叶然亦以切實爲妙非空言所能濟也

河津縣趙令稟麥收不至成災無須賑恤由

該縣目下情形尙不成災無須賑恤閱之慰甚惟稟內臚列多語有切中肯綮者亦有不協機宜者爲政不難不得罪於巨室所謂巨室非盡世祿之家也積貲富厚亦謂巨室可以德感不可以術愚可以理服不可以力制我之所爲彼之所不願遇事或起而操其短長亦勢使之然也該令於賑務書院辦理尙屬得宜惟所稱五毒瘋狗等語此等積習處處有之但若輩具有天良要在官之平日有以服其心而後臨事可以關其口固非如椎魯愚氓可挾官之勢力威權迫而脅之也且小民至頑而易感亦至愚而難欺官果有愛民之心往往一言之善閭閻互

相傳頌志之不忘官苟無爲民之心雖曰日與之言興利除弊而民終莫之信知其口惠而實不至也此豈盡民之無良哉蓋民之感恩感在上者惻怛之寸衷而不能感口說之德政且不能感心圖便己而不便民之政耳縣令爲一縣之主當平民與民之紛爭長官爲一省之領袖當平官與民之紛爭祇問理之是非事之曲直情節之實在心秉大公無所左右固不能優容宵小長衿棍之刁風亦不能袒護官員滋地方之流弊惟能小心謹慎潔己愛民者不獲罪於窮黎卽當書之上考若一味蠅營多方掩飾終難問執一邑具瞻之口其餘另行歸案查詢可也

靜樂縣李令稟覆管見所及暨現辦各事由

該縣春秋雖屬歉薄尙未成災且地方安謐閱之慰甚所陳辦賑諸弊切中事情惟稱或派親信家丁或遣可靠幕友挨村稽查等語此則甚非辦賑之法幕友各有專司辦賑非其責也既非其責難望任勞至於家丁品類難言之矣一到鄉間尊如官府民間之有氣節者不願與之接談好逢迎者或相與朋比射利卽其家丁之安靜者誰家極貧誰家次貧誰家丁口多少彼一概茫然誰肯以實告之不過聽鄉保之任意舉報而已鄉保弄弊之滑手與衙蠹略同勢必妄報貧戶捏增丁口以賄賂之有無情面之淺深定手之上下以此辦賑欲其無濫無遺難矣

辦賑之法非用紳士不可紳士非必世族大家也卽山僻小村亦必有一二素有品望爲眾所推服之人官以其事鄭重而屬之各紳士各紳士又慎擇而責之次等紳士次等紳士又各擇又次者一二人或三四人爲之副若網在綱遞相鈐制於是各村各里皆有三五賢能爲官辦賑之人以彼聚廬而處貧富丁口無不周知且其人旣爲眾所推服大抵有才有德自顧體面者居多爲名之心切於爲利一經地方官以賑務委之則莫不以爲至榮而樂爲盡力此人情也官每下鄉又常召其人而見之優以體貌諭以大義怵以賞罰證以保甲地丁底冊則所報之極貧次貧丁口無可冒濫遺漏之虞至於放賑亦卽令各紳

士如式爲之管但挈其大綱職其稽查而賑務已可不勞而理
蓋紳士乃官民之樞紐上下之關鍵官與民遠紳士與民近官
與民嚴紳士與民狎官與民不能時時相見紳士與民得以時
時相糾故民之信紳士甚於信官非獨辦賑也凡官有爲民興
利之事但能使紳士爲之實力倡率則事無不行昔賢凡宰一
邑必有兄事友事多人遂能不下堂而治蓋以此也其餘各條
尙能洞達民情勉之無倦

曾忠襄公撫晉批牘卷四

右玉縣李令稟現已籌辦各條及籌辦而尚未舉行事宜

由

所述土宜民風皆能深察其所以然足徵畱心民務車差一節
辦理甚好以善會演戲之資購存糧食備荒勸學變通亦叶機
宜惟此項存糧不宜復加以義倉名目緣義倉頗有流弊民多
畏之至所稱地在右玉境內而租歸左雲大同交納此似有弊
而實則非弊竇之所關如右玉某甲舊有右玉左雲地各一畝
其右玉一畝輸租右玉左雲一畝輸租左雲其初原如此也迨
其後某甲將右玉一畝賣於左雲之某乙乙以隔縣納租多有

不便遂兩相商同所買雖係右玉之一畝而反過割其左雲一畝之租以圖彼此納租兩便於是甲之舊有左雲地一畝反輸租右玉乙之新買右玉地一畝反輸租左雲此租地互易之由來也歷年既久其地輾轉典賣不知更易幾主遂致地在此縣租歸彼縣地在彼縣租歸此縣習以爲常凡兩縣交界之處往往有此不獨該縣爲然也軍地糧地之互易事同一律此事雖似不符於例然於各縣各營之正供實未嘗虧短分毫

國計民生兩無關礙若欲徹底更張俾地租各還各營各還各縣恐相沿已久反多找算不清不如聽民之便可耳又稱有地屬他人而糧未隨帶者此弊固由於狡猾之民賣地不賣糧買

者利其無糧而多予價值賣者得重價其初一二年尚照舊完納欺給掩飾繼則甘爲逃丁絕戶然亦未嘗不緣印官而生也蓋民間買賣地畝一經過割則須印契印契則須納稅自地方官習爲貪墨印契之稅有重至三四十分者民畏稅契之重故往往買地不買糧亦有買地數年尚不詣縣過割者如能於此項契稅遵奉例定之額則此弊較少矣又稱稽其冊籍皆非的名此弊則緣房書而生蓋小民更替戶名必須房費往往房書索錢數百而始爲之更替一名貧民惜此小費遂有永不更替而沿襲其數世之祖名者雖非本丁之的名實其先人之名但查魚鱗冊上糧數之符不符不必問其名之的的不的可也如

能使房書不索此費則此弊亦少矣前懇酌留釐金以工代賑
一疏未荷

俞允該縣城廟各工若能自行籌款出於民情之所甚願則可
擇要興修否則俟諸異日可也丁糧一節如果實欠在民應俟
詳請到日再行飭司酌度定奪辦理

垣曲縣綬令稟遵札 覆情形由

該縣自五月至今竟無點 實乃非常之變該令於通飭各條未遑縷答止反覆以辦賑救荒一節具見先其所急惟來稟稱連年欠收小民易生閒衅後又稱惟盼甘霖早降得種麥苗民心似可稍定等語似境內有人心邊邊朝不謀夕之狀夫時值大祲以明刑安富爲第一要義不明刑則無賴惡民乘災滋事而富者不安矣富者不安則相率飾爲匱乏不敢自挂有錢之牌以招搶掠之禍於是貧民有稱貸者彼不敢放也有鬻宅田者彼不敢買也以致遠近大小糧販聞風裹足不敢復來民間之財脈不通外糧之接濟又 嗷嗷眾口餓殍不愈多耶况不

能明刑以安富流弊無窮河西韓城之變一二日間屬集千人
地方官縱大慈大悲詎能不請兵剿捕始則姑息縱之繼則駢
首誅之尙暇與鵠形菜色之氓徐議賑卹之典乎防民宜防於
其漸遏亂宜遏其未萌仰卽加意防範

代理歸化城蒙古民事候補府玉守稟遵札辦教養事宜
並陳地方情形由

三代而上民間田里樹畜之事皆上爲之謀三代而下民間田
里樹畜之事皆民自爲謀今之所謂養民者不過撫而綏之以
不取爲予以不擾爲安使民得以自遂其養便是善政所稱別
無養民之術惟期不奪民之養而已固通達治體之言但不奪
民養亦非易易差徭科派詞訟牽連皆奪民養之事也胥役刁
難豪強訛詐皆奪民養之人也苟非地方官勞心撫字而區區
脂膏豈復爲窮黎有哉全在以實心行實政不徒以空言塞責
斯得之矣來牘厯言地方教養之難指陳剴切邊外荒略情形

儼然在目舉行守助部署亦尙整齊選派幹役添練勇丁令其
巡防道路護衛餉糈勤於弭盜爲邊域第一要圖今冬乏食貧
民什伯於往歲若不早爲之所恐飢寒交迫地方難望安靖思
患預防尤爲當務之急該所爲西北各部落台站往來孔道客
民雜處奸宄易滋况連年荒旱民爲飢驅若非預爲之防恐土
棍游勇難保不乘機滋事陝省韓城蒲城之蠢動其前車也致
治必遏亂除莠乃安良仰卽嚴密防範爲要

鳳台縣賴令稟遵官札詢各條由

該縣自春徂秋未得透雨秋禾漸就枯槁竟成非常之災該計應賑人數與倉穀石數計口勻分先將應賑戶口穀石榜示各村令公正紳耆領回轉給貧民辦理尙稱妥協訪知無賴棍徒各姓名榜於通衢俾此輩畏威歛迹處置亦頗得法惟稱曩者該縣鐵鑪生意最多後因外商來澤買辦鐵貨鑪戶往往用其銀兩交貨不足以致外商不來鑪戶歇業者十居八九該令欲傳喚鑪頭諭令復業用意良佳但推歇業之由止歸咎於各鑪戶之交貨不足似不盡然鑪戶旣以鑪爲業豈肯自壞門市作他家驅爵之鷓且外商攜本而來交貨不足豈肯甘心應允豈

能不控告成訟此亦情理之未必盡然大抵生意歇業時勢居其半人事亦居其半東南大亂之後人民較稀所用物力較少此時勢爲之也人工草率物料不及從前精堅遠方之客不至亦或有之否則民間有利之事必爲奸胥蠹役所垂涎往往以稽查爲名假公濟私百計阻撓諸多掣肘故民間欲爲之者必須將衙門內外人等各予以年例規費而後其事得行迨其事行而其利已無幾矣又復多爲名目橫添枝節俾規費年增一年非但賸其脂膏必使之削骨見髓而猶噬吮之不已小民歇業之由於此者或亦不少該令欲興復鐵鑪尙須體察前項情形其由於時勢人事者非賢令尹所得而主持也如或從前

有所謂規費之類設法裁汰俾窮商一無所累則鑪戶可望復
十之四五如其不能則反復開導之勞適爲奸胥蠹役興利而
已雖家論戶曉彼小民欲食力營生乃無厚利可圖豈能聽乎
其餘各條尙識政體募勇晝夜梭巡稽查匪類尤爲當今急務
仰卽嚴爲防範以弭亂衅而安地方

五台縣孫令稟遵札籌辦條目開摺請示由

司民牧者當存愷悌之心視民事如家事其言藹如不愧慈惠之師化民之道在力行不在多言布政聽訟以忠恕爲要道語皆精當至稱該縣士子一博青矜多有包攬詞訟擬擇品端學優之士給匾獎勵以爲矜式又將各鄉惡少姓名劣迹隨時訪實登記簿籍俾知警懼旌淑別慝尤足以褫其魄而寒其膽蓋好善之切者惡之必嚴地方官以品端取士則士之無品者羞士之不端者懼而刁生劣監敢不斂迹者寡矣奸民之所以玩法者蓋因平素積惡非官之所知故能顛倒是非淆亂曲直橫行於鄉曲一自昭然注其姓名於籍則罪狀已露雖有險健伎

爾無可逞其狡謀若輩自蟄伏而不敢動矣夫除莠乃可以安
良致治莫先於弭亂來稟稱收成連歉竊案滋多因欲力行保
甲以清其源雇募教習添設狀丁選汰捕役以遏其流防患未
萌尤爲當今第一要務其餘各條均識大體惟冀身體力行毋
以空言塞責是爲至要

岳陽縣張令稟遵照札詢地方事宜逐條登覆由

教民植桑種綿紡織指示不厭其詳開導不辭其瑣頗得耐煩
兩字訣爲政患恃才理訟患偏執立異矜奇百得不無一失假
公濟私心偏焉得事正己先不平政烏能平己自無理訟烏能
理自是平恕小心人語自箴十失一失於無才二失於恃才三
失於任氣四失於任意至不納正言好聽媚語遇事推諉一意
懶惰執迷不悟一謬到底此尤當今州縣通病果能於數者痛
自鍼砭則所謂循良者基於是矣但馭民之道待良民宜寬馭
匪類宜猛疾惡如仇方能愛民如子施吾辣手乃得盡吾婆心
來稟於剔奸懲暴一節言之特略不知牧馬去其害馬者馬始

蓄牧羊去其害羊者羊始生時值大稜奸豪尤易蠢動思患預防莫急於此至外境流民宜略給資糧急遣之各回本籍前已有示通飭想能遵照辦理

薩廳文山稟覆遵飭條陳各事及籌辦情形由

該廳瀕臨黃河所有脩堤築壩堵塞水口各工皆勢所不得不辦邊外文教未興勢同草昧創建育材書院及義學九處並捐廉建立節孝祠坊皆啟牖顛蒙之道設立保嬰牛痘兩局慈幼一節尙知畱心此外所答各條可稱該博惟所舉皆係古人陳迹而於該廳之士宜民俗地理情形及一切撫綏之術懲勸之方盜賊如何緝防訟獄如何清理辦賑救荒作何布置奸胥蠹役作何防閑稟中概未之及竟似自咸豐元年以來到薩二十七歲之久無一事者殊嫌言之不切爲治貴力行不貴多言願共勗之至剔奸懲暴條中稱治之於已然不若導之於未然所

論誠是但馭民之道緩則治其本急則治其標該廳逼近穆納
太青等山毘連陝省鄂爾多斯及烏拉特等旗地界地方遼闊
奸宄易生游勇馬賊不時爲祟值此連年荒歉之餘尤宜加意
嚴備庶地方可無他虞致治在於未亂防患在於未萌是爲至
要切切

豐鎮廳定福詳遵札查明地方情形暨籌辦教養由

詳語逐層皆到口外與內地原有不同概係實情惟所稱向無土著似該廳之民盡客民也查該廳原額徵地三千九百餘頃畝認種莊頭圈地六十餘頃畝有地必有業戶有業戶則萬家烟火田宅父傳之子子傳之孫耕豐之地納豐之賦卽與土著無殊又稱凡遇豐年民間始能交納錢糧竟似中稔之年民卽不能交納者亦無此理旣稱曰稔便係有秋而不能完糧誰其信之如民已挨戶完納妄希

朝廷蠲豁之恩例有明條賢者當不作是想也該廳地處邊疆游勇馬賊時常爲患值茲荒旱連年之後黃溢窪澤在在堪虞

畱心吏治者自當以弭盜卹民爲第一要務詳中却未之及而
惟惓惓不忘於錢糧據稱秋禾現在結實雖未能豐收尙不至
於成災中稔光景可想而知若因內地重災有辦賑救荒之舉
別存希冀之念致啟民間望澤之詞則以後無可措手也該丞
潔己愛民宜預杜刁猾之覬覦爲要

保德州朱牧稟垂詢各事宜分別條陳由

增設義學延貧儒教讀培植人才卽以濟助寒士一舉兩得辦
賑擇公正紳耆董司其事查明應賑若干戶每戶若干口每口
需米若干每日統共需米若干造具簿冊送官查閱仍督同教
佐各官分赴各鄉時爲稽查此皆辦賑之妥法又稱強盜棍徒
非盡法懲治不足以除暴安良疾惡如仇在今日尤爲當務之
急然賢者則以威整治地方不肖者往往借此以助訛詐惟聲
名不可掩耳該州逼近黃河爲秦晉往來門戶蒲城餘孽尙未
梟除飢饉之餘匪徒最易勾結黃溢萑澤在在宜防惟道不拾
遺一段稱有得遺失物而還之主者地方官賞給匾額獎以花

紅則道不拾遺之風不難再見於今日等語此乃想入冥漠胸
無書卷之談道不拾遺非有所爲而爲之也其時家給人足物
阜民康雅化敦龐淪肌浹髓非惟明於義而不動於利亦以足
於己自無貪於人此道不拾遺之所以稱到治也三代而下黃
霸守潁川道不拾遺劉矩令雍邱道不拾遺史氏極力誇美之
詞未可盡泥况其他乎若設法強爲鼓勵使之不拾遺而後已
則是有爲而然雖無拾遺之事豈遂爲吏治盛美哉末引袁簡
齋文於治獄一道瞭如觀火牧令事本繁劇惟詞訟乃總匯之
路處處皆可以通上理其能準此以治獄者誰乎如有斯人則
一切妨民之事害民之人自能滌除盡絕想該牧亦不過借此

爲美談而已勉之慄之

永和縣秦令稟遵札條覆地方情形由

末幅述災民困苦情形爲之惻然第恐內懷多慾外飾仁慈之言以給其上其實於民瘼漫不經心爲可憂耳又云自六月以來不時周歷四境冀以消奸匪之氣安百姓之心如此嚴防庶無亂民厲聚橫行之患又稱縣衙吏役魯鈍疲癯諸事掣肘不假以權勢不示以喜怒雖有桀黠亦將自守而不敢爲匪此層談何容易若輩弊竇熟滑有機卽入有孔輒穿辦公雖魯鈍而舞文弄弊則甚精能執役雖疲癯而枉法貪賍則甚刁健無論官之倚爲爪牙腹心也但使稍爲優容自謂不假權勢而權勢已爲彼之所移自謂不形喜怒而喜怒早爲彼之所伺僅止虛

與委蛇遂謂無柙之虎兇不敢噬人天下有如此衙役耶夫善愛民者必自嚴治衙蠹始若輩畏死畏革而不畏打其尤畏者在於本官清若神明古所稱官清吏瘦是也眾書役有弊必並其經書頭役而革之則人人自危大小相制衙署凜然其極惡者則予以重法施霹靂之威而後可以行豢養之恩但能使若輩生畏則一切訟棍土豪其不生畏者寡矣莠民有所憚而不敢爲則良民乃有所恃而不恐雖然非讀書明理之士不足以語此其餘各條尙有可採

應州知州吳牧稟覆檄詢地方事宜各條由

所述救荒之策法尙可用隨時督率捕官清查保甲畱心巡緝
尤荒歲第一要圖嚴以防之庶奸民不至勾結爲患良民之椎
樸勤儉如王理昭者遂爲飢民所垂涎禍且不測當是之時該
處不儼然一亂象耶其出糧五十石賑飢乃因官與飢民一氣
不得不藉此解圍非其情願以後勸捐祇可剴切勸諭使量力
輸將萬不可仍執五十石之說硬行催繳蓋時值大祲以明刑
安富爲第一要義安富非止爲富民計也縱貧民以擾富民則
富民之氣曰餒貧民之氣曰驕彼且謂官之所愛者貧民也我
卽稍有不法官必不我禁也官之所惡者富民也我卽取而瓜

分官必不我責也於是無賴兇徒羣起搶掠而地方之憂大矣
地方既各憂其憂邑宰豈能獨樂其樂乎縱無他處而富者已
日受貧者之魚肉必將不得安枕於是田產之價雖廉而不敢
買稱貸之息雖重而不敢放貿易之利雖豐而不敢爲財脈窒
而不通則餓殍愈多民生愈困自此以後將不可救藥矣該縣
或以田一畝易糧一斗或以田鬻人求斗粟而不可得者非該
令不能安富之明驗乎其餘各條尙識大體惟冀持以小心方
可冀保衛地方安謐無事至要至要

托廳常稟覆遵札查明地方情形及應辦事宜由

除盜賊爲十二荒政之一該廳遠居塞外轄隸三百餘村繞境三百餘里地方遼闊防緝尤爲要圖來稟恐飢民勾結惟稱北婁大石馬蘭胡峪等口以泉水流注開渠灌田上游各村遇旱則攔水專利以致爭競不已獄訟繁興等語此雖上游各村之咎亦其勢所不得不然旱年水旣無多非蓄之則一綫細流難資灌溉是攔之則上游獨得其利不攔之則上游下游均失其利其勢瞭然也欲均水利莫若使民擇地以鑿井開渠必須近水鑿井則無論近水遠水但使地非石底水脈不深則處處可行其利尤溥茲值荒歉連年小民之以傭工餬口者秋末

春初勢必坐困儻能推以工代賑之意勸令殷實之戶小康之家各僱貧民相地開鑿貧者既可少免啼飢之苦富者亦且永獲澆灌之資貧富兩益莫逾於此本院已有通飭諭各屬穿井以廣水利矣其餘各條均識大體

平陸縣魯令稟謹繹規條現辦情形由

通飭之所謂修理房屋非勸民營華屋也凡營華屋者用工匠多用貧民少正惟茅屋土垣則飢民人人得以做工卽人人得以餬口來稟因民間不營華屋遂以勸無可勸自封失救荒之指矣掘陂塘築堰壩大興水利其益較勸民修屋爲尤多但須志在必行而後事能有濟各村各自爲賑固佳然一委其權於鄉眾則劣監刁生皆得挾官之勢以快其讐怨土豪兇棍皆得假官之威以肆其欺訛而黨爲患諭飭城鄉集鎮於要隘處所豎守助大旂每夜按戶抽撥壯丁輪流支更巡查每五家插守助小旂遇警鳴鑼爲號並發給刀子等械以備應用布置尙屬

整齊但緝捕巡防未可一味倚諸鄉眾非地方官親爲統率則其志難齊非地方官常爲拊循則其心易懈逆計來年新熟爲日正長慎勿恃有守助大小旂幟遂以虛聲爲長策也飢民煽結需時日而後成非猝不及防之事當其勾結伊始黨羽未多眾情未固以飢病之軀則無力以烏合之眾則無謀但使稍聞聲息星馳往拏一聞卽散而後足以寒莠民之膽靖奸宄之心至農桑學校及興利除弊諸端地處遐荒奏功固非易易惟職司民牧當盡其力所能爲官府有一段措施地方必有一分起色尙望於一切能辦事宜切實舉行是爲至要

臨縣白令稟遵札舉辦並陳地方民情由

未有不能養而能教者亦未有能養而不能教者立論頗得體
要但養之一字固非易言無論墨吏之以小民爲几上肉也卽
如詞訟之株連役書之吞噬浮徭雜差之科派私規常例之追
呼民脂幾何而環而肆其咕囁者耿耿非一人擾擾非一事有
不朘削立盡者耶况時值大稔民生愈蹙土棍鴟張誰與豫爲
彈壓飢民麕聚誰與早爲防閑議賑議蠲是否人沾實惠放錢
放米是否弊絕漏卮儻以飢黎奄奄垂斃之餘生視如越人之
肥瘠漠不關心猶復浮開貧戶捏報賑期私徵錢糧乾沒賑款
藉萬家之凶歲成一己之豐年挖蒼生乞命之內醫衙蠹眼前

之瘡是雖曰言養民吾不知其所以養民者安在也盡人心以合天心鬻競平而和甘自至言之太高以下十餘行又言之太易要知治民本無奇策必須從實地著脚小處下手而後事事皆有實際人人得沐實恩稟未悉治理實力奉行等語庶幾近之省南值此奇荒惟望於一切事宜切實舉辦以全民命而濟時艱是爲至要

夏縣教諭武九疇稟陳興利除弊十條由

所陳十條諸多中肯如慎牧令條云虛應故事鮮有實心此正當今牧令通病平死刑條云刑以平爲準失出與失入同具有特識切中時弊興水利條云因民之利而利則上不費而及人廣君子但平其政使民自爲利而不必其出於己語尤精粹得古聖賢治民之要民間生齒日繁何啻億兆竭

朝廷帑藏不能給其萬一故上爲民謀不若使民自爲謀則謀無不至上爲民養不若使民自爲養則養無弗周孟子不取子產之乘輿濟人而取徒杠輿梁不取梁惠王之移民移粟而取王者宅田樹畜諸端蓋以此也方今勸捐輓粟賑務倥偬日不

暇給本爵部院亦知此事之無甚濟於民特平日既無備荒之謀一遇大稔飢殍滿野故不忍坐視冀以少補垂斃之殘黎非謂禦荒之法之卽在是也至於保甲爲弭盜之本務水利爲農田之急需社倉爲備荒之良圖凡所指陳均關至要惟十條列講學在先平刑在後不知平刑與講學相輔而行尤爲當今第一要義當今之弊失在法寬則奸猾多漏網天下翕然視法之不足畏而玩心生矣玩心旣生則官吏習爲顛預政事任其骸骸泄泄沓沓令之而不行禁之而不止雖曰與講學何裨乎道統開於中天則堯舜爲講學之鼻祖然苟無士師五刑五服五流五宅之法雖以放勳重華之聖欲治天下亦苦無把握故益

之贊堯曰乃武禹之勸舜曰用威四凶不仁則誅三苗不恭則
討刑故無小疾惡何其嚴去邪勿疑鋤奸何其決侯明而撻記
法不貸於庶頑黜幽以陟明考不寬於三載如天好生之內自
有一段風行雷厲之威足以警慄乾坤震懾鬼魅此堯舜所以
變黎民動四方也唐宋以後舉業家之所謂堯舜者止一老學
究耳失堯舜之真矣失講學之旨矣該教諭職在司鐸竟能留
心經濟於時事得失洞於觀火可喜可嘉籌荒田省差役兩條
昨已併請省丁糧一節會同

閩部堂列章入

奏期在必行其餘各條應俟賑務蒞事後從容謀之

信口裏乃非言非用名區

天

黎城縣徐令稟抵任後舉辦一切並籌度各事宜由

長民者不患民之不我尊而患民之不我親尊則由於畏法親則易於感恩民有求於官而官無不應官有令於民則民亦無不樂從故民不覺官之可畏祇覺官之可感官亦不覺民之可疾第覺民之可愛該令來稟談及民情輒亟稱之曰民窮而愿士寒而秀有食貧居賤之樂無離鄉背井之思又曰民氣馴良無好勇鬪狠刁詐健訟之風又曰民風士習較勝他邑其親上事長之心最易感發其言藹如絕無疾視斯民之情不愧樂只父母之義所答各條於地方情形民間利弊皆能體以實心察其本原委曲而爲之謀周詳而爲之備果如斯言行之無倦民

之利賴者多矣又整修城垣之議如果出於公正紳耆之實心無甚損於貧民而有利益於貧民或仿以工代賑辦法則災黎賴以全活者不少固可毅然爲之否則爲歉歲所限未便遽圖不急之工程仍仰該令酌度審量裁奪施行

管帶練軍參將蕭德明稟什長王還名等以尅扣軍餉具

稟梁哨官情形由

查該將接帶左營已逾三年之久理宜官弁兵丁聯絡融洽公
議私情交相維繫方資得力乃什長輒敢持哨官之短長哨官
則訛議什長之強弱爲營官者正當據理之是非曲直以定進
退黜陟豈可以階之崇卑貴賤任意愛憎左右須知哨官者該
將營中之哨官也什長者該將營中之什長也什長不奉公固
屬什長之罪哨官獨無過乎哨官不守法固屬哨官之罪該將
獨能辭其咎乎此次揭稟殊多左袒之語無非預爲地步悉以
過犯歸於什長曲爲哨官掩飾以明該將未嘗扶同表裏爲奸

之意似此處置營伍之事吾恐該營之兵心決裂已非一日矣
帶兵與帶勇微有不同平日慣以非法肆意扑責兵丁已足以
啟怨望况所領者銀兩所放者錢文兌換出入平餘多寡又不
能令其部卒毫無疑議乎什長聯名控於中軍之前者不止王
遐名一人其控梁守宗之劣跡亦不止尅扣軍餉強占民女二
款謂晉兵難帶不肯勤於差操不受約束營規此議訛之於初
立練軍之始猶或足信而該將接帶左營之兵固已三年有奇
也謂標兵知有怨而不知有恩何以衛鎮天成劉參將邦盛營
帶該兵弁等眾兵皆有頌聲而獨於該將有怨懟之詞耶本爵
部院初履晉疆以爲該將認真整頓深堪倚任乃該將此次來

稟意存袒護跡近要挾在己則祇認失察之處而責人則謂宜
逐款根究以肅營伍本爵部院自當俯如來稟辦理除將聯名
之什長王選名等發交中軍羈管備質外仰該參將於七月初
二日將左營關防文卷冊籍數目一併移交山西候補同知陳
棟接管該參將准於七月十六日後親送哨官梁守宗來轅聽
候懸牌示期堂訊是非曲直案情虛實均以案內官弁兵丁供
詞爲憑軍例具在不難依法懲治以爲尅扣軍餉離散兵心者
戒

大同縣員令稟奉札飭查地方情形由

所答賑饑民除盜賊理詞訟馭吏胥多係敷衍之談中無所有而又不肯用心所以叩之不能鳴也其論馬賊一節雇覓馬勇教習會同營汛親身緝拿尋常原係如此辦法但近來馬賊多有游勇溷跡其中聲氣往往素通官以兵勇爲官之爪牙彼亦以兵勇爲彼之耳目平日或往來交結暗地分肥官衙之一動一靜稍有礙彼事機無不星馳潛報惟能深得民心者使若輩無所託足法之上者也否則正直嚴憚有犯必懲彼亦高飛遠颺不敢眷戀於茲土地處邊要固以防盜爲急圖民困瘠區尤宜以愛民爲先務官無培養之政致民受朘削之重殃治盜云

乎哉吾恐民之曰卽於窮且盜也言爲心聲誠中形外徒爲粉飾之說適以自欺而已

洪洞縣艾令稟遵札臚陳管見並地方情形由

該令仿以工代賑之意變而通之勸紳富修理市廛此乃極善之法以工代賑本救荒之良策一邑大工能有幾何房屋固富家所共有也時值大稔物料既賤工價亦輕修理之費計可省豐年之半勸以修理既爲富者所樂從又爲貧者所急需在貧者得受計功之食在富者尤爲不費之惠貧富兩益孰逾於此飢民之賴以全活者多矣來稟又稱勸邀紳富量力捐輸善矣下復繼之曰破除情面顧全大局似預存強捐勒派之意却又非宜經云以欲從人則可以人從欲鮮濟捐輸之舉原屬不得已而爲之止可力勸不可勒派倘或強之以不欲迫之以必從

恐拂民情亦多流弊其餘各條尙多遠慮並見用心勉之勉之

安邑縣趙令稟覆奉查各項事宜現辦情形由

摺開各條所述興養立教除暴安良諸節尙能識其體要稟中所稱俗吏遇事奉行不力以致有名無實有始無終所言尤爲中肯如無真實爲民之心每舉一政不過奉行故事希圖塞責又違計及弊之除不除利之興不興哉奸胥蠹役奉命稽查製一紙之公符肆百端之騷擾者有之需索錢文支應酒食者有之地保之逢迎不暇閭里之雞犬弗安問於官而官不知也究之事不躬親徒假手於胥役未有不視爲具文者此直省之通病誰肯大聲疾呼振聾啟聵也乎又有一種悻悻自好之流每遇勾當公事皆係循例應盡之職輒自矜喜問之曰弊已除乎

曰除矣利已興乎曰興矣遂欣欣焉以爲有成高臥衙齋以冀
事後之效天下安有如此易奏之效乎該令來稟旣肯痛懲其
弊當不至躬蹈之經云非知之艱行之維艱又云靡不有初
鮮克有終尙望於一切應辦事宜持以實力矢以實心無負一
行作吏之初志常循恆久不已之良規以副厚望是爲至要

嵐縣李令稟遵奉據實覆陳札問各條由

該令所答皆有閱歷既不失之過高亦循之可以悉臻上理者
具見實地着脚小處下手絕無迂闊遠於事情之論所稱懲暴
剔奸不可稍爲輕縱其始不過鼠竊狗偷其後遂成強劫大盜
現今軍務省分尙未全清宿莽猶恐潛伏所謂刑亂國用重典
者正此時也等語最得古人猛以濟寬防微杜漸之意而用之
於荒歉爲尤宜周禮荒政十二終以除盜賊夫除盜賊何與於
救荒哉不知飢寒之迫易於爲非自古巨奸亡命嘯聚潢池往
往因荒年莫可聊生乘機而起當事者始則憫小民之謀食維
艱不忍令罹於法網其後奸民蠶起日甚一日遂糜爛而不可

管子卷之六十一 卷之六十一
救藥又遲及議賑議蠲與斯民共登衽席之域耶夫火始燃而
救之一杯可滅水未決而防之一壤可塞時值大禘尤不可不
明其政刑嚴其防範使一時之嗷嗷待哺者雖餓斃溝壑而不
敢萌異志方可徐爲之圖故以寬縱始者未有不以殘忍終也
涓涓不塞將成江河萌蘖不除將用斧柯其爲民計者思深慮
遠固如此其餘各條均臻妥叶勸殷富人家各自量力囤積於
荒年有益又非強富民以所難立論尤爲平允誣告反坐可以
息刁健之風大堂決獄可以聳旁觀之聽馭經承櫃書不可受
其分文凡換役出票不可縱令家人有所索取官旣洗心而退
藏於密若輩自然革面而不敢稍涉於疎內丁不與阜快一氣

耳目斯無蒙蔽之憂有此要着工夫彌徵盡心吏事勉爲循吏以副厚望

蒲州府穆守稟請截留京餉內先行籌撥銀兩濟民由

據稟預爲籌謀具徵體恤民隱而其不容己之心溢於語言之外惟本省災區太廣所請之賑款無多且放賑殊非易事必俟各屬將被災分數與應賑之極貧次貧大小名口核計若干此人數之不可不早爲稽查也每名日給若干計自某月起至某月止共需用若干此時日之不可不預爲計算也各屬倉存有
多少之不同就地能否籌畫亦情形之各異已由藩司委員按屬清查應候各屬與委員會稟到日乃可通盤酌核量爲勻濟方無偏枯向隅之患該郡所屬尙無報災之稟到院該府請撥銀存儲以便支發固屬關心民瘼惟與向章微有不符碍難率

會同議之抄晉抄片

爾允准仰卽備牘稟候藩司批示

三

屯留縣崔令稟明民情拮据先借倉穀接濟由

據稟該縣設立粥廠現在就食貧民甚多捐錢不敷支放請動
平常倉穀二百石以資接濟自應准如所請仰布政司轉飭該
縣如數動用散給務使貧民均沾實惠勿任胥役人等剋扣滋
弊是爲至要該縣如有成災之區所動穀石自應准予事竣後
據實造冊報銷如不成災仍宜於豐年買補歸還以重倉儲而
昭核實

五台縣曹典史稟晉省荒旱移民就食由

據稟各節所問者一事而所答者又一事天降災旱民鮮蓋藏非盡罌粟之害不禁吸食洋烟於天下而徒禁種罌粟於一省通盤計算殊非長策至於以食就民謂將查明受災輕重大小戶口分別極貧次貧籌備米錢運赴鄉村散給應賑飢民其移民就食或設廠煮粥令民來食並不出晉一步仍仰事俯畜安居父母之邦此被災較輕之區原可量力辦理若如所云遷民於吉林伊犁無論不易安插又孰肯舍祖宗廬墓親戚室家散而之四方耶如令壯者遠行就食獨不慮老弱之轉於溝壑乎所思所設諸多窒礙才須學也學須靜也尙其畱意於學澄心

觀理而後知立言之體要也

高平縣慶令稟覆遵奉札飭整頓吏治籌辦教養由

古之爲治者撫字重於催科今之爲令者有催科而無撫字一言教養兩端鮮不以爲迂闊而遠於事情其實民困已久待養於上已非一處故養之事爲尤亟以事以畜有餘力乃能生孝友之心相調相救有餘貲乃能成睦婣之化家計豐則不致迫於飢寒而後地方之盜賊少蓋藏厚則不屑爭夫微末而後雀鼠之訟獄稀阜康有象則書院義學希上達者較多男婦無飢則弱女遺嬰罹慘禍者較少由此充之三年耕有一年之食九年耕有三年之食卽值大禘亦可無庸賑卹然非久於其任不能成此雅化也來稟於勸民種桑一節言之特詳且津津於桑

之獲利甚厚並刷印頒發種桑盤桑接桑等法及蠶架蠶網蠶節等式可謂盡心竭力矣養民之政農居十之七桑居十之三男耕女績古者常以農桑並舉倘能勤始勤終實心實力必期於盡善盡美而後已卽此一節亦足以傳口碑其餘各條尙識大體惟冀於一切應行事宜切實辦理爲要

解州沈牧稟遵札議覆地方應辦一切事宜由

所答尙識大體惟稱天旱已久未能播種秋禾民心不無惶惶恐有飢民乘機搶掠之事聞之殊深系念竊思飢民搶掠固因飢寒迫於肌膚然要皆地方官有以啟之也時值大稔民間偶有硬求強取之事卽是亂端之萌地方官以煦煦爲仁但知爲貧民計而不知爲遏亂計方謂偶然之硬強於富民尙無大損貧民可藉以苟活往往置而不問或反咎富者之慳吝以爲取禍之有因不知此風一開則無賴惡豪必至如蠶而起始則能禁之而官不欲禁後則欲禁之而勢不能止其患有不可勝言者此皆寒儒一念之偏立論失其體要持法不甚公平之所致

也自古巨奸亡命嘯聚潢池往往因荒年莫可聊生乘機而起地方官失之寬縱不知杜漸防微於履霜堅冰之始而其後遂糜爛不可收拾耳水懦而民多死焉火烈而民鮮死焉經傳明訓備極周詳故濟寬者莫若猛用恩者必以嚴夫火始然而救之一杯可滅也水未決而防之一壤可塞也迨至燎原之勢既成滔天之災已遍則事不可爲也該牧旣慮及此層是否飢民搶掠刻下已見端倪亟當先事防備遇案痛加創懲必使一時之攘臂而起者雖餓填溝壑而不敢萌異志非刻也時勢所迫不得不預遏肇亂之源以救全無數生靈耳此事所關甚鉅該牧毋得稍忽

長子縣豫令稟遵將籌辦情形據實稟覆由

該令稱勸諭民間各歸各村相卹相救非不權濟目前之急然
出自富民之好善樂施則可若以此垂爲憲典懸諸條教亦恐
啟無賴油火之案非惟不利於富民大不利於貧民何者富民
者一鄉之貧民所資以爲生也荒年民迫於飢無物不賣且稱
貸者多富民利其價之廉息之倍也於是什器房產無物不買
粟米銀錢無日不出蠢而無能者旣以物易富室之財強而有
力者又以身効富室之用在富民雖爲利起見而貧民之賴以
全活者多矣今若概責成各歸各村相卹相救則無賴惡豪必
將恃官之告示爲護符肆行訛詐或強求硬借或攫取瓜分久

之難乎爲繼而閭閻從此不靖矣富者既受貧民之魚肉勢必
深自韜隱相率飾爲匱乏而不敢居富之名豈又敢置買房田
什器出貨粟米銀錢以招搶掠之禍哉於是富者之財閉而不
出餓殍必至愈多且小民聚廬而居其至親密友有無相通緩
急相濟時時有之此不待地方官之勸諭者也若以素無瓜葛
之人而皆責富者爲之贍養其勢亦有所難能該令此說頗似
古者比閭族黨相賙相救之意但欲行此策必須嚴爲防範如
遇有強求硬借攫取瓜分等項立即予以痛懲儆一戒百庶無
相奪相爭之後患尙或稍事姑息偶爾遷延時刻則奸民如蠶
而起刑亂國用重典道在此也事之所關甚鉅機之所伏甚微

非但貧民之生死並係地方之安危不可忽耳其餘數條布置
尚稱得宜

下野書入考言表月

三

襄垣縣李令風土民情並籌辦事宜由

摺開義倉一節稱欲令開辦之始百分捐三次年捐二再次年捐一行之於豐年或尙可從行之於歉歲則啟怨咨該令意中以爲約三年豐稔可救一年之荒全係民辦民捐並不假手胥吏自謂規畫盡善殊不知不爲官物不爲私物而爲公物黠者曰思從中染指強者直欲設計乾沒始則富民受迭捐之苦卒之貧民不得沾分潤之惠不幾等虛設乎此項義倉非惟不可使胥吏經手並宜存於各鄉官亦不可經手官若經手卽胥吏經手之漸也胥吏經手卽胥吏擾民之階也夫至民不堪其擾則義倉有弊而無利矣天下無百利而無一弊之法處之當則

倉是事之非言也
三
弊少而禍遲處之不當則弊多而禍速倉以義名乃一鄉之義舉非若

國家經制常平惠民之本爲官物也官物恃有

國法防範官與胥吏而不敢犯今年歲收歉薄民間饑殍不繼朝不謀夕奚暇計及於次歲之荒哉然官若出一令親爲督率而紳耆不敢不從如遇豐年屢書大有一經辦成卽須責成各鄉紳董自行經理俾鄉間操縱得以自由收發得以自主一鄉之眾咸視義倉爲己有不至視如倉廩之官粟可望而不可卽或尙可望無弊也其餘各條於地方情形均能洞悉亦非高遠難行足徵閱歷有得

靈邱縣陳令稟遵札辦理地方利弊事務由

朝廷之設牧令凡以爲民也非徒徵收丁地錢糧稽查戶口簿書已也其必挾孜孜求治之念貫以實心體以實力使四境之一民一物一利一弊皆爲見聞之所必及體察之所必周防維之所必密何者爲民所苦何者爲民所便何者於地方有裨有損何者宜興舉何者宜變通何者宜減裁何者宜禁絕一一了然於中然後辨其緩急權其重輕酌其民情土俗釐然而布之於政治蓋必知之明而後處之斯無不當勤於聽斷平治紛爭尤爲分內應盡之職故雖荒陬下邑亦必有可興之利應除之弊但克盡一分心力自有一分成效民如能免一分苦累卽有

一分生機爲民斯牧道固應如此也所答各節尙識大體亦無恃才傲物之習惟望於一切應行事宜實力舉辦是爲至要

渾源州姚牧稟遵札籌辦地方未盡事宜由

興利以除弊爲要乃閱歷有得之言天下無百利而無一弊之法當事者或貿然輕舉止見顯然之利不顧隱然之害遂致弊端百出擾累無窮後人又以其事有利民之名未肯輕議裁革往往有其事廢弛已久而紙上猶存虛名閭閻仍依時循例胥吏仍照舊索規未斷之根株竟爲常畱之禍種此非始事者興利之過實由於接踵者不防弊之過也居今日而爲牧令謹守法度民間固已無利之可興矣惟積弊則日甚一日但使地方官去一弊端則民間省一番苦累第能省一番苦累即可添一段生機官雖無興利之名民却有得利之實其所以造福於村

里者不已多耶來稟稱該州徵收錢糧每大錢一千隨徵底數錢二十文事屬累民業經出示裁革署內每興工作恆令鄉民充役其中賣放勒索弊不堪言亦已出示裁汰此皆除弊之事洵屬可嘉惟所稱義倉一節似未易貿然舉行蓋官不與聞其事既恐飽社長之橐官任意深求其事尤慮恣吏役之奸不善行之則地方之受禍卽在如此該牧以除弊爲心宜預防之其餘各條於地方情形尙能洞悉原委可稱畱心吏事勉之毋怠

厥志

臨晉縣方令稟奉批嚴飭仍遵批縷悉稟覆由

此次復稟詞旨和平驕矜悉化足見強制工夫非尋常負氣者所能學到昔賢謂勝人易自勝難觀人易觀我難良以我之見不可有自是之心恐致覆轍也才有短長量有大小學有精粗識有遠近人有純疵心有誠僞吾輩當就其安宅而居之大約恭敬爲民之主驕泰乃身之災無或爽者爲治之心不可中有所恃自謂無失必多矣自謂無害害將至矣馳駃駃於羊腸之徑飛舳艦於鳴石之灘方其快意之初詎謂人不我若而自旁觀有識者料之謂其蹙且覆者不遠矣真心爲民者常以民爲不可輕實心處事者常以事爲不易辦蓋常熟計乎始

終本末與事之曲折時之變遷恥躬之不克逮故言之不輕易
發也該令兩次所陳各條均多可採前則稍涉滿溢理宜裁成
賢智之太過今既卽於謙虛若能表裏如一彌徵後福之無量
爲政在人修身以道所願交相勉焉

隰州傅牧稟遵札議覆前後蒞隰管見所及勉力奉行由來稟所云奉公守法者卽一念偶差寬宥以養其廉恥違令犯教者雖小過必懲明嚴以生其畏憚最得古人宥過無大刑故無小之意春秋二季使民公作義坡跳崖圖詐之案不斷令養傷葬埋旣杜刁風且全人命辦理悉協機宜惟稱遇有爲富不仁之徒必使其滅息緩期以通民財此則涉於一偏之見流弊孔多無論紳商士民行息出貨此人已兩便之事未可遂謂爲富不仁若以取息爲不仁則當舖典商地方官何以借重行典生息乎若以索債爲不仁不知凡因索債而涉訟者皆欠戶之力能償債者也小民一詞之興自投狀以迄審結所耗不資倘

欠戶果萬分竭蹙力不能償則放戶業已絕望豈肯以萬不能追之債先浪用格外多費之財使地方官皆如此辦理竊恐官既左袒欠戶則欠戶無不賴債欠者無不賴債則無人敢復放債所謂通民財者反無以遂民生也此法在豐年尚不可行況時值大稔貧民多恃借貸以延殘喘今先絕其稱貸之路杜其賒欠之門顧此嗷嗷不亡何待該牧第爲貧民目前之逋欠計獨不爲其將來之借貸計乎爲追索控案於堂上之一二貧民計獨不爲安分守己於境內之千萬貧民計乎况有無相通民所時有債主未必盡富欠戶未必盡貧吾輩審斷宜昭平允不可有所左右致啟刁風該牧此說發於一時愛民之誠但卹貧

民者暫而不利於貧民者久用特肫切及之至城工一節應俟
請獎到日再行飭司酌度定奪查照舊章核辦

永甯州賀牧稟遵札縷陳地方應辦各事由

所答嚴緝防一條派教習勇丁分紮大小二川各處布置尙屬
整齊自俗吏尙煦煦之仁往往遇強劫大盜百計出之以爲陰
騭不知生人而當謂之仁殺人而當亦謂之仁縱一盜而使被
害者不知凡幾家被戕者不知凡幾人因之被議受劾者不知
幾牧令是之謂不忍於惡人而反忍於善人所謂陰騭者安在
哉况時值大稜奸民尤虞竊發稍一寬縱卽恐有萑苻嘯聚之
憂粵匪之變不過因當事者不忍殺賊遂啟二十餘年征討之
禍生一二亡命凶徒反致殺戮數百萬無辜赤子此可爲姑息
愛人者之殷鑒矣該令勤於弭盜可謂識當務之急至敬惜字

紙乃讀書人本等好事自宜畱心但係小節尙非政體之要務不必沾沾鳴意可也其餘各條尙能畱心仰卽切實辦理爲要以工代賑伏懇酌畱釐金一疏未荷

朝廷俞允各郡各屬皆不得希冀分潤以備城垣也

絳縣孟令稟各鄉地利暨籌辦事宜由

該令所述四鄉地利情形及整頓文風一節於土宜物產民風士習歷歷如繪防範書役不濫差一人稍有弊竇卽行革究處置亦甚得法蓋此輩固畏革不畏打也惟所答風俗條中於民之重利放債者嚴加究懲此則一偏之見不惟於富民不利於貧民尤大不利放債乃人已兩便之事息之輕重其權半自放者操之亦半自貸者操之未可以重息爲放債者之咎獨不見窮困之民嘗有欲出大息以稱貸而猶不得者乎况時值大稔什器房田無物不賤富者買之其利均較豐年有數倍之贏今若禁其重息出貸則富者之錢將別用之以網市利豈尙有肯

放債者耶鴻鴈嗷嗷地方官又杜其通財之路絕其稱貸之門不亡何待蓋此事與糧價之貴賤同一機括糧浮於人則糧賤人浮於糧則糧貴若官爲遏抑其價則外糧不來內糧愈缺放者多而貸者少則息輕放者少而貸者多則息重若官爲限制其息則放債無人貧民愈困此皆時勢使然固非地方官所能以意爲低昂也來稟又稱勸令各鄉各村自相周卹權救目前之急其法固善若懸爲條教竊恐此令一出奸民恃爲護符強求硬借及或流於攘臂爭鬪之漸仰卽預爲嚴密防範懲一儆百以遏亂萌切切

鄉甯縣李令稟安民必先察吏除莠始以靖良由

該令於吏習民風痛言其弊似亦洞燭時事者又稱己不貪而後可以維民俗己有恥而後可以端士風己能勤而後民知力作己能儉而後民謹蓋藏古人整躬率物道固如此降而至於今日官卽以此感民亦未必以此應也逐件皆有政事逐條皆有刑法原所以濟言教身教之窮而深有賴於禁民爲非之義耳又稱鄉民急於趨利逐末甚易返本爲難是也抑知晉民之逐末實迫於勢所使之然乎晉地半爲高山可耕之田無多統觀之似地廣人稀分計之則人稠地窄地之所出不足以供本境生齒之食用必須有出外貿易者旣可得外來之財且藉食

地方之粟而後本境可以支持過活他省之糧地與丁合晉省之糧地與丁分有丁而無地其糧與有地同其始也勉强供力役之征其繼也丁戶有逃絕之虞至今官受賠累皆由於此若咎其逐末而不返本試問貿易之家其田有荒蕪不耕者乎既無可耕之田而必責在外貿易之人何不盡還而坐守於家非惟勢有不能亦決無是理也又稱富者甘心歛怨此可以責讀書明理之士大夫而不可責編氓以彼勤儉起家得之難則守之必謹豈肯以一己膏血之積而饜千百家無藝之一飽也耶且能應百人之求而偶於一人不應則怨生能應千番之求而偶有一番不應則怨又生亦非富者之甘於歛怨乃其不幸而

居於富遂爲怨府耳且民之不歛怨者固亦有之閭里浮蕩子弟曰食萬錢一擲千百揮金如土不數年而先人遺產掃蕩一空強而黠者變爲土豪粗而蠢者流爲盜賊竊以爲富民雖自歛怨固猶較勝於此身爲民上當不忍附和貧窮澆漓從而怨之也呂氏實政錄稱富民爲地方元氣欲保地方切宜先保元氣該令既力勸上中以養下戶權濟目前之急尤宜杜漸防微以遏攘臂爭奪不分彼此之亂庶幾地方乃無後患耳切切

萬泉縣朱令稟遵飭查牧民應辦各事稟陳乞示由

該令稱戢暴安良最爲急務又稱荒歉之年恐有無業游民借口乏食頓生攘竊之心必有嚴法峻刑以治之保富方可安貧最得古人防患未然刑亂國用重典之意而保富方可安貧一語尤爲洞悉民情於救荒大有裨益可喜可嘉惟所答十餘條於詞訟獨未之及不知勤於聽斷正除弊安民下手工夫聽斷勤則惡豪不敢恃強凌弱胥役不暇勒索刁難門丁不得納賄招權變白爲黑而事之妨民者寡矣自官吏習爲顛頂一票也或半年而未銷一讞也或比歲而不就若恐惡奴衙蠹貪囊之未飽而故寬以時日也者不知官衙早作夜思之時卽是奸蠹

舞文弄弊之時倘或偃仰棲遲則兩造株連羈押之苦已不少矣已縱不貪自有代爲之貪者已縱不虐自有助之爲虐者究之皆由於聽斷不勤之過其後遂至無奸不作無弊不生無人不怨可不懷歟其餘各條尙識大體惟冀於一切應行事宜切實舉辦毋託空言是爲至要

興縣王命稟該縣實在情形並籌辦地方各事由

該令欲紹溫公舉貸之法而慮民情吝財或令之而不應所慮誠是但民之應不應固不關民之吝不吝也夫稱貸一經官吏之手有難言者矣即民間自行稱貸多予之息雖吝者亦應予息過少雖不吝者亦不應時值大稔小民得錢之難較尋常十倍閭里放債其息有多至四五分者此非盡富民之忍於朘削貧民亦其勢使然也來稟述溫公之言稱富室有蓄積者官即印歷勸其舉貸量出利息候豐熟日收索示以必信不可誑誘此法非宋時不可行亦非溫公不能行蓋其聞望鑿於民心也久矣今將欲效法之利息而曰量出此即民所以不應之由也

荒年什物田產價皆極廉富者買之均較豐歲有數倍之利今勸令量出利息已微誰肯舍地物數倍之贏而反取此舉貸之微息乎卽曰官之令迫之能禁富民之諱言無錢乎况邇來地方官審斷多不持平凡遇錢債案件往往左袒欠戶抑勒放戶以致賴債者多富民共視放債爲畏途今行此法雖有官給印歷示以必信又須各處諄諄勸諭舌敝唇焦安能使富者萬無日後之憂貧者日後萬不敢起賴債之念乎惟利息令紳富酌議甯厚毋薄仍由貸者放者私自定奪或猶可冀民之勉强相從也然而難矣治理不外人情苟非民情所樂爲而迫之使爲鮮有濟者仰再切實酌之其餘各條尙識大體惟冀於一切應

行事宜實力舉辦毋託空言以博美名而收厚實可也來稟
白漏未鈐印填曰併飭知照

和順縣夏令稟覆遵札條陳地方事宜由

所引與時變通因地制宜之妙用皆屬前事之可師良藥期於
利病不期於執方善政期於宜民不期於泥法誠爲治之篤論
所論辦賑之法在在中肯又激昂慷慨遇事敢言不愧有志之
士惟所稱八大旗竿此等惡風固宜懲治但非德威素孚於眾
未可易言平日苟無以服其心而徒悻悻焉挾官之權力制之
則此輩桀黠之雄急免反噬動與官抗勢所必然若因畏其難
馴而市恩以要結之則此輩知官之畏我方將有挾以堅其請
無厭以肆其求來稟之所謂出入衙門把持公事者其弊正由
乎此也該令所答月課義學倉穀保甲而於審詞訟馭書役獨

未之及不知牧令之樹德立威全在此二事爲實際其餘皆後
焉者也地方官先能於此處辦好則良民翕然知官之愛我衿
棍土豪凜然知官之不可犯而後可以禁無不止令無不行若
因一呼再呼民莫之應遂忿忿焉咎民之愚則莫若反而求其
本焉可矣至義學一節固立教之要圖但爲治之道莫急於養
卽有義學該縣蓬首垢衣攜籃拾糞之總角試詢其家生計豈
暇讀書者哉該令擬於榮令賠穀價內請酌提二千兩爲興設
義學之用辦理若果得法上不窒礙於官儲之倉存下不培資
於衙門之中飽原無不可第現值鄰氛不靖辦賑方殷事有亟
於此者應以俟諸異曰

汾西縣傳令稟覆地方情形及舉辦各事由

該令持論無不中肯查災辦賑亦費苦心聞以稽查戶口不得眉目規畫未盡妥帖放賑之際始則失之於濫後恐失之於遺民命所關在上者不得不量才以相授細繹來稟因而懸揣其爲人大約慈祥愷悌則有餘以之理繁治劇條分縷晰則不足方今之世斯民非盡一味化導而遂感孚以幾於善也剔奸懲暴除莠安良逐件皆有政事逐條皆有刑法地方官持尺寸之柄偶或疎於防範遂致滋蔓難圖時值大侵稍或姑息卽是亂端之萌同一塞翁得馬安知非禍失馬安知非福想深於閱歷者權衡已熟計之矣

武鄉縣吳令稟遵札就各鄉情形並籌辦之法稟覆請示

由

所答十餘條尙識大體惟稱欲勸富捐穀將所捐之穀挑運至集極貧者則按大口八合小口五合賑之次貧者則按照時估減價令其赴糶獲錢文下集仍買穀至集分別賑糶周而復始等語若能如此辦到於貧民自然不無小補但如此辦法其弊約有數端不可不防市之糶糧者非盡困戶與巨販糧商也小民負販貿易有負擔來者有牛馬馱載者有小車推輓來者又有殷實之家出其餘糧而糶者並有勤儉小戶以一斗半石之贏負而出糶者以千萬糶糧之人供千萬糶糧之家故能使各

會月... 城各鎮各村各疇各門各戶人人得糴乃不虞其缺乏今欲使
千門萬戶之貧民悉仰給於官糴有萬室一陶之憂弊一富戶
捐穀未必能多貧民關照時估減價勢必爭先而來頃刻立盡
近者得沾小惠遠者徒勞往還弊二均一次貧其貧亦分等差
次貧之有錢者得糴次貧之無錢者仍不得糴同此貧民而減
價之患有沾有不沾弊三所捐之穀既爲極貧賑去一半下餘
又復減價而官爲買穀又須有脚價盤費之支銷則再次三次
所買之穀必致愈少沾潤愈不能均弊四糴既減價恐四境糧
商聞而不來使境內有乏食之虞弊五有此五弊而官役之紛
忙紳富之擾累猶其後焉者矣夫民果有錢卽穀不減價亦何

妨民果無錢卽稍爲減價亦無益與其以有限之惠節次零星而予之致多紛擾何如卽以所捐之穀按極貧次貧徑爲分別支給官旣省事而實惠且得均沾不較愈乎本爵部院亦不敢稍涉成見自以爲是但恐始則不能捐積許多穀石尤願該令於各富戶捐有成數之後統計共穀若干除去應賑極貧之穀外宜留爲後日救荒之備儻或以餘穀充足不妨供閭境次貧之糴必欲如此行之跡近官綱市利且不免前項之弊並慮外糧因之不至則所失尤多濟世之業本乎人情未有溢乎情理之外而果能始終克濟者仰再切實思議爲要又所云按大口八合小口五合賑之未免太豐難乎爲繼慷慨出自他人官爲

經理尤宜折衷至要

絳州陳令稟覆垂問事件開摺請核由

該牧所答逐條皆閱歷心得之言事理曉暢意氣和平如稱因愛憎以定是非微特不能咸宜人且窺之以爲趨避因喜怒以爲賞罰縱不至於過當人已乘之而肆講張由此精以求之是謂能得好惡之正不愧民之父母又稱除胥役之弊要在於勤傳訊不勤則一票之出任情延擱難保其無恃符騷擾得賄賣放等弊審問不勤則點單已開尙須守候難保其無暗唆串供包攬招搖等弊斷結不勤則株連多人無辜被累難保其無錮閉刁難藉端詐索等弊官衙之處置井井有條草野之從違昭昭可睹未有感而不應者也剔奸懲暴條中凜然有杜漸防微

之意尤爲當今切務時值大稔宵小饑民最易隨風煽惑稍一姑息遂鴟張而不可遏抑古人所以治亂國用重典也其餘各條援引古意得時得勢原非高遠難行之事特廣陵一調久已不復散布人間當亦有志者所同慨也惟所云禹貢冀州不言蠶桑之利遂稱山右自古不宜蠶桑似不盡然左傳趙宣子舍于翳桑晉侯召桑田巫醫桑田雖皆地名要因其地有桑而後以桑名之唐風之詩詠桑者一魏風之詩詠桑者三未見山右之不宜於桑也魏風明言採桑若不宜蠶採桑何爲惟婦女一身不能兼營該州鄉村女子七八歲以上卽能紡綫十二三以上卽能織布此種旣出女手則蠶桑或可無庸耳聊相與共證

27

Amesbury, Vermont, 1857

1857

卷之三

三

沁水縣汪令稟覆地方情形並遵札議辦由

所答修水利馭書役等事尙有條理辦賑宜求正士亦辦賑要
着惟稱民間報賽祈神所費不貲或一會而費中人之產或一
戲而耗百日之資濫用胡底擬定以限制等語此亦爲民惜財
之意但以此爲富民省錢計則可以此爲貧民餬口計則左矣
何者賽神演戲等事最爲貧苦小民之利每見戲台之側其包
錢乞食者皆貧民其肩挑貿易者皆貧民其沽酒賣茶及一切
食物用物紛紜雜沓而叫號不絕者皆貧民人徒見車馬喧闐
往來游譙以爲浪費足惜不知此浪費者皆富民之財於貧民
無與也富民以觀戲而耗財貧民正以有人觀戲而藉以謀生

昔范文正公歲荒不禁競渡且爲展期一月日率賓客士大夫往觀夫豈不知競渡之耗民財哉正欲耗富民之財使貧民藉以生活耳惟人民叢雜奸宄易於溷跡若地方靜謐不妨聽其祭賽以利貧民惟值人心惶惶之秋則宜暫行停止以弭亂衅加意嚴密查察防患未然可耳萬勿稍存姑息切切

廣靈縣文令稟遵憲詢各條就地方辦理由

利自宜興亦有難以驟興者興一利而反貽民以目前之不利則未興利不過無功猶勝於負然興利者之反滋擾累也弊本當除亦有難以盡除者除弊於此或致生弊於彼則新起之弊不知伊于胡底反不如舊存之弊民猶習而相安也來稟稱無利可興又稱行之已久者不敢遽議更張具見周詳慎重之意爲民父母雖無可興之利不可不時存一利民之心每遇應除之弊不可不力去其太甚之累但能於應行舉辦裁革事宜吾之心力盡得一分窮黎卽有一分生機地方卽回一分元氣吾輩一行作吏分應然也該令於每年春冬捐廉設立粥廠去年

春又設有牛痘局足徵惻怛慈祥時時在抱尙望於一切力所能爲之事切實舉行毋稍疎懈爲要

鎮平縣程署令到任情形稟批

居官之患莫患乎上下隔絕而情意不通情意不通而不思所以通之雖孜孜求治無益也來稟謂該縣情形俗敝民刁動輒上控措置稍疏未有不受其挾制者因卽擬請上台遇有上控案卽將抱告發回以杜圖告不圖審之弊是亦止訟之一法第思此敢於上控之人豈盡好爲多事乎殆亦有情不得已者耳夫凡物不得其平則嗚嗚矣而不得直則愈不能平此上控之所由來也今欲杜絕上控曷先勤慎治民誠使地方官有告卽審有審卽結秉公訊斷遇事持平官衙之是非旣分草野之爭端自息又何患挾制把持刁訟迭興耶至若土客雜處易起猜

自前朝以來，有耳共聞，卷三
三
嫌邪教惑民，更滋流弊，挖骸之淺，成風俗賭博之爲害，地方俱
係實在情形，但使官民相親，情意不隔，示以睦婣任卹之規，勉
以孝弟忠信之道，而又察其情，僞抑彼，彘強雖有頑梗，有不默
化潛移者哉？該署令奮發有爲，心跡昭著，一鼓作氣之概，時流
露於稟牘之間，幸卽克葆初志，仍以爲天下無不可教之民，以
期無負所學焉，斯得之矣，勉之勉之。

柳城縣曲令到任情形稟批

政莫善於養民而養民莫要於盡地利粵西山多田少本多未墾之地况兵燹之餘尤多曠棄加以水利不興旱潦無備農工不講磽瘠堪虞一遇凶荒民多乏食無業游民流而爲盜此一定之勢不可不亟爲挽回補救者也該署令蒞任柳城詢其致荒之由察其受困之故因卽講求水利導以蓄洩灌溉諭以積糞肥田教以工作器具之方示以種植樹藝之法并復推廣利益以冀其樂從籌及游民以安其反側養民之政莫備於此顧小民之事可與樂成難於慮始官司之事言之甚易行之實難所望實力實心有始有卒時其訓誡儆其游惰無力者酌給資

本勤力者格外獎勵而又無非時之征以擾之無緩結之訟以累之使得盡力於南畝誠如是也民焉有不各得所養者哉由是編保甲以稽其戶口練團防以衛其身家興學校以勉其善良旌淑德以作其士氣月計雖云不足歲計自覺有餘可以挽澆漓之積習卽可以基無窮之樂利矣幸勉爲之

懷仁縣陳令稟覆籌辦地方
救令爲親民之官今之爲令者往
門丁胥役爲之隔也該令不用門
層宜其百姓疾苦可得以上聞左
奸故豈在門丁在官之授權於門
伺候之手事之所在權卽寄焉權
弊卽叢焉故作吏者斷不可以不
卽有門丁亦爲我用吏不勤明卽
役何人非門丁哉來稟於地方情
省車戶無窮之累辦理尙協機官

移數語尤爲精當爲治原無墨守之法要在因地因時實實於
百姓有益爲程度故良藥不期於執方期於利病善政不期於
泥法期於宜民倘醫師不知切脈加減而專襲成方則獲善之
殺人不在砒毒之下該令閱歷有得惟望於一切應辦事宜切
實舉行毋稍懈弛爲要

曾忠襄公督粵批牘卷五

石城縣郭令稟批

古稱良吏有二才氣開張遇事能斷智足以集事此能吏也樸
實惇大事事從民生起見不求粉飾治具此儒吏也儒吏爲上
能吏次之以能吏之效在事功儒吏之效在元氣也該令初蒞
石城卽能慎重冬防整頓團練清釐積案勸息訟端其於才氣
開張智足集事者頗覺相近至謂除弊首去乎太甚興利必本
乎自然政事莫先於足食閭閻尤貴乎力田故於積穀墾荒兩
事尤能申明例章剴切示諭變通成法備預不虞深覺樸實惇
大不類粉飾治具者之所爲殆亦能吏儒吏之間者乎惟是事

功既未盡著元氣亦未盡復所以然者履任未久圖治之日尙淺故耳所願堅持初志克葆初心如治絲然理其棼而竟其緒如治器然圖其始而慎其終毋過於操切毋失於矜張毋蹈於因循毋流於苟且實心實力有守有爲將古之所稱良吏當不難跂而及之矣幸勉爲之

欽州余牧稟批

近日仕途擁擠人才競奮各屬州縣不少循分供職之人所少者實心任事之人耳實心任事者不畏煩難不辭勞怨不問缺之美惡不計時之久暫遇事之來認真做去盡其分之所當爲行其力之所可及如是而已該署牧蒞任欽州剛及一載凡地方應興應革之事如所云舉辦團練創設育嬰規復義學捐置水車盡裁各項陋規自備下鄉夫馬均各不畏煩難不辭勞怨洵屬實心任事爲州縣中不可多得之員深堪嘉尚惟各屬團練雖經抽查點驗挑選精壯三千四百餘名可輔邊防兵力之不及而訓練約束之法尙須妥定章程方免流弊育嬰堂之設

創建於城尤須分建於鄉庶使僻谷窮檐羣沾實惠義學冊報
之多幾於星羅碁布乃究其實際竟屬子虛現既規復二所卽
宜次第興復以廣教化是爲切要此外所陳應興應革關係邊
防營制案件等事均屬可行仰卽稟商該管鎮道就近察奪情
形分別詳請核辦可也

饒平縣盧令稟批

聽訟是教民養民之大政知情僞而折服董戒之教也省株連而不擾其生計約差役而不使搏噬卽養也該署令蒞任饒平每於自理詞訟靡不詳細推鞠無情者不肯濫准准理者必求速結遇事懲戒隨堂發落公庭有是非草野自昭激勸至於相驗人命蠹役每以夫馬病民控告戶婚奸徒多以打點索費該署令自備夫馬并出具簡明告示牌示輿前俾得周知每遇票差亦復親自簽發限日帶審以防壅蔽用能杜絕弊端清釐積案保全百姓造福閭閻雖無教民養民之實功實有教民養民之實效該署令所自信爲報稱盡職者在此本爵署部堂所爲

嘉獎欣慰者亦正在此耳至若沿海各鄉擬爲建築碉堡講求團練各港漁船擬爲編排保甲設法稽查實爲除盜安良靖內攘外之至計該署令瓜期將屆一時恐難集事將來惠令履新務須詳細舉告俾得照辦以竟全功是爲切要

鎮平縣余令稟批

陰陽之氣不相陵內外之職不相紊故男耕而女織人倫之制亦王化之基也今嘉屬之民男逸於內而使其婦沾體塗足力作於外易陰陽之位亂男女之別傷化薄俗莫甚於此且非所以勸勤也該署令自蒞鎮平以來講求水利勸民開墾荒地種植茶桑并採買秧苗教民如法試種以盡地利務使男子治外女子治內不得仍循陋習自致饑寒此舉奉行果實匪獨開廣利源併可挽回澆俗殊堪嘉尙現計新任程令當已接篆亦須仿照辦理加意講求衣食足而禮義興教化行而風俗正是在司牧者之克竟全功以收實效斯得之耳至若栽培書院嚴行

保甲約束教民講求緝捕清理詞訟整頓地方均係目前要務
幸毋以缺分瘠苦致存苟且敷衍之心亦不可以權象代庖遂
存五日京兆之見古人勤能補拙儉可養廉此意宜共體之

合浦縣楊令稟批

州縣及民之政分之不啻萬端約之不外教養二事故虞書咨
十二牧必歸本於敬敷周書八政陳疇必先詳夫食貨此雖老
生常談實亦經世寶訓也况該縣習俗強蠻好勇鬪狠睚眦細
故動輒構衅尋仇雀鼠微嫌遂爾架詞刁告則教之之術不可
不亟爲講求也田土硤瘠戶口繁殷所產米穀不敷民食則養
之之方不可不預爲籌畫也該令舉辦團練清查保甲招墾荒
地勸種桑麻是亦教民養民之一法但須行之以實出之以誠
擴而充之推而廣之務使一邑之中民莫不率其教四境之內
民莫不得所養禁無不止令無不行勸農則野無惰民催科則

里無通賦興文教則有睦婣任卹之風飭武備則有伍兩卒旅
之眾戶口清而奸宄無所容田疇清而爭訟無自起興利則利
無不興除弊而弊無不革是則教養之全功而亦教養之實效
也該令瓜代有期諒難收此實效所請變通竈丁章程並由縣
丞勘驗濶洲墩地方命盜案件等事仰卽詳告後任酌奪情形
另行通稟核辦可也

靈山縣鄭令稟批

冉子具足民富教之才聖人但許其藝可從政千室之邑可使爲之宰今之州縣地大者數百里戶口十數萬刑名任之錢穀任之捕盜緝匪任之士習民風無不當周知也簿書筭庫無不當躬親也命案多者相驗或厯旬月而不能返署詞訟煩者聽斷或連晝夜而不敢少休衝途之州縣則有迎送供給之繁附郭之州縣又有奔走應酬之擾忙忙鹿鹿日無暇晷今人之才豈皆遠勝於古人哉亦循其分之所當爲盡其力之所能爲以期無忝厥職而已該署令蒞任靈山業逾一載凡所爲清理詞訟禁止賭博講求緝捕嚴拿盜賊編查保甲舉辦團練開墾荒

地培植文風靡不實心實力認真辦理循其分所當爲盡其力所能爲雖未必遠勝古人亦可謂無忝厥職矣現計新任鄧令當已接篆一切風土人情以及地方應辦事宜定須詳細舉告俾得周知爲後任者亦必虛衷下問博訪周諮以期各盡乃心各稱厥職是爲切要

潮陽

潮陽爲韓

有一二存

貧富子弟

子弟無力

并復分城

嬰堂義倉

十餘年來

也乃自近

葬或架詞

曾思復

窮以致詞訟之繁甲於他邑推原其故皆緣訟棍之主唆奸徒
之玩法爲害地方莫可究詰昔韓文公治潮雖蠹然之鱷魚尙
可驅之不使爲害况刁徒蠹棍顯然人類而可聽其爲害地方
耶該令有志向上奮發有爲雖未能遠逮古人切不可自儕俗
吏幸勉爲之

興甯縣沈令稟批

自古迄今言治本者總不外教養二端衣食足而後禮義興故教不先養逸居飽煖近於禽獸故養必加教此千古之常經而亦千古之至治也來稟謂撫字之道首在敦崇士習力挽髡陵備水患以衛民居勸蓋藏以裕民食用能廣置義學勸懲士類修築隄壘建造義倉頗得教民養民之義殊堪嘉尙獨是教養之方非可一言一事盡之也要必隨地隨時留心勸導卽如審理詞訟卽就案內之事案內之人曲引旁徵觸處皆堪啓發因公下鄉又於稠人廣眾之中勤勤懇懇勸其節儉做其游惰卹其饑寒詢其疾苦計一歲之中經吾面諭者不下數千人而此

數千人輾轉傳播相與鼓舞風動默化潛移感格既多保全愈
眾是蒞事臨民無處非教卽無處非養矣昔者堯命契爲司徒
必告以勞來匡直輔翼振德之方始克盡一教字孟子之告梁
惠王也必導以山林汙池農桑樹蓄之利始克盡一養字可知
大聖大賢其教民養民尙須如此委曲周密自非聖賢更宜詳
盡所不待言該令有一於此卽宜擴而充之推而廣之幸毋以
此自域焉斯可耳

文昌縣何令稟批

古之教者家有塾黨有庠州有序國有學所謂多其教之之地
廣其教之之人是以德行出其中道藝出其中孝子悌弟義士
忠臣亦莫不出其中型仁講讓比戶可封法至良也教至善也
今文昌地方每試童生輒四千人書院肄業恒百餘人似亦風
俗之美者乃該令以爲別處患士人之少該縣則頗患士人之
多推原其故良由紈袴惡少混廁其間以致恃眾凌人逞強生
事顛倒是非無所不至談者旣已髮指聞者未免心傷竊謂十
室之邑必有忠信一縣之大豈無一二敦品勵學閉戶潛修之
士誠使地方官隆其禮貌獎其廉隅使表暴於什伯庸眾之中

會品集卷之四
三
以爲多士所矜式彼多士又復爲之月課季考拔其尤始收之
書院定以升降予以黜陟給以膏火優以獎賞善者嘉之不能
者矜之彼見官之愛士若此待士若此有不慙然慚翻然改奮
然興起者哉往者陳公滄洲守江甯始至卽諭諸生有行誼修
飭進見求益者與爲賓主禮其毀廉隅好爭訟者籍其名俟督
學按試時上之終公之任諸生無敢多事可見士雖狡狴未有
不可化誨者該令身任地方實有教士化民之責幸無稍存鄙
夷厭薄之心是爲切要

臨高縣王令稟批

大凡風俗美惡非一朝一夕之故其所由來者漸矣然因勢利導隨地制宜去其太甚勉其易能是在良有司之善爲轉移者也據稟該縣民情所最利者耕作而外廣蓄猪牛所最病者鬪狠之餘互相訐控風俗以信鬼好淫爲最甚士農以科名水利爲最艱是皆積漸使然已非一朝一夕之故該令履任以來招集流亡勸墾荒地廣籌蓄牧創懲淫佚止息訟爭清釐書院膏火兼課字賦詩文講求溝洫蓄洩旁及灌溉栽培雖未能立著成效而因勢利導隨地制宜去其太甚勉其易能均覺相近至於崇信鬼神釀金賽會有病不用醫藥專恃鬼神有仇用術呪

釘遂罹死病是又風俗之極敝尤不可不善爲轉移者也惟是俗好鬼神必以其能爲禍福民恐召災轉生謗譎該令有志善俗其思所以處置之而坐收轉移風俗之效是爲至要

萬州包牧稟批

操守是居官大要廉明乃爲政根基該署牧蒞任萬州業經兩載凡商稅之所出靡不申明定章不准例外需索丁糧之所入靡不恪守賦則不准額外浮收并將衙門一切陋規暨汎奔巡察黎村規費一律裁革立案泐碑以垂久遠以慰民黎此外於地方利弊情形風俗美惡興養立教之方因革損益之道亦莫不詳加體察灼見真知於操守廉明四字頗覺相近惟是知之既真尤貴行之必力如所云義倉無存不足以備凶荒義學雖有不足以廣教化孤貧雖設而爲額太少不足以矜鰥寡至於養濟院之恤老育嬰堂之慈幼建築大堡以防黎患籌辦善後

以靖地方均係目前要務甚無謂經費爲艱遂可俟諸異日也
大凡有益於民之事其始也不能不有所難其後也又不能不
一無所累畏其艱慮其累必至視天下之事皆可以已果其可
已則人懷利便不復有所振作此吏治之所以日壞而民事之
所以日荒也該署牧講求操守卽是留心吏治之人幸卽奮發
有爲毋致因難而阻是爲至要

樂會縣徐令稟批

昔人云不畏難不憚煩方能幹得重大之事此治譜中要策也據稟該縣情形除風氣所趨與黎無涉餘皆有係於黎防黎得法則可使地方由敝而復完山川易夷而忘險並可去民生之病而存其利留物產之豐以備其嗇而風氣亦可從容整頓以復於舊誠爲切要之論至於防黎之法該令以爲莫切於嚴查牛販而本爵署部堂仍以清查保甲飭行團練爲目前第一要務蓋嚴查牛販不過遏其流於黎匪劫擄之後而清查保甲飭行團練乃可清其源於黎匪構煽之先來稟所謂聯絡村坊互相保聚使賊進不得攻至無所掠是卽中原堅壁清野之法實

爲防黎至計雖其中人心不齊良莠不一難辦之勢其弊有三
然使行之以實出之以誠曉以守望相助之義動以憂樂相關
之情渙者使之聚疏者使之親杜其漸以防其微補其偏而救
其弊始事或有所難久之必形其易幸勿因難而阻因易而忽
是爲至要

封川縣張令稟批

官與紳士親與百姓親則左右之人甚疾之隸役蠹棍則尤疾之何也官與紳士親則左右之人不得竊柄而弄權官與百姓親則隸役蠹棍不得欺朦而舞弊故州縣雖有親民之責有親民之心而往往受制於家丁胥役之手者比比然也來稟於親民用人之道論之最詳并自信其頗有所得誠如是是不愧爲親民之吏矣至稟中所陳保甲團練相輔而行且慎選正人爲之保長練總用能圍捕著匪消弭亂萌尤足徵所用得人之效此外分設義學添置家塾宣講律令籌備義倉或辦有成效或稍有端倪要皆官與民親得人佐理之所由致昔成周盛時比

閭族黨皆以上士中士下士爲之其制至織至悉齊之軌里連鄉猶存此意此保甲團練之所由昉也漢置鄉三老以掌教化又立亭長以司一方之事故成康之時號稱極盛而兩漢吏治民風猶爲近古今該令與百姓親與紳士親而卽用紳士中之正人以共治一邑之百姓其吏治民風當不難蒸蒸日上矣慶何如之

廣西博白縣謝令稟批

天道有陽卽有陰四時有寒卽有燠民心有良卽有頑風俗有美卽有惡此一定不易之理也來稟謂博白一邑地本膏腴之地民亦耕讀之民因風水之說久中於人心而狡詐之風遂成乎薄俗且好勇爲鄉愚之累健訟梗教化之源是皆風俗之美惡而民心之良頑繫焉竊謂風俗人心之壞其流也雖始之自下而轉移化導之機其權仍操之自上欲正民風先端士習此誠探本尋源之至論至於結黨扛訟糾眾械鬪爭墳訐控折骨藏金是又風俗人心之極敝而轉移化導之所宜亟者也該令現於各堡選定公正紳耆二人遇事責其秉公排解一切刁紳

劣監不准再遞公稟隱附黨援其控爭墳山之案亦卽明定章程剴切示諭斷自本年七月以後凡有安葬墳墓必立石碑貧無力者亦卽磨磚代石以垂久遠以杜佔爭是亦止訟息爭之一法但須行之以實守之以恒庶可挽回薄俗耳昔聖人教子張之從政嘗曰尊五美屏四惡今該令從政雖鮮五美之可尊亦欲惡俗之盡屏倘由是而一律遵行當不難移風易俗矣

廣西永甯州高牧稟批

天下之患在民貧民貧無以爲生則輕犯法吾儒身列仕籍有牧民之責道在恤民貧而已能恤民貧無使擾害則治矣據稟該州情形地瘠民貧獐獍間雜村民稀少聚居僅三五人家丁口畸零閭屬止一萬餘戶加以田疇瘠瘠高低俱有不宜物產無多貿易時難爲繼雖鉛鐵之引苗已露而開採多爲工本所拘瑤琨之獻納無徵而珍異更爲山川所秘此民貧之患實爲地方隱憂而存恤之方尤爲當前急務該署牧奉飭查辦荒地勸種雜糧均係恤貧之至計但須行之以實持之以恒方能有益此外弭盜賊懲訟棍約束書差所謂除民之蠹恤民之隱卽

所以救民之貧也該署牧有一於此卽宜從此盡心做去擴而充之觸類而長之如民之情於農者上勸之勤不能耕且織者上教之耨與紡乘其年豐歲稔上多方設法勸之積宜水田者或令之開渠或令之蓄水宜果木者或令之植果或令之培材宜畜牧者或大而牛羊或小而雞豚皆所以佐農事之不足而爲恤貧之一助也幸各留意毋以有志未逮遜謝不遑爲要

遂溪縣孫令稟批

周官六計以廉爲本而其所以能廉者則在乎儉今之州縣每得一缺朋友之多或四五人或八九人家丁之多或數十輩或百十輩而親戚故舊子姪弟兄不遠千里奔走相隨者更不知凡幾飲食耗之衣服耗之束脩薪水來往川貲則又耗之稍有虧累不藉口於缺分之瘠苦卽推諉於上司之誅求試思爲上司者豈盡不肖之人耶州縣不加平餘道府何至收節壽州縣不得陋規道府何敢責供應昔人云居官不要錢鬼神猶畏之况上司平來稟謂該縣平餘每年約有千金併陋規所入將及兩竿乃因道府辦差暨節壽等項搜括無遺賠累難堪倘不蠲

其應酬之費給以辦公之資縱不剝民亦必蠹國等語俱係實在情形然亦思州縣既可藉平餘陋規爲辦公而道府不管錢糧又將何者爲辦公乎似尙未得其平也竊謂州縣一官苟能平日留心庶務則幕友可以稍省幾人以一僕而兼數事則家丁可以少用幾箇一切起居飲食輿馬衣服務崇樸素則日用均可以從簡計每年廉俸所入而吾以鄉學究之館金視之自覺綽有餘裕誠使上下一心小廉大法在州縣既不假辦公之名而坐收平餘陋規該管道道府倘再以節壽供應責之州縣然後反唇譏之未爲晚也

信宜縣盧令稟批

地方官實惠及民莫如自理詞訟蓋自理詞訟每日有之能速理一件持平一事積久計之兩造卽受無窮之福據稟該縣情形民勤耕鑿習泯奢華力穡服田墾種幾無隙地耕三餘一米粟尙覺豐盈加以積儲頗多凶荒有備徵收尙易催科不勞鄉里旣行保甲之規年來已少盜劫之案居民樂業屬境乂安洵堪欣慰惟民情好訟動輒架詞訐控或藉墳山以誣罔或因命案以糾纏或因劣佃以霸耕或因田價而索補或令婦女而挺身試法或恃訟棍而玩法逞刁爲幻譎張情僞百出官其地者惟有開誠心布公道勤審斷省株連官衙有是非之公草野自

著勸懲之效訟者知訟之無益訟必漸稀刁者知刁之受法刁必漸斂釜底抽薪之計莫善於此至於紳矜干謁原恐有苞苴竿牘之嫌然使日對吏胥丁役不復親禮一邑之賢士大夫不特壅闕下情亦且無以自輔古人用力勞用人逸其故可深思也幸勉爲之

海陽縣張令稟批

守令爲親民之官一守賢則千里受其福一令賢則百里受其福爲守令豈別有異術哉亦惟體民心以己心視民事如家事官有勤政理訟之實功名自著移風易俗之實效如是而已來稟謂潮民病根之深莫如結盟拜會聚眾械鬪二事苟地方官辦事持平勿使互相魚肉則結會之黨不解而散詞訟案件速爲審理則械鬪之釁無自而開誠爲切要之論該令到任以來留心詞訟往往於收呈之時詳細查詢訊取確供不依呈詞爲准駁但憑口供而斷結是以書役無所售其奸訟師無所施其伎政平訟理造福閭閻洵堪嘉尙此外墳山案件變幻多端頗

難斷結推求其故皆由粵東官山聽民造葬平日并不稽查亦
不立法牽制以致紛紛訐控迭啟爭端該令擬請分鄉設立墳
山局選派公正紳士誠實佐雜會同經理將通縣一切墳墓詳
細查明給照承管此後添造新墳均需赴局報勘給照以杜爭
佔是亦止訟息爭一勞永逸之法仰卽妥議章程通詳立案俾
垂久遠惟新墳給照酌取照費作爲局中薪水雖爲數無幾而
小民暗於遠識吝於小費或致藉口阻撓且各局員紳人品難
齊貪廉不一更恐藉端擾累應另籌款生息以備支銷庶免流
弊是爲切要

平遠縣全令稟批

州縣一官百姓稱之曰父母自稱曰子民顧名思義古人所以有保赤之喻也夫保赤者必時其飲食體其寒煖察其笑啼防其疾病事事出於至誠保民者亦必視其饑寒憫其疾苦勤其訓誨化其愚頑事事出於無偽蓋無偽則有實心有實心而才有不及力有未逮皆可隨其分量多所設施若無此實心必視民間之事毫不關切雖有才智徒工粉飾而已安在其爲民父母乎來稟於該縣情形寥寥數十言半多粉飾一似無所事事者夫州縣何事民之事卽其事也民之黠者有書役所以約束之者有事民之秀者爲士子所以培養之者有事民之愚者散

[REDACTED]

雷州府張守稟批

太守居二千石之寄筦千餘里之地行其所學其有濟於民生者大矣來稟所陳十事一曰端表率二曰謹關防三曰厚風俗四曰育人才五曰重名器六曰順輿情七曰興水利八曰嚴緝捕九曰重海防十曰廣懷保均各有條有理深堪嘉尚惟其中有可以推行盡利者亦尚有流弊當防者如各屬詞訟原不可不速爲審理然輕准固恐啟訐告之門紛提亦恐多滋擾之累此流弊之宜防者一也宅門設立號簿固可嚴內外之防亦可絕苞苴之弊然使日對吏胥丁役不復親禮賢士大夫不特壅闕下情亦且無以自輔此流弊之宜防者二也保甲團練相輔

而行誠爲地方要務然行之而善則有靖內攘外除莠安良之
益行之而不善則有急病於擾緩病於弛藉病於繁之累此流
弊之宜防者三也至若嚴禁歌戲以厚風俗修復書院以育人
才繳驗捐照以鈐職監革除壟斷以順輿情添設新聞以興水
利籌修礮臺以重海防分飭委員以赴各鄉傳種洋豆以廣懷
保均可推行盡利以期有濟於民生者也該署守舉此數利倘
又能杜絕利中之弊將龔遂之蜚聲渤海張堪之爲政漁陽當
不難後先媲美矣幸勉爲之

蒼梧縣王令察看地方情形稟批

地方官職在牧民民之事卽己之事也一舉一動皆須從民生起見舍爲民而言辦事其可知其居官更可知矣先經本爵署部堂諮詢各屬利弊情形當據該前縣謝代令遵札稟覆所有一切應辦事宜如保甲緝捕錢糧詞訟積穀墾荒諸要政靡不於批稟中詳悉訓告冀可遵行不謂該令回任以來仍若視爲具文並未講求及此無乃該前令不復舉告耶亦抑該令不欲遵行耶查蒼梧地當孔道雜處五方保甲之行實爲目前第一要務蓋保甲行不但可弭盜賊詰奸宄也以之稽田賦則錢糧不能拖欠矣以之清詞訟則勾攝不至羈延矣以之勸蓄積

則居民之貧富閭閻之息耗均可按籍而稽而歛散調恤不至多寡混淆矣以之查荒地則高原下隰之性山林川澤之宜均可瞭如指掌而別材區種不難因地利民矣是故一行保甲而眾善備舉行之不善而小民滋累要在爲州縣者周覽封域體察人情省其煩費絕其擾累簡節而疏目推誠而布公行之以實守之以恒斯不勞而理矣幸勉爲之

奉議州俞牧稟批

昔人論治以不取爲與以不擾爲安而於邊徼改土歸流之處尤爲切要蓋改流之地向化未久人心不齊地方旣苦於凋殘民情復各懷觀望偶有興舉必至騷動此一定不易之勢也據稟該州應興之事莫急於移建州城於土田舊州乃檢閱前卷暨現今來稟究其所以欲改之故則以該處紳耆情願按畝派夫仿照奉議修築土圍估計一切工料約銀萬兩有奇夫按畝派夫勞民已甚需款鉅萬傷財實多以凋敝之民情兼值庫儲之支絀無怪司計者之慎於出納議駁難行也竊謂

國家之事計久遠不計目前當費者原不必惜可惜者竟不必

費以土圍而需帑萬金是則可惜之甚者查另稟謂改建州城之議始於徐升司現在該司親主西省會計於該州情形司庫盈納均所深悉仰卽就近稟商以圖一勞永逸如果僅築土圍似不足以資守禦徒覺勞民傷財枉費可惜仍不若以不取爲與以不擾爲安猶爲因地制宜因時便俗之計也尙慎旃哉

遷江縣姚令稟批

民本愚也居官者無以伸其教何以化其愚民本貧也居官者無以導其養何以救其貧然教之養之方又非徒事文告科條遂可家喻而戶曉也亦非專恃智取術馭遂可心悅而誠服也惟痼瘼在抱事事出以至誠斯耳濡目染自不難潛移默化矣據稟該縣情形山多田少地瘠民貧戶鮮蓋藏田多荒蕪中稔之年尙可敷衍荒歉之歲必至饑寒該令諭種雜糧俾資補救廣籌樹藝勸課蠶桑深得教民養民之術乃蠶桑雖已勸課而創始倍覺艱辛繭絲雖已紡成而消售苦於無地以致迭次勸令不肯始終學習是殆未能出以至誠而立法亦未周密故

也夫小民衣食之資倘能驟然獲利民自爭先爲之何俟於官之指示其一時不能有利而小民力薄計短難於興舉必須官爲引導官爲籌畫者正自不少該令擬設售絲轉運局并復延師教習使各易於得利將來漸推漸廣自不難於樂從幸勉爲之至於添改官弁一事原爲綏靖地方鎮撫邊氓起見應卽就近稟商該管道府酌奪情形另行通稟核辦可也

澄邁縣李令稟批

吾輩居官治民亦猶學者之窮理盡性一般爲學者必精益求精進益求進爲治者亦必治益求治安益求安務遠大不務目前期百年不期旦夕庶幾近之來稟謂該縣民情純樸不尙奢華偶有爭端尙易剖斷旣少作奸犯科之事亦無藏垢納汙之所士子讀書頗堪造就農桑水利亦尙講求洋面之港汊雖多巡防有備團保之奉行以實窺伺全消以故四境帖然民皆安業在當局者或以爲己安己治不必奮發而有爲而不知四境帖然民皆安業正吾人得所藉手可以治益求治安益求安之際也就來稟而論如所云士子讀書頗堪造就則所以造就之

者宜亟也農桑水利尙知講求則所以講求之者宜殷也內黎
外海防範難疏保甲團防稽查匪易則所以防範稽查者又當
如何至周至密也該令身膺民社圖治數年既已粗具規模更
當勤求上理毋因難而見阻毋因易而稍疏毋以目前而弛遠
大之謀毋以旦夕而忘百年之計斯得之矣幸勉爲之

廣西融縣隆令稟批

官場習氣每日自上及下忙忙鹿鹿雖有治民之排場全無及民之實事此而求其盡職也難矣來稟謂該縣地方廣袤約四五百里自經兵燹而後元氣未能盡復加以游手好閒逞兇滋事刁紳劣監構訟殃民官其地者不可不亟爲挽回補救也夫挽回補救之方總不外教養二字所謂教之養之者非必家喻而戶曉也亦非必家賜而人給也惟在周覽夫封域體察夫人情計一邑之中有田有業者幾何人無田無業者幾何人有田不耕有業不勤者又幾何人於是教之以耕耨教之以墾種教之以濬畎澮教之以遠服賈教之以量出入教之以崇節儉教

之以多蓄積教之以衛身家而又勤宣化導多設義學厚給膏
火廣培書院務使官之意入乎民民之意體乎官官民聯爲一
體斯教養得所措施其有饑寒交迫作奸犯科者或寡矣該令
民社初膺履任未久其於官場習氣諒亦所染未深幸卽捐除
治民之排場而必講求乎及民之實事斯地方之元氣可期漸
復而民生之凋敝亦不難挽回補救矣

鶴山縣慶令稟批

天下之治始乎縣縣之治本乎令縣令之賢否視乎治事之勤惰有其事而無其功自問可以無愧若憚於勤勞耽於安逸併其事而無之雖有長材亦無所取來稟於諮訪地方情形逐條登復并將現辦事宜列摺陳報雖未必悉臻妥協其爲留心吏事勤求民隱於此可以想見查摺內命案牽控一層實爲粵東惡習然與其分別減省僅杜被誣之累曷若嚴懲訟棍以清刁告之源城鄉義穀迭經籌捐添買並由敦仁局節省經費逐漸增加意美法良事歸實濟但須選派廉明公正之紳妥爲經理庶可歷久無弊文教之興固當多設義學而義學之設尤貴勤

加督課方能有益至若聯和土客設公局以排難解紛勤慎催
科禁書差之藉端擾累清查客產務使一律繳價庶隱匿之輩
不至再事玩延整飭團練務期同心協力庶守望相資不至毫
無實際此外慎冬防勤緝捕均係目前要務該署令變通辦理
尚覺措置裕如倘從此而行之以實守之以恆當不難治臻上
理矣

儋州張代令稟批

昔賢謂天下得百自了漢不如得一熱腸人自了漢祇知有己不知有人而斯世斯民何所依賴熱腸人隨時隨地必期於世有益卽於己有損亦所不顧據稟該州情形土瘠民貧地方疲敝家無擔石之儲室鮮倉箱之積每年征收錢糧不過七分而耗折傾銷批解散放約需賠墊五六千金雖奉給予津貼而辦公之外殊不足抵其虧累乃該代令暫權斯缺卽能酌劑盈虛設法補救并擬倡捐廉俸勸積義穀嚴禁械鬪止息訟端設立門牌稽查保甲是皆有益於民之事雖未必於己有損而具此熱腸轉覺缺分之瘠苦時地之久暫均不足以介意洵堪嘉尚

惟是言之可聽尤貴行之可觀該代令現以握篆數月凡所謂建設社倉捐籌積穀者果其辦有成數一律遵行乎抑亦尙未舉辦乎所謂諭飭各紳嚴禁械鬪者果其改過自新共遵約束乎抑亦仍前私鬪乎所謂編排保甲設立門牌者果其清查得實足安反側乎抑亦奉行故事乎是尙未可知也所願言行相顧奮發有爲毋蹈於因循毋流於粉飾毋存五日京兆之見毋忘熱腸辦事之心是爲至要

陵水縣蘊令稟批

養民之計衣食爲先勸課之方農桑并重故武侯居西蜀有桑八百卽謂子孫可小康張詠治崇陽拔茶植桑遂使百姓致富足郭子章云婦不績則逸逸則淫淫則男子爲其所蠹蝕而風俗日以頹壞可知蠶桑之教其關係誠非淺鮮也陵水桑麻遍野而百姓不知其名且天時多熱少寒養蠶必能得利乃土人既不識此物官吏遂不復留心以致利未盡於土宜人多流於放佚肩挑負販置女紅於不知蕩檢踰閑竟淫奔而鮮恥是誠風俗之極敝而賢有司所當亟爲轉移者也該署令蒞任以來卽將蠶桑利益剴切示諭並捐廉函託省友代購蠶事諸書紡

織器具相與講求勸課以期俗革利興誠爲切要之計惟是小民之事可與樂成難於謀始官司之事言之甚易行之實難該署令有志善俗勸課蠶桑務須講求實效毋有初而鮮終至於清查保甲舉辦團防作育人材振興文教防黎必清其接濟捕盜力戒乎因循是皆地方官所宜加意整頓以期措施盡善者也幸勉爲之

廣西百邑同知梁丞稟批

三代田制無所謂屯田也自漢文帝用晁錯議募民耕塞下始有屯田之說漢武帝通西域後屯田渠犂始有屯田之名其後輪臺車師烏孫伊吾皆西域屯田之處芍陂南陽合肥金城又皆用兵屯田之所唐制營屯並置然當時襄州營田亦調取鄰州之兵宋之邊州屯營又不限兵民法隨時變故制難定符攷其大略殆亦古人寓兵於農之意也今該廳奉飭開辦屯田查勘荒地分別墾種扼要屯防既可藉兵力以衛民復可得屯糧而節餉是誠安邊靖寇之至計而亦寓兵於農之良法也惟是屯田之法用之於邊荒則居民鮮少可無逼處之嫌用之於腹

地則村寨毘連易啟紛擾之累務須軍民一體文武和衷安定
章程嚴加約束庶衛民不致於擾民而實政得收夫實效是爲
切要至若嚴行保甲所以清內奸認真緝捕所以靖外匪是皆
輔屯防之不及而爲地方官所宜加意講求者也該署丞既有
撫民之責且兼表率之任幅幘旣廣措置宜殷慎毋以土例相
沿致使因陋就簡幸勉爲之

恩隆縣呂令稟批

改流新設之區總以安輯土流鎮撫邊民爲第一要義而招墾荒地開辦屯田實爲安輯鎮撫之良法該署令奉飭舉辦卽擬以現留之兵勇墾舊有之荒田並由營縣籌給牛種農具不敢動支公項遇有客民散勇准其一體承墾務使田不拋荒兵皆足食卽將來邊軍遣撤亦不虞安插無方洵爲因時因地澈始徹終之至計惟是兵勇屯墾約束須嚴安插流亡撫綏宜書有治人而有治法庶衛民者不至擾民該署令旣已擬議章程仰卽通稟核辦毋稍遷延是爲切要至若地方之僻山川之險風俗之惡民生之病物產之嗇是皆土例相沿迭遭蹂躪所致然

正惟其沿土例而遭蹂躪也故

朝廷改土歸流設官蒞長以治之官其地者惟有寬徭役謹賦
稅勤化導廣栽培務使地方由敝而復完山川雖險而可恃去
民生之病以興利化物產之嗇而爲豐卽風氣之惡亦必從容
整頓以期漸臻於美是在良有司之善於鎮撫善於安輯而已
幸勉爲之

永濟縣張令稟批

士大夫有言之可聽而行之絕少實際者非言之不可行實行
之有未逮也來稟謂正本清源之治必自官之一身始官正則
民不敢以邪妄干官公則民不敢以私曲試官廉則民不敢以
賄賂貢官明則民不敢以朦混嘗持循既久相信以心滑吏無
所用其奸蠹役無所施其伎似亦深識政體言之可聽矣乃察
其所爲如所云捐助賓興以伸士氣者不過曰總期實惠均沾
而所以捐助與否未可知也所云按團派辦以復義倉者不過
曰但得倉有蓄積而所以勸辦與否未可定也且保甲一役知
其所以弭盜賊而互相稽查之外並不舉辦團練且復收繳軍

器是使內匪雖清外侮何得而禦也訟棍主唆知其爲害於閭閻而收呈駁結之餘僅使著名劣矜始終不獲一見是雖苞苴可免而蠹棍何由而除也此外禁賭博儆游惰講鄉約興教化均各津津樂道而究其實際其於公正廉明四字尙覺未逮幸卽循序漸進切實以圖毋務諸事皆辦之名而蹈一事無成之誚是爲切要

嘉應州陳牧稟批

古稱循良之吏自漢迄唐如龔遂朱邑輩其治績皆不可多觀
今之牧令苟能使公庭之上多事化爲少事有事化爲無事雖
未敢遽稱爲循良其於循良之吏殆亦近之來稟謂該州情形
民多好訟每以鼠牙雀角之爭輒爲架聳牽連之狀甚至因細
故而續起鉅端以微嫌而釀成重案加以訟棍教唆播弄因之
獄訟繁興種種惡習殊堪痛恨該署牧自抵任以後設法清釐
審結新舊詞訟將二百起上控案件亦卽逐一清結分別詳銷
遂使詞訟稍稀民情大順洵所謂多事化爲少事有事化爲無
事良深欣慰至若編查保甲盜賊得以潛消添買義穀凶荒得

以有備勸種樹木俾山谷得免傾卸之虞懲治誘姦俾婦女不受淫詞之惑雖民情惑於風水驟難轉移業產習於紛爭殊難究詰誠使地方官留心體察加意挽回務使狡詐之風著誠而去僞澆漓之習革薄而從忠斯則良有司之後效也該署牧有志善俗力求上理雖未能遽期於古之循吏幸卽勉爲今日之良吏焉斯可耳

陽朔縣表令稟批

爲治以教民爲本如果隨地隨時隨人隨事諄諄教誨民自多
所感化所謂善政不如善教之得民也來稟謂該縣風氣近習
浮華服食婚喪務求美備賽神演戲不惜貲財相習成風牢不
可破是皆有司失教之故也查民間財用祇有此數大則早納
官糧可免追呼之苦次則多留餘蓄可備終歲之需此外飲食
衣服但求溫飽冠婚喪祭毋事奢侈卽報賽田功而雞酒豚蹄
更多誠意當歲時伏臘而汗罇杯飲饒有古風誠使地方官朝
夕訓誨出以肫誠民雖至頑有不翻然改圖者哉至於錢糧習
爲欺隱雖緣冊籍之無存如果稽查得法自不難踴躍輸將小

民樂於爭訟雖緣訟棍之教唆但使審斷持平亦何至是非顛倒他若考課書院則文教可以漸興編排保甲則閭閻可以安堵開墾曠地則田土不至荒蕪廣種棉花則婦女可資紡績是在良有司之多方教誘而民心風俗所賴以轉移者也該署令身任地方實有教民之責幸卽悉心化導次第講求是爲切要

天河縣陳令稟批

荒政古不絕書獨未載有瘟疫政惟辛公義爲岷州刺史俗畏疫病一人病疫合家避之病者多死公義欲變其俗分遣官吏巡行部內凡有病者皆輿置廳事時值暑疫病者或至數百人廳廊悉滿公義設座其間以治事所得秩俸盡用施藥延醫療治躬視飲食病者悉以差今天河地方自秋冬以來人民多染疫症而邊隅民俗祇知祈禱不信醫藥以致傳染衆多病亡迭見該令捐貲購備藥丸發施療治又復集議倡捐設壇建醮巫醫并用以逐疫氣頗得公義愛民善俗之意殊堪嘉尙惟是一節雖有可觀而諸務尤當治理如所云土田不廣則闢荒開墾

之政所當因地利民也蓋藏絕少則義倉積穀之方所當乘時
勸導也物產未豐則區種別材之法所貴勞民勸相也膏火無
出則鼓舞振興之資所宜設法籌備也該令關心民瘼旣已拯
斯民於災癘尤當登斯民於仁壽之寓幸毋知之而不爲爲之
而不力是爲至要

富川縣汪令稟批

天下親民之官莫如州縣州縣之事莫切於勤察民生而務教
養之實政有事則在署辦理無事則巡歷鄉村詢民疾苦課民
農桑宣布教化崇本抑末善良者加以獎勵頑梗者予以威懲
遇有爭角細故就地剖斷以免差拘守候之苦如此從容歲月
始可收循良之實效不愧爲民父母矣該署令蒞任富川於茲
數月凡所謂興學校端士習課農田息爭訟查賭博禁私宰設
義學墾荒地編保甲積義穀均屬教養斯民之要政但須行之
以實出之以誠方可收循良之效否則空言徒託安在其爲民
父母也查西省現行開墾種植之令實爲目前要務所願地方

官於因公下鄉之便巡行勸課之時遇有閒曠土地卽傳所在居民詢其所以曠廢之由考其可以種植之物無水者導以水源無種者給以貲本有主之地聽其自墾無主之地許其認墾既種之後時爲稽查未墾之先力爲勸導惰棄者量爲懲處勤能者格外獎勵務使野無曠土邑鮮游民衣食旣足禮義自興此一定不易之理也幸勉爲之

定安縣陳令稟批

王制每歲仲春之月天子親耕后親蠶故蠶桑之利遍於天下
今海南之地天氣溫燠理宜蠶桑而來稟以爲地土不甚相宜
殆亦未能深知其利故民間不甚講求耳竊謂一畝之地種稻
不過收穀二三十石豐年值銀一兩有奇種桑飼蠶即可得絲八
九觔值賤亦易銀十餘兩且樹穀必需終歲勤勞猶有催科之
擾樹桑祇用三餘農隙兼無賦稅之繁功孰易而孰難利孰多
而孰寡況天時和暖長養尤蕃地脉溫潤滋生更易莫謂無地
可種道傍宅畔盡屬良疇莫謂土性不宜下隰高原均堪種植
莫謂不識養蠶種桑何益試思織女豈盡天生蠶經原可共讀

天下無不能耕之匹夫安有不能織之匹婦特患難於創始是以美利不興查陵水亦瓊州屬邑該縣桑麻遍野土人不識其名現在蘊署令購買蠶事諸書紡織器具相與講求興利勸課蠶桑雖未能遽求速效而因勢利導或不難聿觀厥成該代令近在鄰封幸卽諮訪而力行之毋以土性不宜坐失地利至爲切要

新甯州戴牧稟批

牧民之政其端甚多有戶口籍貫以奠其居有編甲防盜以禦其侮有勸農開墾以課其業有倉儲積穀以備其荒有義學書院以作育人材有宣講律令以維持風化是皆會典所載垂爲政要者也該牧蒞任新甯見城廂之居民不過百數十家而各處鄉村亦復人煙稀少則戶口籍貫尙待設法招徠也土漢之雜處已屬良莠不齊而關外匪徒又復時形擾害則編甲防盜尙需加意講求也且荒田廢土滿目荆榛而開墾分屯尙無成效則捐給牛種籌備資糧所宜因地制宜乘時勸導也城市鄉村向無義穀而捐廉創辦爲數無多則圖匱於豐廣爲蓄積所

宜先事預防綢繆未雨也至若考課書院所以作育人材宣講律令所以維持風化既經行之有效尤貴守之以恆幸卽因其所已能勉其所未逮勿流於苟且勿卽於便安勿因僻處偏隅而爲因陋就簡之計勿爲粉飾治具而忘久安長治之規是爲切要

歸順州石牧稟批

先儒有云一命之士存心利物於物必有所濟况堂堂百里侯耶該署牧蒞任歸順於地方一切要政靡不認真經理次第興辦而於積穀育嬰兩事尤爲勤勤懇懇加意講求洵堪嘉尙惟是積儲建倉之法雖已籌畫精詳而散放賙卹之方尙未詳悉妥定蓋積穀旣由於義舉則立法非等夫社倉苟師其意而變通之卽不必推陳出新以求滋長亦不必秋還春借以較錙銖杜絕紛爭此爲最要至散放之時必先儘本村中貧獨無告之人次及極貧又次及中貧其稍可支持者似不必分給卽小歉之年亦不必動用此酌盈劑虛之至計也至若育嬰之舉原以

建堂收養爲要卽揚州之育嬰社長沙之六文會均可仿行惟
僱媪乳哺非其親生痛癢不關常致疾疫不如查係實在貧乏
生女不能自育者按月酌給衣糧聽其自己撫養母女天性自
必愛惜且本婦方靠此女月領衣糧尤覺愈加保重其有來歷
不明暗地送堂之女勢不得不僱備乳媪但需不時查察以防
凌虐之弊是爲切要該署牧存心利物將來推廣行之於物必
有所濟幸勉爲之

羅城縣社令稟批

昔于清端令羅城其始也攝之以威其繼也感之以誠比及五
年官民親睦犛獠狎狼之種相與環集問安如家人父子而民
俗婚喪之事亦皆行之以禮此初入版籍之時其治效尙復如
斯之邇來涵濡

聖澤二百餘年風俗人心當必有遠勝夫前者乃來稟所云縣
俗同姓爲婚男女無別唱歌招贅一女數夫而婦女老疾身故
外家親族動輒結黨成羣攔棺阻葬勒索財物滋生事端一切
風俗匪獨不能遠勝於前甚且今不逮昔該令自履任以來曉
以律今之條澤以詩書之氣於城鄉則增設義學冀可化迪乎

願蒙於書院則廣籌膏火用以振興乎士氣於貞烈節孝則捐廉請建總坊既可以示表揚卽可以維風化於孝弟忠信則編成簡明告示既使之淺近易曉卽可期默化潛移至於收養孤貧療治疫癘編查保甲勸種樹株設更棚以梭巡水陸捐米粟以賑濟災黎俱覺實政實心推誠相與如果令行禁止俗易風移將于清端之政績當不得專美於前矣幸勉爲之

上林縣李令稟批

司牧民者不外興利除弊二事顧利民之事不一而足也卽蠹
民之弊亦不一而足今以一州一縣之大勢言之如田土荒蕪
則開墾卽其利樹木鮮少則種植卽其利物產不多則區種別
材卽其利水源不暢則蓄洩引導卽其利且也力役未均萑苻
多警則清查戶口編排保甲此利之在一時者也獐獍襍處頑
梗性生則振興學校變化氣質此利之在百世者也又况天下
之事有一利卽有一弊從無百利而無一弊者其始也因利立
法而利卽伏乎法之中其繼也變法救弊而弊又生於法之外
如地棍滋擾訟師教唆以及窩盜聚賭等事此弊之在民者也

錢糧浮收夫馬勒派以及傳詞結費等事此又弊之在官者也該署令蒞任上林以來於修復二壩水利之外亦似別無可興之利於禁革聚眾賭博之餘亦似別無可除之弊至於教稼勸學理訟伸冤或清查保甲或嚴禁蠹胥雖有隨時興革之言究少實政及民之效其於留心吏事未免僅託空言幸卽奮發有爲毋蹈粉飾因循之習是爲切要

容縣文令稟批

自古迄今言治術者總不外教養二端勤化導於先嚴勸懲於後皆教也廣開地利無奪民時皆養也今來稟所陳該縣民情尙稱樸厚惟心地暗昧不辨是非若非振聵覺聾終難潛移默化該令自履任以後每於朔望宣講

聖諭并多請講生分詣各鄉講解律令條例刊發勸民訓俗各歌詞以及陰隲善書等類廣爲化誨又復延師分掌義學督課書院得以文風日上鄉薦頻膺其有恃符扛訟劣蹟最著者并卽詳革示儆洵所謂勤化導於先嚴勸懲於後矣教民之術實不外此至於養之一字凡所爲勸種雜糧廣籌樹藝儲積穀以

備凶荒編保甲以防盜賊收斃獨無告之人以養其老設育嬰
洋痘各局以慈其幼并復捐置義地收瘞暴露棺骸以冀挽回
澆漓之習俗其於養民之義更覺無微不至無美不備誠使行
之以實守之以恆將陽城所謂撫字心勞者當於該令見之矣

凌雲縣趙令稟批

昔人云催科無他術不擾卽是善術所謂催科不擾卽催科中之撫字是也寇萊公知巴東城安兩縣每期會賦役未嘗輒出符移惟具鄉里姓名揭縣門百姓莫敢後期楊誠齋知奉新縣禁胥役不入鄉民有逋賦者揭其名於市民謹趨之而賦自足葉公衡知於潛縣徵科預爲期限列榜縣門不遣一吏而民爭先納賦此無他不擾而已今該縣錢糧每歲僅收五六成近來盡力催征亦僅收七成有零推原其故半由田畝之荒蕪半由土豪之包抗夫所謂包抗者謂其包眾戶之糧而抗欠於官也誠使地方官催科得法不使書差擾累彼眾戶者又何樂不以

應輸之錢糧輸之於官而輸之於劣紳刁監乎此其中殆有難言之隱矣今欲究治包抗曷若嚴察書差正本清源此爲最要至若田畝荒蕪必以開墾爲第一要務蓋土地闢則閒民少閒民少則盜賊稀匪獨田賦可以復額而種植旣多物產自富衣食旣足禮義自興其有饑寒交迫流離失所者或寡矣幸勉爲之

左州曾牧稟批

衛文公大布之衣大帛之冠務財訓農通商惠工敬教勸學授
方任能元年革車三十乘季年乃三百乘厥後大聖人至衛遂
有庶哉之嘆而富教之施亦不難次第加之矣來稟謂該州戶
口統計一千八百餘家而兵燹之餘元氣未復兼之民習游惰
戶鮮蓋藏物產固屬無多商販因而屏跡士人質野樸陋無文
是在良有司休養生息以循致乎富庶之象焉斯可耳夫富庶
之道總不外務材訓農通商惠工數事今計一州之域有田有
業者幾家無田無業者幾家有田不耕有業不勤者又幾家於
是教之以耕耨教之以墾種教之以攻器教之以飭材教之以

潛畎澮教之以遠服賈教之以多蓄積教之以崇節儉其有不
率者復爲之董誡訓誨務使農聚於疆工聚於肆賈聚於市男
年十六而不執業女年十三而不治絲枲者罰其父母洵如是
也民焉有不旣庶且富者哉蓋至是而澤之以詩書嫻之以禮
讓衣食足而禮義興教化行而風俗美是又在良有司敬教勸
學授方任能有以致之也幸勉爲之

馬平縣顧令稟批

人情安於土著而重去其鄉故服穡力田人多自愛而不敢犯法自軍興以來羣趨召募游手無執業者靡不倚營伍爲生計豪強者趨於是獷悍者趨於是椎埋剽竊作奸犯科身陷文網者亦莫不逃之尺五以俸其解免一旦汰之使歸問其恒產無有也問其恒業亦無有也囊篋金盡計無復之不爲溝中瘠則爲萑苻嘯此固天下之通患而非獨一鄉一邑之患也來稟謂該縣盜案之多實緣散勇歸來毫無恒業而獷悍性成遂至流爲盜賊因欲查辦保甲以清其源聯絡團練以除其黨是亦思患預防之一法惟是防之使不敢爲盜不若養之使不願爲盜

查西省荒地極多開墾一法實爲目前第一要務誠使地方官
留心查察擇其可耕之地招集無業散勇予以貲糧給以牛種
有主者准其代墾無主者聽其認墾卽山頭嶺角令其廣種雜
糧多蓄樹木暇則察其勤惰時用勸誡數年之後有業者可漸
致富饒無業者亦可藉資溫飽其有饑寒失所流而爲盜者或
寡矣幸勉爲之

徐聞縣嵩令稟批

巫師邪教例禁綦嚴拋骨挖骸罪名非小至於捏詞誣告尤屬律有明條該令履任徐聞將民間習巫弔骨誣告等事一律設法查禁並訪拿著名習巫之夢婆從重責究其有棺骸暴露日久不葬者亦卽由官檢埋并拘其子孫治罪凡架詞妄控譎張爲幻者一經審實隨案重懲用能革除陋習力挽澆風殊堪嘉尙惟是地土磽瘠兼乏水利以致物產之豐嗇恒視雨澤之應時則鑿池築堰之方實爲該縣第一要政誠使地方官於農隙之時親行境內查明溪流之遠近相度地勢之高低或令開塘以資灌溉或令築堰以備旱潦或舊有溝渠而淤塞者宜設法

以通之或近有畎澮可疏濬者宜設法以導之其有關於鄰封者卽詳明移會同心協力以治之總期有益於民生毋致擾累乎百姓是在良有司之亟爲講求者也至若辦團防以資捍衛編保甲以清盜源尤爲當務之急該令旣已舉辦定須實力奉行所擬添設扒船巡緝洋面尤爲綏靖海濱之至意仰卽稟商該管道府妥籌辦理可也

河池州陳牧到任察看情形稟批

昔鄭褒守濟陰下車卽旌表孝悌敬禮賢士王希呂所治郡敬禮文學端方之士程迥所厯縣有隱德潛善必表而出之以勵風俗凡蒞一方苟能於學行端方好善樂施之士及孝子節婦時一存問而慰勞之或旌其門以表彰之亦闡揚風教之一端也該牧初蒞河池卽諭令闔屬紳耆採訪安貧爲善之儒守節全貞之婦公同舉報由州存問慰撫并復捐廉修理書院厚給筆貲膏火獎賞清釐善堂推廣恤孤葆貞施棺等事深得闡揚風教之義洵堪嘉尙惟是邊方節孝不比中土雖匹夫匹婦一節可取亦須表而出之以作其向善之氣其有兵火之際玉石

無分同遭慘戮或自縊投水者此等雖無證據亦鮮事蹟亦當
詳請於被難之處建廟置主並表其墓以慰幽魂至若編查保
甲講求緝捕嚴禁爭鬪勸息訟端俱係地方官切要之事幸卽
次第舉辦毋稍疏延是爲至要

新甯縣松令稟批

漢張綱云豺狼當道安問狐狸生當

聖世諒無大慙大惡亟爲民害如所謂豺狼當道者若十室邑
中鬻呈詞以資生計三家村內逞強蠻而討便宜此狐狸耳蒞
之以清明綏之以德意自跽伏而不敢動又何事多所顧慮哉
來稟謂該縣民情蠻悍性喜爭訟因欲聯保甲以弭亂源息刁
訟以厚風俗立社倉以備緩急設義學以化愚頑此皆目前當
務之急乃因不利於刁棍辦理恐多掣肘是誠何說哉夫所謂
刁棍者不過魚肉善良擇肥而噬之輩誠使地方官蒞之以清
明綏之以德意而又勲勲懇懇時加訓誡遇有爭角細故速卽

剖斷公平彼刁健之徒又何所施其伎倆耶昔陳元方居太邱遠近化之此無他強者綏之以德弱者撫之以仁而已呂文清云仁人所處能變虎狼況人類乎該署令志在有爲而以刁棍掣肘是慮毋亦內有不足而綏之者有未至歟幸卽振刷精神認真整頓乘可爲之勢操得爲之權爲所當爲卽爲所欲爲毋過於瞻徇毋流於畏葸毋故示怯懦而爲刁紳劣監所把持毋稍涉游移而爲靡文陋習所遷就是爲切要

義甯縣洪令稟批

圖治之道不外興利除弊方今久道化成閭閻安業無甚可興之利惟有力祛其弊而利卽在其中矣來稟所陳數事一曰清國課二曰端士習三曰正民風四曰阜財用五曰靖盜賊而終之以利求其可因弊去其太甚深得圖治之要殊堪嘉尙惟是五事之中有利卽有弊弊革而利始興此一定不易之理也查錢糧之弊在於隱匿而隱匿之弊又在吏民之表裏爲奸今欲杜民間之欺隱必先嚴書差之侵漁去其侵漁毋使擾累則民享其利矣此所謂催科不擾卽催科中之撫字是也詞訟之弊在於命盜而命盜之弊又以糾眾抄搶爲最今欲杜抄搶之惡

習必先究峻訟之刁棍嚴懲刁棍毋使搏噬則民受其利矣此所謂刑罰不差卽刑罰中之教化是也至若勸民墾種所以阜財舉行保甲所以弭盜而聯團積穀諸事卽隱寓於保甲之中教士惠民之政復并行於勸課之暇是皆大利之所存而積誠以導之切實以行之可以經久而無弊者也該令旣知因民之利去民之弊幸卽奮勉爲之是爲至要

來賓縣楊令稟批

盜賊多起於貧窮貧窮多由於無業自來以保甲爲弭盜之計不知防之使不敢爲盜仍不若養之使不願爲盜也養之之法莫先於重農事而農事之重又莫要於興水利墾荒田二事查來稟所云該縣民情懶惰不事深耕不講水利以致亢旱偶形遂爾盜賊蠡起現在清釐伏莽查辦善後招撫流亡舉行保甲是皆補苴於事後而未能籌畫於事先者也誠使地方官留心民瘼於平時詳問境內有無陂塘溝澮壞者修之廢者復之泛溢爲患者則築隄以捍衛之源泉歉少者則穿鑿以引導之水利旣興勸民墾種凡山頭嶺角以及不可耕之地亦必相土所

宜廣種雜糧多植果樹以佐五穀之不足而又時其訓誡察其勤惰遇有農家涉訟速爲斷結以免廢時失業之苦如此則農事興矣由是而酌其豐稔之歲勸籌積穀以備荒遇有游惰之民并申董戒以示儆然後嚴行保甲以靖內奸整飭團練以禦外侮撫字旣得催科不勞其有饑寒流而爲盜者寡矣該令調任武宣行將有日幸卽詳告後任次第舉行是爲至要

甯明州劉牧稟批

天生萬物以爲人用火蠶冰繭皆可爲絲吉貝婆羅皆可爲布然出產不常組織非易閭閻往往難之求其取多用宏價廉工省貴賤咸宜貧富皆便者惟棉花爲最上該州曠土甚多現奉通飭查辦荒地設法墾復并令民間從事蠶桑其旱地宜棉者卽令種植棉花以裕生計洵爲目前第一要務但蠶桑之利邊民旣未周知一時恐難收效惟棉花則無地不宜無人不暇入口之家種棉數畦便可無憂號寒况寸絲之值可買尺布而衣布之人又百倍於衣絲且織布易而織絲難教以難者或未必率從教以易者庶可冀其就業所願賢有司悉心勸導加意講

求務使比戶連村各勤墾種共享無窮之利則厚幸矣至於錢糧短征皆由於荒田未闢誠使種植之令旣行則小民之衣食自足蚩蚩者氓自無不樂以急公奉上之心爲感激圖報之計撫字旣得催科不勞有斷然者此外編保甲練團防設義學課書院懲蠹棍息訟爭皆係地方要政幸卽次第舉行認真整頓是爲切要

龍州同知蔡丞稟批

古稱循吏如龔遂其政績所傳不過曰賣劍買牛賣刀買犢而已所以然者謂其首重農事故也今該丞分治龍州於地方農務編成因利錄一帙其間上稽天時下察人事旁及於溝洫水利積糞肥田開墾闢荒蓄材種樹并附以柴草瓜果牲畜工藝諸事其所以爲民謀衣食制財用者誠無微不至晰無意之不周矣乃行之兩年未見稟陳實效無亦小民之事可與樂成難與慮始耶亦抑官司之事言之雖易行之甚難耶自今以往所願賢有司於因公下鄉之便巡行勸課之時就其地土情形勸其開溝積糞遇有曠閒土地卽傳所在居民詢其所以不種之

由考其可以種植之物無水者尋水導源無本者借本代覓有
主之地聽其自種無主之地許其認種既種之後時爲稽查未
種之先時爲訓課務使已行未效者接續舉行遵行不怠者格
外獎勵玩視不行者酌量究懲而又無力役之征以擾之無緩
結之訟以累之俾蚩蚩者氓各得盡力於南畝洵如是也四境
之土宜物產時懸於官長心目之間牧之早作夜思不越乎小
民身家之計將古之所稱循吏不是過矣幸勉爲之

蒼梧縣古今到任情形稟批

今之州縣朝更暮改其爲地擇人乎抑爲人擇地乎蒼梧自去秋迄今未及半載而三易其令在不知者或以爲爲人擇地矣而不知上官之意實欲爲地方擇人故耳不謂該署令到任以來仍無振作之意所陳一切情形半係虛詞虛意絕少實政實心可見前去後來猶吾大夫也查該前縣謝王兩令暨該署令前在藤縣任內稟陳地方情形均以未能切實迭經本爵署部堂批飭訓誡不啻三令五申豈該署令全未省覽耶抑亦不欲遵行耶夫地方之事常有認真經畫切實講求尙未能推行盡利者况絕不經心全未留意徒事空言塞責而可措置裕如者

乎就來稟所云如團防保甲不過曰以期匪戢良安而所以安戢之法并未嘗講求及之也撫字催科不過曰自宜悉心籌畫其如何籌畫之處亦未能切實指陳也此外興養立教之方因革損益之道以及應辦各事宜更復不少該署令調茲衝要責任匪輕亟應振刷精神勤求上理幸毋自安沓泄致負委任切切

宜山縣霍令到任情形稟批

昔人云有治人無治法所謂無治法者謂不必拘泥成法以圖治非謂其不必循法遂可貿貿焉以圖治也據來稟所陳縣屬土漢毘連苗犛雜處山多田少地瘠民貧加以良莠不齊稽查必需嚴密匪踪莫測緝捕不容稍疏錢糧以逋欠爲能詞訟以株連爲務是皆積習相沿亟應設法整頓庶可冀其力挽頽風者也該署令履任以來雖有整飭之心究少整飭之法如所云嚴團保以詰奸宄而所以嚴之詰之者初未嘗講求及之也所云抑豪強而安善良而所以抑之安之者亦未嘗切實指陳也所云撫字催科並行不悖勸農講學次第舉行者果操何術而

使之並行不悖立何法而得以次第舉行均未嘗籌畫精詳細舉而目張也語曰雖有絲麻毋棄菅蒯蘇子瞻云藥用良手方用古人該署令民社初膺幸卽舉保甲之成規農桑之舊說與夫獄訟賦役盜賊水利學校荒政凡令與之所垂憲檄之所飭靡不悉心而詳究之然後審察情形相度地勢就其所可行者設法變通實心經畫庶於地方有所補益幸勉爲之

陸川縣曾令到任情形稟批

人情好逸而訟則必勞人情好吉而訟則終凶人情好惜財而訟則多所耗費人亦何樂而爲是哉不得已也大凡物不得其平則嗚嗚矣而不得直則愈不平矣是在爲民上者有以平其忿息其爭斯得之耳來稟謂該縣民情逞忿好鬪健訟爲能巨族強宗互相雄長刁紳劣監動輒把持往往以田土墳山細故互相爭競羅織多人連呈屢訴刺刺不休迨至訊明結案而審輸之家又復砌詞翻控此等惡習雖由訟棍之挑唆要亦有司之未悉得其平也昔杜畿爲河東守民有訟者爲陳大義令歸諦思之嗣後少有訟者劉曠爲平鄉令以義理曉諭訟者皆引

啓去劉鉅爲雍邱令民有爭訟常引之於前提耳訓告以爲忿
恚可忍縣庭不可入訟者感之輒各罷去由是觀之善勸諭者
雖未必使民無訟亦不至屢訟不休矣該署令有監於此亦卽
婉諭紳民痛懲刁告并於生監作證者令其旁跪不訊一詞判
畢則查其錢糧有無拖款功名有無執照一一嚴加追究俾小
民知紳矜之不足恃不再聽其愚弄是亦止訟之一法但需審
斷公平諄切勸諭使民平其忿息其爭不至翻越則更善矣幸
勉爲之

連山綏徭同知景丞到任情形稟批

居官無他術祇需顧名思義便於職分無虧凡府州縣官皆曰知謂一府一州一縣之事無不當知也同知有清軍撫民海防水利之分亦謂其各專責成庶乎各盡乃職也該廳錫名綏徭是必以綏靖徭疆爲第一要義查綏徭之法如來稟所云民人不准擅入徭排徭人亦不准擅往民人村內凡徭人往來城市均飭理徭把總帶領隊目周歷巡查嚴行約束遇有爭角細故立與解釋調停或係自相忿爭亦卽檄行該把總爲之設法排解如果不能息事則飭令傳至三江行署秉公訊斷不使稍有屈抑致啟衅端是皆然矣然亦思所謂理徭把總者果能帶隊



遁虛來是時

[The remainder of the page contains faint, illegible text, likely bleed-through from the reverse side of the paper.]

鎮平縣程署令到任情形稟批

居官之患莫患乎上下隔絕而情意不通情意不通而不思所以通之雖孜孜求治無益也來稟謂該縣情形俗敝民刁動輒上控措置稍疏未有不受其挾制者因卽擬請上台遇有上控案卽將抱告發回以杜圖告不圖審之弊是亦止訟之一法第思此敢於上控之人豈盡好爲多事乎殆亦有情不得已者耳大凡物不得其平則鳴鳴矣而不得直則愈不能平此上控之所由來也今欲杜絕上控曷先勤慎治民誠使地方官有告卽審有審卽結秉公訊斷遇事持平官衙之是非旣分草野之爭端自息又何患挾制把持刁訟迭興耶至若土客雜處易起猜

嫌邪教惑民更滋流弊挖骸之寢成風俗賭博之爲害地方俱
係實在情形但使官民相親情意不隔示以睦婣任卹之規勉
以孝弟忠信之道而又察其情僞抑彼豪強雖有頑梗有不默
化潛移者哉該署令奮發有爲心跡昭著一鼓作氣之概時流
露於稟牘之間幸卽克葆初志仍以爲天下無不可教之民以
期無負所學焉斯得之矣勉之勉之

柳城縣曲令到任情形稟批

政莫善於養民而養民莫要於盡地利粵西山多田少本多未墾之地况兵燹之餘尤多曠棄加以水利不興旱潦無備農工不講磽瘠堪虞一遇凶荒民多乏食無業游民流而爲盜此一定之勢不可不亟爲挽回補救者也該署令蒞任柳城詢其致荒之由察其受困之故因卽講求水利導以蓄洩灌溉諭以積糞肥田教以工作器具之方示以種植樹藝之法并復推廣利益以冀其樂從籌及游民以安其反側養民之政莫備於此顧小民之事可與樂成難於慮始官司之事言之甚易行之實難所望實力實心有始有卒時其訓誡儆其游惰無力者酌給資

本勤力者格外獎勵而又無非時之征以擾之無緩結之訟以累之使得盡力於南畝誠如是也民焉有不各得所養者哉由是編保甲以稽其戶口練團防以衛其身家興學校以勉其善良旌淑德以作其士氣月計雖云不足歲計自覺有餘可以挽澆漓之積習卽可以基無窮之樂利矣幸勉爲之

昭平縣李令到任情形稟批

古稱治亂絲必斬治亂民必誅此語誠是然不得其緒而理之
絲可得而斬民不可得而誅也該署令稟陳地方情形於錢糧
詞訟保甲書院義倉義學亟宜整頓外其積弊所亟宜禁革者
莫如因訟抄搶擄人勒贖奪犯毆差數事迹其所云是亂民也
今欲治之別無良法惟有勤政親民寬猛相濟而已夫所謂勤
政親民者必先周歷鄉村詢民疾苦察民饑寒遇有田夫野老
與之道家常談風俗謀生計課農桑講水利教樹蓄勸勸懇懇
出於至誠設遇爭角細故卽爲剖曲直辨是非解紛爭釋仇怨
眾情悅服益爲之立鄉規設族長置義學作人材敦孝弟勸睦

嫻一切教養之事靡不以身先之而身勞之雖使父教其子兄勉其弟亦不能如是之周洽彼民也有不欣然樂從令行禁止者哉至於蠻悍之鄉豪強之族有非德化所能轉移者則必稍施辣手痛加創懲擇其不法之尤嚴辦一二以儆其餘此所謂猛以濟寬德威並用者也該署令身膺民社實有繭絲之責幸勿紊其緒而勞之是爲至要

揭陽縣林令稟批

疲是居官大病披覽疲則案牘不能詳閱而奸吏得以乘其惰矣聽斷疲則詞訟不能詳鞫而奸民得以售其欺矣勘驗疲則案情之變幻愈多而真偽得以混淆矣且也耽安逸而疲於下鄉則閭閻之疾苦何由識憚煩勞而疲於接見則紳士之賢否何由知尙坦率而疲於稽察疲於攷覈則諸務之叢脞凡百之廢弛有不待問而可知者矣該令身任繁劇有年於地方一切情形諒已知之深而籌之熟乃當奉札咨詢竟至遲逾半年之久始行稟覆察其稟中所陳亦不過敷衍塞責并未詳晰舉告其爲辦事疲玩卽此可以想見語曰官怠於有成病加於小愈

其是之謂乎要之身任地方責無旁貸應辦之事今日固辦來
日亦辦等辦也何不早爲之計乎當費心之事今日用之固費
來日用之亦費等費也何必故爲是緩乎又況州縣一身實叢
百務前事未去後事又來事愈積則愈多事愈多則愈難辦日
復一日將有經年累月不克清釐者矣所願振刷精神痛自刻
勵勿蹈因循疲玩之故習是爲至要

曾忠襄公年譜卷一

東湖王定安初稿
長沙蕭榮爵增訂

公諱國荃字沅浦號叔純湖南湘鄉人曾氏祖籍衡陽

國初有孟學公者始遷湘鄉荷塘都之大界里再傳至元吉
公族姓漸多資產漸殖遂為湘鄉人元吉公之仲子曰輔
臣公者公之高祖也 曾祖諱竟希

誥贈光祿大夫 妣彭氏

誥贈一品夫人 祖諱玉屏字星岡

誥封中憲大夫累贈光祿大夫 妣王氏

誥封恭人累贈一品夫人 考諱麟書字竹亭湘鄉縣學生員

誥封中憲大夫累封光祿大夫 妣江氏

誥封恭人累封一品夫人公兄弟五人兄國藩國潢國華弟國

葆後改名貞幹

甲申道光四年公一歲

八月二十日公生

乙酉道光五年公二歲

丙戌道光六年公三歲

丁亥道光七年公四歲

戊子道光八年公五歲

公始受學家塾九月公弟國葆生

己丑道光九年公六歲

庚寅道光十年公七歲

九月公妹生公姊國蘭出閣適王氏壻名鵬遠

辛卯道光十一年公八歲

壬辰道光十二年公九歲

竹亭公以府試案首入湘鄉縣學時公讀書穎異有以君子保身命對者或以小人有母對公在旁應聲曰帝乙歸妹人以是奇公

癸巳道光十三年公十歲

公兄國藩本年科試入縣學

甲午道光十四年公十一歲

公兄國藩是科領鄉薦中式第三十六名舉人

乙未道光十五年公十二歲

丙申道光十六年公十三歲

丁酉道光十七年公十四歲

公姊國蕙出閣適王氏壻名待聘 是年熊伯夫人來歸

戊戌道光十八年公十五歲

公兄國藩會試中式第三十八名進士改庶吉士

己亥道光十九年公十六歲

公姊國芝出閣適朱氏壻名詠春

庚子道光二十年公十七歲

十二月竹亭公入都公從

辛道光二十一年公十八歲

閏三月竹亭公出都還湘公留京寓肄業公兄國藩爲之

講課

壬道光二十二年公十九歲

七月公出都公兄國藩送之都門外蘆溝橋以詩爲別有句云辰君平正午君奇屈指老沅眞白眉公兄國潢生庚

辰歲國華生壬午歲公字沅浦也

癸道光二十三年公二十歲

甲道光二十四年公二十一歲

乙道光二十五年公二十二歲

丙道光二十六年公二十三歲

丁道光二十七年公二十四歲

三月初一日公長女生後適同邑朱式程 七月公以府

試案首入湘鄉縣學

戊道光二十八年公二十五歲

七月公科試一等補廩膳生

己道光二十九年公二十六歲

正月二十日公長子紀瑞生 十月初四日星岡公卒葬

於八斗衝遷王恭人之柩耐葬

庚道光三十年公二十七歲

正月十四日

宣宗成皇帝升遐

文宗嗣位 六月廣西賊匪大起巨股數十逆首洪秀全與其

黨楊秀清蕭朝貴等起於桂平縣之金田邨 七月公弟
國葆以縣試案首入湘鄉縣學

辛亥咸豐元年公二十八歲

是年廣西軍事日棘督師賽尙阿召新甯舉人江忠源赴
大營忠源募楚勇五百助剿是爲湖南湘勇出境剿賊之
始 八月廣西賊竄陷永安州城僭僞王號

雍正二年公二十九歲

正月初四日公次子紀官生 是年賊自永安犯桂林陷
全州入湖南境浮湘而下陷道州 六月十二日江太夫
人薨逝公兄國藩時得江西試差自安徽太和縣聞訃奔
喪 九月江太夫人葬於下腰里宅後山內時賊已陷郴
州自安仁醴陵犯長沙國藩以在籍侍郎奉

詔幫辦團練十二月國藩方草疏懇請終制庶吉士郭嵩燾勸
之出乃燬前疏至長沙公從爲國藩畫治兵三十二策其
後國藩勇與提標兵鬪乃歎曰三十二策惟一策未用乃
至此以是奇公

丑 咸豐三年公三十歲

公從國藩團練於長沙是年賊陷武漢東下陷沿江各郡
縣公弟國葆募湘勇一營屯長沙南門外

甲 咸豐四年公三十一歲

是年國藩大舉東征公回里館曾家垵頭兼肄舉子業

乙 咸豐五年公三十二歲

九月公考取是科優貢學使爲劉公岷 是年公兄國潢
國華皆治團練於鄉邑公亦辦鄉團

丙 咸豐六年公三十三歲

春公將入都

廷試抵長沙以寇警道梗乃報捐同知銜時江西八府五十餘縣皆陷存者惟南昌廣信饒州贛州南安五郡國藩孤居南昌爲羣賊所絀七月初二日公次女生後適衡陽歐陽定幹八月

特詔起黃冕爲吉安知府公時在長沙冕就商防勦策延公爲軍主公素負奇略念兄國藩急慨然曰方吾兄戰利吾從未至營相視今坐困一隅義當往赴君但能治餉吾當自立一軍赴

國家急冕請於巡撫駱秉章檄公募二千人會已革副將周鳳山領軍攻吉安號吉字營九月公在湘募勇多羅澤

南李續宜舊部 十月二十五日公率所部自萍鄉入周鳳山自萬載入期會攻安福趨吉安 十一月十三日公抵江口距安福三十餘里與賊遘以都司陳光孚蕭孚泗左右拒公當中路陣斬三百餘人躡至安福克其城周鳳山亦自清溪追賊至與公會軍壁東門外賊謀自吉安東大汾楓田來犯十七日我軍分三道進賊迎拒都司蕭孚泗守備劉之能歐啟貴等奮擊賊潰我軍進躡越大汾河十餘里吉城永新賊糾黨來援屯固江里田安福殘黨二千竄至竹江青謀據河拒我軍十九日周鳳山至河東北分五枝行三十里竹江青賊已先遁公自樓背洋口分三

枝兜勦里田賊賊集對河千金坡自山腰列陣拒我伏軍
隴中大村冀繞擊我軍蕭孚泗陳光孚自中左禦之張開
輯偃旗蛇行自右路鈔賊伏外賊自山半下撲我軍屹不
動甫逼急起突擊賊少卻大隊乘之賊踞橋東村石橋相
拒謀俟伏賊之勝卓旗回戰張開輯伏兵突自右路鈔出
賊首尾不能應大奔我軍躡之自固江亭子轉戰而前二
十四日遂抵吉安 十二月旁邑賊屢援吉安我軍三敗
之

丁巳咸豐七年公三十四歲

正月撫建賊以巨股援吉安繞真君山後謀與城賊合擊

周鳳山營我軍破之千金坡 二月初四日竹亭公薨於里第公兄國藩國華自瑞州大營回籍十二日公聞訃二十三日奔喪令文翼統吉安軍 閏五月初三日奉竹亭公葬於湘鄉二十四都周壁衝山內時大府檄公赴營以毀病不能行 六月周鳳山軍潰吉字營獨全軍退保安福初吉安圍師隸於公已而劉培元等率千人至自袁州趙煥聯率千五百人至自茶陵公負地望諸將推服雖不相鈐束而進止咸取決之公去諸將不相下巡撫耆齡奏起公仍統吉安軍 九月初八日起程赴吉安公兄國藩居禮廬念江西連失劉騰鴻王鑫二勁將於公之行也反

覆訓誡以和輯營伍聯絡官紳與夫攻戰之法至數千言并令辭總統之任二十六日至長橋口營二十八日率營官張勝官張勝祿李祿和陶茂林劉盛德陳湜等五營進屯洙口亭 十月破瓦窰沙岡賊進壁十里亭築壘於天華山飭高彥驥以水師集三曲灘克吉水縣城西逼吉安圍遂合 十一月城賊開西南門出我軍敗之於長安嶺爲長壕困之賊竄秦和僞翼王石達開由撫饒趨吉安眾號數十萬公迎擊於吉水三曲灘大破之 十二月賊竄峽江爲水師遮擊吉安賊與水東不相應二十六日寅刻我軍以地道壞吉安城垣大霧不能上賊出拒大敗之

戊午咸豐八年公三十五歲

正月江西巡撫耆齡奏委公總理吉安攻勦事務公三敗賊於白露州賊愕不出 七月大舉攻城劉騰鶴薄北城斃賊七人遮克敦布自水東攻南街殺賊數百賊出犯西路長濠我軍復敗之 八月初五日公以七年至此次第克復峽江吉水太和龍泉萬安縣城功奉

上諭著以同知歸部卽選賞戴花翎時吉安圍守經年賊酋李鳳翟明海將悉眾趨邵武公自贛江下游作浮橋水陸合攻賊結木牌順流衝橋屢斷屢續之盡毀其牌筏賊懼益相猜李雅鳳殺翟明海出撲天華山長壕公督軍拒邵

之其黨夜出城乘舟遁劉培元周惠堂等以水師上下截
之沈其舟賊大創不能振乃大舉環攻周惠堂遮克敦布
攻南門趙煥聯等逼北門公以陸軍攻西門石壘賊自東
門逸水師援長木蟻附登城開南門納我軍遂克吉安生
擒李雅鳳於是江西列城皆復公遣撤所部之勇回湘所
統湖南援軍各營亦先後遣回自率所部勇千人從國藩
於建昌二十六日抵大營國藩留其部將朱品隆爲親軍
謂之護衛軍其營官哨長每日傳見數人視其能者獎拔
之十月初十日公兄愍烈公國華陣亡於三河鎮十
月十一日公回湘國藩送之行以課子讀書爲屬是年

正月十三日公三女生後適同邑彭秀璋

己未咸豐九年公三十六歲

二月初四日行大祥禮於里第擬赴國藩大營以賊竄郴桂湖南戒嚴不果行二十八日以克復吉安功奉

旨著以知府儘先選用並賞加道銜 四月湖南永州解圍公

啟行廿七日抵公兄國藩撫州大營 五月初九日設次

行釋服禮時福建賊回竄江西犯景德鎮十一日公率副

將朱品隆等軍二千八百人往國藩以記名道李鴻章

從參軍事廿二日抵鎮時諸軍與賊相持七月水陸二萬

人莫肯先進公至約張運蘭軍進壁雞脚嶺築壘甫半賊

自正身之全言
一
屢來犯浮梁賊復悉眾赴援皆敗之 六月賊傾巢來犯
我軍三戰皆捷賊糧垂盡會大雨劉于濬等水師逼西瓜
洲陸軍燬湖街黃港臧家灣等賊卡斷賊接濟十四日公
率參將張勝祿等自中路黃泥渡進張運蘭率參將文恆
久等自左路李樹羊塢街進道員王文瑞偕副將唐義訓
自右路湖湘街進火延燒市房賊乘夜潛遁浮梁遂克景
德鎮公率諸軍追之十五日克浮梁賊竄建德祁門江西
肅清 七月初一日公率吉字中營赴撫州以病留國藩
營數日得

旨著以道員用初十日公病愈拔營回湘 九月國藩移駐巴

河 十月初二日公領所部吉字營勇至巴河二十四日
公回湘 十二月公與兄國潢遷葬星岡公王太夫人於
大界新塋時僞英王陳玉成踞安慶糾捻匪擾皖北與金
陵賊犄角綴我師曾國藩進駐宿松湖北巡撫胡林翼進
軍英山合舉規皖時多隆阿新賞諸將不樂爲其下於是
鮑超求去而多隆阿亦請疾林翼憂之計諸將惟公才地
洽眾望欲令總統諸軍公以書謝曰多將軍忠勇絕倫常
疑吾輩輕武職國荃請爲之下則眾將自輯睦林翼大喜
曰能如此

國之福也乃奏以多隆阿總統諸軍

庚申咸豐十年公三十七歲

正月二十五日公叔父高軒公卒於家 三月二十六日
公兄國藩檄公以所部赴援安慶 閏三月二十七日公
至宿松大營國藩令攻安慶集賢關賊壘林翼與國藩議
以公領安慶軍屯集賢關是爲規復安徽之始 四月十
八日移右路六營中路七營入關首尾聯絡十九日移左
路五營入關皆壁城西北二三里以三營壁關外爲長塹
扼其東絕縱陽援賊 五月我軍攻城賊不出欲以堅城
綴我待援公計必先取縱陽無東顧憂而後移關外各營
進圍東門則城賊自成孤注尋楊載福彭玉慶水師敗賊

樅陽平其壘由樅陽繞入石塘河馳至菱湖公引軍誘賊
船出喻吉三自長壕外率隊昇飛划入湖奪賊船四城賊
馳援蔡國祥截之燔賊船十餘斃賊二百餘彭玉麐派水
師扼花山梅山墩斷東門外援賊時國藩督兩江移屯祁
門以所部萬人歸公統領二十一日公與弟貞幹見國藩
於黃石磯二十七日返營李續宜以江南大營陷欲公緩
進公復書曰下游局勢既變此間自應緩攻第以全局而
論懷爲楚北門戶乃竭數年兵力始得爭此尺寸之土又
復舍而他顧則是棄已復之近地而救糜爛之遠疆緩不
濟急况此枝兵力數僅萬人物力人材皆難特樹一幟何

能縱橫於遍地皆賊之中於是定議合圍 六月初公移營菱湖東北逼東門集鄉民刈禾公以大隊自外蔽之移四營大洲上屯一營於游梁邊十四日賊出北門築壘三爲我軍所毀十六日移長勝營屯西門鹽河邊長圍既合其後賊酋陳玉成擾桐城李秀成等擾徽州謀安慶 十一月賊以大股陷東流而建德祁門彭澤湖口都昌浮梁鄱陽各縣四面皆賊屯軍皆斂兵自守或勸公輟安慶圍救大營公曰賊正欲牽我軍耳奈何爲所誤攻益力陳玉成見圍師終不退乃率十萬眾援安慶公屢擊屢破玉成則走桐城增壘不戰多隆阿李續宜南北擾之玉成走廬

江 是秋公倡建考竹亭公祠於二十四都大坪雷家灣
辛咸豐十一年公三十八歲

正月塞樅陽壩水口 二月十九日與弟貞幹納降賊程
學啟令部其眾屯長濠外 三月公兄國藩自將祁門軍
至休甯督攻徽州爲賊困誓死守諸將皆諫不聽公馳書
並賫餉米數千石謂株守無益宜出大江規全局請速移
東流情詞懇惻國藩不忍卒讀復書云讀出師表而不動
心者其人必不忠讀陳情表而不動心者其人必不孝讀
沅季此信而不動心者其人必不友於是始定計移軍時
楚軍全力謀皖公日夜與賊搏戰胡林翼駐太湖策應陳

玉成乃北出英山破蘄黃遂北踞德安南則另股攻江西郡縣出義甯擾崇通東由衢州至於處州多方誤我爲解圍之計玉成留黨守德安自領精兵回安慶十三日至太湖多隆阿遣兵嘗之戰不利賊趨安慶十八日入集賢關守賊葉芸來先已往淮北約捻黨二十餘萬眾渡淮會玉成攻公軍於菱湖北岸築壘十三南岸築壘五參差相連賊燒關內廬舍火光燭天城賊更番出襲南北岸羣賊分起應之多置小舟於湖中通往來二十二日公屬楊載福昇礮船數十入湖以其弟貞幹蕭孚泗出濠衛之賊捲甲疾趨圍孚泗軍貞幹救之出蔡國祥水師已入菱湖奪賊

船載福增遣唐學發舳板助戰擊傷甚眾玉成日增壘逼我營公與眾謀曰賊壘縱橫宜據東路湖邊泊水師築壘護之乃可制賊命二十六日遣貞幹等出東路橫濠倚水修壘玉成死力來爭我軍且築且拒戰一晝夜壘成賊始氣阻時賊酋林紹璋洪仁玕黃文金亦率悍黨援安慶多隆阿邀擊於新安渡大破之 四月初一日國藩移軍東流既出江益規畫取安慶乃玉成屢挫於多隆阿還屯集賢關適公輕騎至關外偵地勢遇賊大股分路躡至公所部不滿五百據險列陣以待賊疑有伏愕而止公縱騎還擊大破之玉成由馬踏石壘臭水夜遁留悍黨守赤崗嶺

四壘與關內十三壘相聯絡公增掘長濠包菱湖羣壘俱在圍內賊計始困多隆阿遣軍追玉成玉成奔桐城於是新立八壘皆克 五月公合鮑超攻赤崗嶺七晝夜下之超移援江西守賊多墜城乞降時關外賊盡殲城賊恃菱湖壘賊拒我軍二十五日菱湖壘賊吳定才乘夜犯橫濠爲公弟貞幹所敗菱湖南岸賊與北門犄角聲援公派凌蔭廷等壁軍城下斷城賊援路貞幹派李祥和駐守齋壇橋絕水路賊糧 六月初一日城賊數千出襲蔭廷營爲我軍所敗菱湖北壘賊乘夜爭渡入城爲水師所截擠溺無算公率弟貞幹出濠邀之賊益亂十三壘皆破生擒五

千餘人拔難民三百餘眾乘勝平南岸五壘斬馘千餘
七月陳玉成復約楊輔清率十萬餘人自無爲趨英山繞
宿松逕襲太湖分軍出高嶺攻桐城已而悉眾趨安慶公
偵知之先率精兵伏要路賊至突擊殺傷數千人胡林翼
擊破太湖賊多隆阿復敗桐城賊於掛車玉成退屯石牌
仍分黨援安慶時城外賊壘破壞略盡十三日公攻東門
月城燬之惟北門餘石壘三皆死黨距之堅不可拔公召
驍將程學啟親爵之曰必克三壘學啟選勇士數百人緣
礮穴而入戰於壘中斬千餘人擒三千七百人三壘皆下
玉成既屢敗復收餘眾增約捻黨屯集賢關內分四十餘

壘二十日攻公軍龔其後公不爲動賊踰濠逼壘則開壁
大戰斬寇帥數人賊踰濠而遁公引軍蹙之仆於濠者不
可勝數二十二日賊復以死黨渡濠公選壯士持短兵迎
砍之戰良久血肉相藉賊稍卻公親督軍益新壘環壕左
右伏精兵葉芸來傾巢出由鹽河至十里鋪東撲新壘玉
成自城外應之親援桴鼓督陣殺不前者公揮眾禦賊而
築板如故自夜達旦新壘成殲悍賊三千屍骸積田隴羣
賊旣屢挫糧不給復築壘菱湖北岸舁小艇泛湖汊齎糧
入城公遣貞幹亦作壘菱湖合水師蔡國祥絕賊糧而暗
令軍士鑿穴埋地雷是月十六日

文宗顯皇帝升遐

穆宗嗣位 八月初一日地雷火發北

六千級俘數千人其自南門逸者
遂克安慶陳玉成楊輔清洪仁玕
日賊以大股來援爲我軍所敗淮
人初八日公兄國藩至自東流由
垣安撫士民治行館解署搜擒賊
斬之二十五日

上諭道員曾國荃智勇兼施著賞加在
遇缺題奏並加恩賞穿黃馬褂以二

玉成率賊六七萬向東徘徊公與多隆阿分道躡之九月公平集賢關內外賊壘殺賊二千餘乘勝會多隆阿軍克桐城宿松黃梅蘄州廣濟諸城十七日

上諭著賞給偉勇巴圖魯名號時公督軍循江北岸東下率親兵至楊家橋掘堤困泥汊口賊十六日賊遁無爲州遂克泥汊口進攻神塘河賊壘十九日克之二十日薄無爲州伏精兵南門外遣王明山等攻東門先是賊酋馬玉堂妻子在安慶公執不殺諭降玉堂寇帥陰覺之擊玉堂其黨大譁互相攻殺聲達城外公乘亂擊之賊開北門逸去復進攻運漕鎮運漕鎮者在無爲含山之交外瀕江內通巢

湖賊運糧道也公遣王明山水師北扼黃落河西遏巢湖
行船自將攻運漕二十三日克之二十九日公克東關賊
壘於是安慶百里間無賊壘公還安慶 十月初一日公
至安慶詣兄國藩議增兵時諸將爭謀旁郡公勝兵八千
防新克城隘不足初六日公回湘增募勇六千二十一日
上諭著賞給頭品頂戴

王同治元年公三十九歲

正月初四日

上諭浙江按察使著曾國荃補授卽赴新任毋庸來京請訓時
朝廷以杭州陷松滬岌岌可危議令公率師出上海規蘇常

屢

詔促兵國藩郵書商之公答曰松滬財賦甲天下籌餉易然賊巢在金陵急攻其巢必以全力援救而後蘇杭可圖願任其難者國藩壯其謀因以金陵屬公公設局長沙召募六千人分十二營數日成軍二十八日啟行 二月十五日公率新軍至皖是日奉初三日

上諭江蘇布政使著曾國荃補授即赴新任毋庸來京請訓該員係兩江總督曾國藩之胞弟例應迴避惟該省軍務緊要需員辦理著毋庸迴避以資得力二十四日公率新軍十二營自安慶東下規巢和 三月十五日公破賊於望城岡

十八日破賊於銅城閘十九日克雍家鎮公自將六千人
壁軍巢縣東北連營於旗山鼓山放望岡守賊僞顧王吳
於孝等聞銅城閘已破大愕焚糧夜遁公揮軍躍登殺守
陣數人城內驚擾皆奪門走斬千餘人二十日巢縣復公
率軍躡至含山張兩翼鈔擊大破之含山賊望見不戰而
遁同日復其城擒守賊汴天義周逆斬之二十二日進襲
和州克之追至鍼魚嘴三城賊皆在公合水陸圍擊殲焉
二十三日攻克裕溪口賊遁至木橋鎮爲我軍所敗公乘
夜進扼西梁山燒其鐵鑪賊棄山奔二十四日克之賊盡
爲我殲當是時國藩建節安慶指麾眾軍公徇江北公弟

貞幹鮑超徇江南彭玉麐水師左右應之是爲進取金陵之師 四月十六日

上諭著交部從優議叙部議照三等軍功給予加一級二十日公率十五營南渡自西梁山至金柱關築壘甫成公繞至下游眇太平府形勢賊率黨遏我軍我軍分翼擊之破北門石卡躡至南門賊不虞我軍至閉關不及遂克其城乃合水師進攻金柱關二十一日我軍逼南門而屯截西岸援賊選敢死士鳧水奪賊浮橋水師日夜環攻燒關內外廬舍羣賊冒火奔逸短兵要擊積尸累隄塹遂奪金柱關東梁山賊亦宵遁火光燭天時蕪湖亦爲公弟貞幹李成

謀等所克殘黨奔賈家灣公督軍蹙之斃賊千餘眾復分
軍敗賊於薛鎮二十五日公進軍破周村賊卡壁板橋於
是勝兵出皖境矣 五月初一日公自板橋引軍東攻秣
陵關守賊舉關降初二日遣軍進大定坊繞三汊河後逼
金陵城西大勝關編木作橋伏精兵橋畔而以後隊捲旗
疾趨賊懼爲長圍所困乘夜縱火棄巢走遂奪大勝關三
汊河兩壘平之時彭玉麐駐金柱關公懸軍深入懼爲賊
乘乃調水師由烈山駛入頭關初三日昧爽公亦至水師
破浪仰擊陸軍乘之拔頭關玉麐進奪江心洲蒲包洲泊
金陵護城河初四日公由陸路倚護水師驅車直逼金陵

營於雨花臺玉麈乘輕舸至下關貞幹駐三汊河江東橋
傍水築壘保西路糧道是爲楚軍進攻金陵之始時公軍
合水師不滿二萬孤軍深入諸將帥皆以爲不可國藩亦
甚憂之手書令待他軍集而後進公報曰諸軍士應募起
義人人以攻金陵爲志今不乘勢薄城下而還軍待寇則
曠日持久非利也且金陵爲賊根本拔其根本則枝葉不
披而萎金陵恃江南北各城爲屏蔽江南北各城亦恃金
陵爲應援克其一城移軍他往賊又隨踞之徒使我疲於
奔命而賊旋走旋踞是攻奪無已時也今以一軍直擣金
陵蘇常各賊聞江寧急必更來援彼時遣別將間襲蘇常

吾因而乘之殄寇犁穴在此舉矣國藩許之圍攻之勢乃定初五日城賊出犯被創入城十二日移營雨花臺東南隅甫築壘城賊出三萬眾襲我我軍三道奮擊敗之湘軍久勝鋒銳甚賊來犯比交綏無不一當十守賊創甚皆大驚乃收入金陵二十四日敗賊於六郎橋而城賊日出窺覘輒被創洪秀全益恐蘇酋李秀成遣其僞國宗引兵數萬自蘇州西援 六月與公戰雨花臺兩軍互損傷初十日復撲大營戰不利還走入城乃謀分兵綴我十六日列二十餘隊隊各趨一壘而以銳卒突雨花臺長濠濠寬深不得過則以火器環擲公憑濠拒守伺賊已近令劉連捷

拔卡縱擊斬二千人僞對王殪於陣羣賊乃大奔時溽暑大雨公令軍士冒雨修垣洪酋益調甯國賊來援二十四日甯國賊以二萬出雄黃鎮夜襲營公遣將要擊大敗之七月城賊以屢挫閉門專待蘇浙援我軍多苦疫癘亦堅壁自保八月蘇州援賊謀自小丹陽擾金柱關總兵羅逢元至薛鎮擊敗之閏八月疫猶未已軍士互傳染死者山積羣醫旁午病者方資休息而僞忠王李秀成引兵三十萬自蘇常奔至號六十萬東起方山西訖板橋鎮連營數百公兵不滿三萬賊圍之數匝彭玉麐楊岳斌水師皆阻隔不相聞諸將懲向榮和春之失謀潰圍就水師

退保蕪湖國藩在安慶憂之廢寢食飛檄令撤圍公令於
眾曰賊以全力突圍是其故技向公和公正以退而致挫
今若蹈其覆轍賊且長驅西上大局傾覆何蕪湖之能保
夫賊雖眾皆烏合無紀律且久據吳會習於驕佚未嘗經
大挫吾正苦其散漫難徧擊今致之來聚而殲之必狂走
吾乃得專力搗其巢破之必矣願諸君共努力諸將諾服
十九日乃分圍師爲三以其二防城賊侵襲公自將其一
當援寇一夕築小壘無數障糧道以屬之江賊益番休迭
進螳傳環攻累箱實土以作檣楯挾西洋開花礮目空下
擊所觸皆摧公留孱卒守棚選健者日夜拒戰更代眠食

常以火毬大礮燒賊無算賊乃抵死不退軍士傷亡頗眾二十九日公左頰受鎗傷血漬重襟猶裹創巡營歷半月賊少卻而僞堵王黃文金出東壩攻金寶圩爲李秀成聲援鮑超遣軍禦之新河莊爲所乘水師亦困於金柱關賊燄益張乃掘地道陷官軍壘公屢堵合之亦時以穢鹵倒浸穴中九月初三日僞侍王李世賢復自浙江糾黨麇至合秀成軍號八十萬公度浙寇新來氣盛誠諸將厚集其陣暇以待之賊負板擔草土填濠我軍拒濠發礮賊屢卻仍堅壁不出相持兩晝夜初五日乃發萬人開壁擊之軍士氣十倍呼聲動天當者無不摧靡一日內破堅壘十

三殺八千人援賊氣奪乃益鑿地理火藥十二日兩穴同發土石飛躍如雨大營牆坍賊隊猛進公督軍士露立牆外環擲火毬間以槍礮賊前者既殪後者復登踰三時牆缺復合殺悍賊數千羣賊乃謀晝息宵攻輪進以疲我連營周百里其近者距官軍才二十丈仍潛開隧道乘雨夜轟之公令各軍掘內濠翼以外牆破其地洞七賊計始窘十月公度賊力疲可一戰破也乃誡諸將秣厲以俟初三日引軍出濠克十餘卡知賊不任戰軍益大出初四日李臣典等出東路公弟貞幹出西路彭毓橘蕭孚泗等出南路初五日天嚮曙臣典燒東路四壘火光燭天西南諸

賊望見洶懼棄壘逃貞幹偵三汭河賊宵遁急引兵走之
遇逃寇則縱兵要擊追之板橋周村彭毓橘追至牛首山
王可陞搜賊方山西諸賊在東路者繞南門逸其在西南
者走秣陵關於是蘇浙賊數十萬皆遁金陵圍師解嚴是
役也公孤軍居圍中戰守四十六日殺賊五萬我軍亦傷
亡五千將士皮肉幾盡軍興來未有如此之苦戰者於時
李秀成由九洑洲北渡陷和州含山巢縣皆湘軍新得之
城先是水師困蕪湖公已分兵守東梁山至是公急分兵
守西梁山令劉連捷彭毓橘等引兵北援 十一月奉
上諭賞給江綢黃馬褂一件小卷江綢袍料一件白玉喜字翎

管一枝白玉柄小刀一把十八日公弟貞幹卒於軍所部各營隸於公二十四日貞幹柩回湘賊撲我江東橋前濠我軍禦之至夜始退李世賢謀奪金柱關二十六日我守將羅逢元朱南桂等合水師先發擊之敗之於卿家橋涂家渡賊遁 十二月遵

旨將南岸之龍潭澹化鎮秣陵關六郎橋雨花臺燕子磯大勝關太平府金柱關龍山橋東梁山北岸之浦口江浦和州西梁山裕溪口及瀕江北岸之九洲洲等處形勢共繪一圖分注官軍賊壘由國藩附摺呈

進二十一日蕭孚泗等平穀里村朱門賊壘彭毓橘等破六

郇橋賊壘七賊屯糧山積公盡以贍民飭劉連捷三營移屯三山保陸路糧道

曾忠襄公年譜

癸亥同治二年八

正月國葆

壘傳見冬

藩終以孤

公圍軍堅

賊於新圩

西梁山時

二月羅逢

李秀成圍

南桂羅逢元等軍破伏龍橋三里埧護駕墩花津各賊壘
皆平之賊走金寶圩金柱關解嚴

詔授公浙江巡撫仍留攻金陵以閩浙總督左宗棠兼權之公
與兄國藩交疏懇辭皆

優詔慰勉 四月江蘇巡撫李鴻章克崑山蘇州賊懼李秀成
將自六安犯湖北聞警乃大掠而東鴻章約公自上截之
公策賊不南援蘇州則北走裏下河乃益攻金陵以綴之
時劉連捷鮑超等已克巢含和州湘軍氣勇百倍二十七
日夜公分軍六路李臣典等攻雨花臺石城趙清河等攻
聚寶門南卡晏澧等攻西卡何玉貴等攻東卡陳湜山中

路蕭孚泗易良虎等左右應之夜已半軍士蛇行薄石城
東草塹濠將登賊驚覺然礮外擊踏五人眾頗逡巡李臣
典斬二卒以徇舉旗直上毬箭星落入城天嚮明敵樓火
發賊奔救我軍已乘煙霾而入遂克雨花臺僞城諸將乘
勝猛攻於是金陵城西南九壘皆下公分二千人守石城
築六新壘輔之李秀成在江北聞之益洵懼改圖南渡天
長六合來安皆解圍五月楊岳斌彭玉麐水師次江浦
蕭慶衍陸師出烏江與鮑超劉連捷會師浦口江浦橋林
賊皆不戰而遁走九洑洲公乘夜至新江與玉麐岳斌覘
形勢九洑洲賊築堅城列巨礮以戰艦護之公計先清南

岸諸隘乃可會師北伐十二日遣丁泗濱等南從秦淮嚮
下關喻俊明等北繞永安州向草鞋夾彭楚漢等爲後應
玉磨據九洑洲上游牽賊勢下關草鞋夾八壘皆克乃移
兵向中關十四日公分兵襲燕子磯毀壘而還岳斌偵江
北有間道達九洑營賊濠約公會師公令陸師伏叢莽中
從堤埂缺晁水而進彭楚漢張錦芳師船夾洲上下丁泗
濱攻南岸中關十五日昧爽兩岸戰旗並舉人人殊死戰
中關賊閉不出九洑賊伏洋鎗隊於洲三面伺間出擊官
軍精銳多傷亡至夜月色溟濛西南風大作我軍闇移船
近賊壘以火箭射賊舟風烈火猛延及洲上卡棚喻俊明

等麾軍直上成發翔彭楚漢從左右呼噪而登丁泗濱自南岸鼓棹飛渡將士踐尸以進九洲竟破萬餘賊無一脫者十八日公攻長干橋賊壘復大破之長江肅清時賊勢日蹙我軍西起江東橋綿亘而南東至印子山分布三十里鮑超駐軍幕府山與公相距四十餘里自鍾山南通秣陵關東至榮華鎮尙爲賊有或議宜調揚州鎮江諸軍大舉合圍 六月公奏言鎮江要地兵數無多不宜輕於調出苗逆新陷壽州江北處處宜防都興阿揚州之兵亦不宜率調過江乃檄蕭慶衍自江北南渡屯神策門鮑超繞鐘山屯孝陵衛論者多言城大兵單合圍不宜驟恐援

賊乘隙撼全局公曰今浙軍攻富陽滬軍攻蘇州羣賊奔命此亦天亡時也吾乘其急而合圍彼備多力分縱不卽克金陵其收效蘇杭必矣國藩以爲然乃令公增募萬人於是金陵圍師近四萬矣是月鮑超進軍鐘山將屯孝陵因軍士病駐神策門洪秀全遣黨出儀鳳門攻鮑超又出太平門攻劉連捷我軍擊卻之七月初一日犯下關李成謀等力戰卻之初九日公攻印子山克之進攻上方橋橋在城東南隅賊運糧道也二十日公分蕭慶衍出印子山東徧賊而軍城賊來爭蕭孚泗李臣典張詩日分禦之賊堅壁不出二十九日熊登武越上方橋五里築小壘六

絕賊糧賊患之糾大眾出戰蕭孚泗伍維壽馬步包抄追
之秣陵關破十餘卡悉奪泊河戰艦孚泗度賊已窮令軍
士負秫稽乘夜填濠三十日遂克上方橋而江東橋石壘
高峙環以木城陳湜圍攻數月不克 八月十二日夜風
霾蔽月陳湜選銳卒數百襲營燒其木城立拔石壘分抄
至旱西門眾壘皆下時城東尙有數隘近城者曰中和橋
曰雙橋門曰七甕橋稍遠者曰方山土山曰上方門高橋
門迤南則爲秣陵關以至於博望鎮亦金陵外輔也 九
月公令蕭慶衍等結筏渡水扼東路立營賊已先據河東
拒我蕭慶衍隔河發礮朱吉玉李祥和踞西岸築三壘與

賊相持二十日夜李祥和從上游蕭孚泗從下游渡河破其五壘城賊來援蕭慶衍且戰且築東岸壘已成二十二日賊復諸道並出蕭孚泗彭毓橘陳湜等扼雙橋門以東蕭慶衍進中路戰少卻將士奮臂大呼賊皆反走蕭慶衍縱騎兵斷其歸路遂克上方門高橋門而右路方山土山之賊爲熊登武所敗亦棄壘奔於是七甕橋羣賊思遁蕭孚泗彭毓橘扼其東李臣典遮其西城中忽出大隊兩軍相搏互傷死二十四日孚泗乘夜縱火賊冒烟突出遂克七甕橋乃由方山南進秣陵關攻博望鎮賊環鎮築七壘上應水陽旁控金柱關金柱守將朱南桂聞鮑超有事於

水陽約朱洪章等出小丹陽以襲博望俾不得爲水陽援
南桂乘夜銜枚疾進昧爽抵博望克其二卡賊開壁大戰
武明良繞出頭壘襲其營賊反顧七壘已易官軍幟乃錯
愕狂走南桂追之長流背溺死強半公以博望旣克則中
和橋之勢孤二十五日令趙三元率馬步七營南略秣陵
至中和橋一戰克之秣陵賊見馬步驟至棄釜逃諸將追
至河干阻水不能渡僅殺尾賊二百餘自是紫金山西南
無賊壘矣二十七日公親至孝陵衛勘地勢將移營合圍
賊出朝陽門太平門來襲蕭慶衍陳湜分截之蕭孚泗李
臣典傍城抄入戰方酣有賊目指麾督陣公伏鎗擊之殪

自序身之全言 卷二
賊陣乃亂僞章王順王退入城餘賊走瀘化鎮時甯太賊
進屯高瀘深水謀襲蕪湖彭玉麐率水師躬攻水陽楊岳
斌來會遂克窰灣金寶圩水陽新河莊塘溝諸壘是月奉
旨頒發

文宗顯皇帝御製詩文全集一部 十月初五日公克瀘化解
溪隆都湖墅三壘鎮燬賊壘二十餘於是金陵東南剗削
略盡十五日公遣軍屯孝陵衛 十一月公掘地道成初
五日火發神策門城塌我軍肉薄爭登阻月城橫洞不能
上傷死三百餘初李秀成遁無錫李鴻章已克蘇州至是
秀成領敗眾數萬分布丹陽句容間自率數百騎入太平

門勸洪酋棄城同走不聽乃貽書溧陽約李世賢就食江西公益募新軍增圍師遂至五萬人援賊還金陵者皆不敢出 年終

賞福字荷包銀錢銀鏢食物等項

甲子同治三年公四十一歲

正月李秀成曰說洪酋出就食洪酋仍妄稱天命不肯去秀成不得已留金陵城守公度賊糧將匱約楊岳斌水師巡江見奸民運米入城輒奪之又令朱洪章等繞鍾山後斷陸路運道調降將韋志俊守金柱關移朱南桂助圍金陵南桂冒雪營城北廿一日偵賊酋李士貴赴句容護糧

伏兵要之賊棄糧走公益銳意合圍二十二日周歷洪山北固山神策門太平門李秀成自將出鍾山南攻朱洪章營洪章與武明良出濠夾擊沈鴻賓等出右路武文山等出左路戰良久殺數百人賊退上山羅兩春攀巖而上中鎗幾墜沈鴻賓繼至各挾火毬火箭擲壘中賊突驚遁克鍾山石壘賊所署爲天保城者也公遣黃潤昌等戍之令蕭孚泗蕭慶衍出山北列隊太平門築三壘以王遠和等守之維時梁美材屯洪山朱南桂屯北固山寨神策門餘元武湖阻水爲圍於是金陵城圍始合賊糧絕矣 二月左宗棠克杭州李秀成益懼日放婦孺出城節食秀成屢

以無米告洪酋洪酋誑眾曰闔城食甜露可以養生甜露者草也眾雖知其誕而無如何乃於城內種麥濟飢三月蘇浙賊道徽州走江西國藩乃令鮑超還軍援江西朝旨促國藩赴金陵督師國藩以徽州警上游危急仍留安慶策應二十五日公攻金陵月圍破之月圍者賊附城築垣以拒我地道者也金陵城周百里公日令軍士鑿隧道凡南門一穴朝陽至鍾阜門三十三穴篝火而入地或崖崩窟塞則縱橫聚葬於其中賊乃築月圍穿穴拒我時以毒烟沸湯入穴中軍士多死至是公破月圍焚其火藥殲賊無數官軍傷亡亦三千人 四月二十七日洪秀全服毒

自斃李秀成立其子福瑱仍襲偽號祕不發喪時句容金壇常州丹陽皆爲我軍所復賊援路絕而城賊方刈新麥又可支數月食我軍偪城而屯賊以洋鎗狙擊兩月以來傷亡至四千餘眾所掘地道十餘屢爲賊穿公復發溼毒憂灼食減國藩屢以不求速效但求穩慎慰勉之 五月

朝廷以金陵垂克而河南擒匪犯麻城皖賊深入江西恐掣

全局

詔李鴻章會攻金陵金陵諸將以城破可計日待恥借力於人鴻章亦言盛暑不利火器延不至

穆宗欲速其功益促鴻章激之公亦以此激諸將期必破而龍

膊子石壘賊所號地保城者不得則形勢終不便乃日夜發礮攻之三十日李祥和等奪石壘遂築礮臺其上俯瞰城中礮擊處城堞皆圯公慮師老且生變益督李臣典等當礮密處潛穴其下而積溼蒿覆沙土高與城等聲言將踐登以疑賊 六月天久不雨公露禱須臾龍見雨大至十五日地道成公夜寢若有人促之驚起趨洞口呼守軍李秀成果出襲營遣黨持火蛋燒蘆蒿伍維壽彭毓橘分擊獲免十六日公令朱式雲草檄誡諸軍懸賞募敢死士待城破先入於是李臣典朱洪章伍維壽武明良譚國泰劉連捷沈鴻賓張詩日羅雨春九人誓先登日午地道火

發城崩二十餘丈輒石雨落李臣典等蟻附爭登賊反然
火藥下燒我軍眾稍卻彭毓橘蕭孚泗手刃數人弁勇皆
奮乘城缺入朱洪章沈鴻賓羅雨春等攻中路在僞天王
府北劉連捷張詩日譚國泰等攻右路循台城趨神策門
適朱南桂梯攻而入遂合取儀鳳門左路則彭毓橘由內
城至通濟門蕭孚泗等奪朝陽洪武門守陴賊誅殺殆盡
而羅逢元等從聚寶門入李金洲從通濟門入陳湜易良
虎由旱西水西門入李秀成方趨旱西門爲陳湜所阻乃
還走清涼山匿民房黃翼升水師攻奪中關乘勝至旱西
門與陳湜等合於是金陵九門皆破日已暝矣賊猶保子

城夜半賊縱火燒僞王府因突圍走黃潤昌等露立龍廣山袁大升等循城南遇逃賊要擊斬數百人張定魁等追賊及之湖熟俘斬數百人城賊多自焚或投池井餘黨挾洪福瑱走廣德公傳令閉城救火獲僞玉璽二金印一蕭孚泗搜獲僞王兄洪仁達僞忠王李秀成斃賊十餘萬凡僞王主將天將及大小首目三千皆死亂兵拔難民數十萬先是西洋人屢請助攻又請調印度兵公皆不許而外夷桀者頗暗助寇公漫擊之與賊同殲於陣金陵旣克西洋諸國皆來賀捷疏入得

旨浙江巡撫曾國荃以諸生從戎隨同曾國藩剿賊數省功績

頗著咸豐十年由湘募勇克復安慶省城同治元二年連克
巢縣含山和州率水陸各軍進壁金陵駐紮雨花臺攻拔僞
城賊眾圍營苦守數月奮力擊退本年正月克鍾山石壘遂
合江甯之圍督率將士鏖戰開挖地道躬冒矢石半月之久
未經撤隊實屬堅忍耐勞公忠體國會國荃著賞加太子少
保銜錫封一等伯賞戴雙眼花翎其餘將弁皆論功進秩有
差二十五日國藩自安慶至金陵二十八日掘洪秀全屍
於僞宮戮而焚之 七月國藩親訊李秀成洪仁達洪仁
發等讞成駢誅之公散所部二萬五千人留萬人防金陵
萬五千人備皖南北游擊國藩旋返安慶公以傷病未愈

請疾還鄉里二十七日奉

上諭據奏曾國荃於克城之後心血過虧困憊殊甚欲請回籍調理部勒散勇南歸求所爲善始善終之道等語該撫所見雖合於出處之道而於盡臣謀國之誼尙未斟酌盡善况遣散勇丁祇須分派妥靠之員沿途照料而見在江甯安慶等城均須督兵鎮守該撫正宜駐紮江甯安心調理一俟就痊即可幫同曾國藩分任其勞卽著曾國藩傳旨存問無庸遽請開缺回籍 八月公以病增劇仍請開缺由國藩馳摺代

奏 九月初四日奉

上諭浙江巡撫曾國荃自隨同曾國藩勦賊以來連克名城勦

績卓著本年親督將士苦戰數月攻拔江甯省城殲除巨逆厥功尤偉乃以連年辦理軍務心力交瘁遂至憂勞成病請假開缺回籍調理情辭極爲懇摯若不俯如所請惟恐爲職守所羈不能從容靜攝轉非體恤功臣之道曾國荃著准其開缺回籍調理並賞給人參六兩該撫祇領用資保衛該撫係有功國家之臣朝廷正資倚畀尙其加意調治一俟病體全愈卽行來京陛見二十日公奉

旨詣明孝陵致祭咨請國藩奏請建立湘軍昭忠祠 十月初一日公登舟回湘國藩送之采石磯乃還時公病劇言動極艱至武昌始少差 十一月十六日抵湘

乙丑 同治四年公四十二歲

三月二十四日公在籍奉二月十六日

上諭該撫病體當可漸次就痊朝廷以該撫功績昭著且年力
盛強正可藉資倚任著曾國藩傳知曾國荃如病已就痊卽
行來京陛見見當勤求治理需才孔亟之時該撫慎勿遽萌
功成身退之念以副期望時公以溼創未愈怔忡數發未行

五月又疊奉

寄諭飭催卽日北上 閏五月公甚病不進穀者九日 七月
初三日奉六月十六日

上諭山西巡撫著曾國荃補授迅速起程毋稍遲延公以病難

速痊疏請開缺 九月十四奉

上諭著毋庸開缺賞假六箇月在籍安心調理一俟病體稍愈
卽行迅速北上

丙寅同治五年公四十三歲

正月捻犯樊城陷黃陂鄂事棘公將請

陛見奉正月二十六日

上諭調補湖北巡撫 二月二十二日拜摺謝

恩 三月初七日自長沙起程十七日行抵湖北省城接篆視

事准湖廣總督咨內閣鈔出同治四年四月十四日具奏

賞曾國藩等侯伯美名奉

御印印出曾國荃加威毅名號二十日具摺謝

恩 先是公自長沙奏派江南福山鎮總兵熊登武提督李定

元伍維壽陳壽武陳致祥總兵彭光友王佩瓊副將李臣

榮等共募六千人四月練成赴鄂公遣屯應山 五月公

汰湖北冗軍增募湘軍七營以記名布政使彭毓橘福建

提督郭松林爲大將統之奏請改鄂省總糧臺爲軍需總

局應支餉需以鹽釐各項歸釐金總局核收 六月捻首

張總愚賴文洸等自河南南陽唐縣逼鄂軍隨棗襄樊等

處皆戒嚴公檄郭松林彭毓橘伍維壽等自黃花澇拔幟

道德安馳隨州迎擊 七月公飭各軍戒備郭松林任唐

縣劉維楨任隨州唐協和任棗陽藍斯明任老河口品官
橋提督江長貴任樊城襄陽二十六日公出省督師三十
日行抵德安屯軍府城內時捻逆任柱賴文洸自葉縣擾
西平張總愚牛宏昇謀自鄧州向浙川公以官軍西路空
虛鄖陽荆紫關潼關皆入陝孔道宜屏蔽入秦之路蹙之
使向東南兵厚之處始易勦辦咨提督鮑超率靈軍自棗
陽趨浙川防西路郭松林自唐縣出防東路劉維楨等向
新野爲靈軍聲援捻偵南路有備折而北走 八月十三
日公自德安至應山廣水驛瞭武勝關形勢時捻由朱仙
鎮東竄鮑超赴周家口公道樊城襄陽回省是月公劾總

督官文聽信幕友家丁等款 九月十八日回省捻眾自
山東悉趨河南二十六日公出省巡東路備軍 十月初
二日抵黃安縣先是

詔公出屯南陽至是公疏言張總愚等股竄過宜陽澠池賴文
洸等股尙在東境若移駐南陽僅能堵禦鄂之西偏惟廣
水驛爲適中之地可以上下兼顧卽日巡閱麻城當馳抵
中路移屯相機調度十四日公抵廣水驛十八日移屯中
路武勝岡張逆竄商雒公飭唐協和移軍扼鄖陽劉維楨
繼之 十一月東捻任賴各逆自山東趨光固窺麻城公
飭彭毓橘扼黃安郭松林伍維壽由唐縣移屯隨州令徐

豫諸軍逼賊南來薄險以待尋賊已入麻城蹂及黃安七里坪提督姜毓順迎擊於中館驛豹子山破之彭毓楠登武分道援黃安黃陂賊走孝感陷雲夢應城突攻德安郭松林破走之公移屯德安雲夢應城皆克復躡之於門京山我軍三道遮之復敗之於永隆河曰口楊墩楊家峰盧家塞三河口等處公飭劉維楨等扼棗陽十二月郭松林追擒於天門曰口深入伏中傷脛不能起至夜部弁負之出其弟郭芳珍敗死彭毓楠等馳援追賊至沙港敗之擒以大股趨鐘棗劉維楨敗之於張家集擒悉眾東竄黃陂孝感彭毓楠等合軍躡之於德安西南分三道馳

擊彭毓橘攻涂家河熊登武攻兩河口譚仁芳攻曾家河
劉維楨復襲破董家埠賊巢賊西走淮軍張樹珊迎擊於
王家灣敗績死之擒復走曰口謀渡漢公遣水師截擊走
之擒復犯安陸淮軍劉銘傳追擊敗之是月公以沔陽監
利水破堤壞民田舍疏請以工代賑分別蠲緩新舊銀米
年終

恩賞如例

丁卯同治六年公四十四歲

正月擒復走曰口鄂軍彭毓橘等壁九里岡扼東路豫軍
蔣東才壁茅茨畝扼北路劉銘傳鮑超自西路建瓴而下

賊遁楊家峰永隆河兩軍約期會戰超後期銘傳至永隆河與賊遇失利戰沒六百餘人鮑超馳至楊家峰三道奮擊麾眾壓之擒披靡馬步自相蹂死者萬人銘傳鮑超躡賊而西鄂軍亦分道追之唐協和敗賊於八条岡兩河口賊自棗陽竄去公以未能在鄂境聚殲餘黨仍逸出豫境

自請

勅部議處 二月東捻爲豫軍所遮自信陽東趨還走鄂境犯黃州麻城公檄彭毓橘等自棗陽隨州急馳至黃麻賊自黃陂走黃岡劉維楨截之回龍山賊走蘄州廣濟譚仁芳劉維楨破賊於大京阪毛顏山五里墩等處十七日公馳

抵黃州督軍賊已瀕江而上越日彭毓橘至蘄州六神港
遇捻大至率其部將羅朝雲等直前搏戰軍中初不知陷
圍久無援至與道員葛承霖均戰死賊由巴河上犯團風
新州趨黃陂會陝甘總督左宗棠西征前軍抵灑口遮蔽
漢鎮劉維楨等破賊於馬家山許家橋柳家港會熊登武
伍維壽軍自新州襲舊街柳林賊館賊遁 三月劉維楨
復會軍擊破賊於大崎山高峰山碾子河賊西走孝感劉
維楨伍維壽自東陽岡分道擊賊破賊館數十賊率巨黨
自東北繞我後維楨怒馬突之賊大奔姜玉順邀之於長
軒嶺四發砦譚仁芳熊登武復毀界河賊館公還武昌十

五日渡江督漢口鎮防軍嚴備二十日馳至德安督軍賊已走長江埠擾阜市場西埠公慮賊自應城天門窺南岸檄水師禦之 四月劉維楨熊登武等擊賊於九里岡余家畝賊西走郢東驛出資山環潭爲淮軍李昭慶所遏賊自厲山繞隨州與左宗棠西征師遇復繞黃土關而北淮軍周盛波破之於台子畝潭家河劉秉璋等自應山迤南橫截而出劉維楨自張家集馳壁許家橋過賊東出譚仁芳等復破賊於磨盤寨棲鳳山賊自白沙鋪走應城鄂淮軍躡之時鮑超乞病派宋國永率軍至隨州偵賊爲劉銘傳所躡集安陸西洞兒山宋家集一帶伏軍團山出不意

猛擊之賊大潰國永馳躡至棗陽公虞賊自信陽犯鄂遣
劉維楨扼麻城譚仁芳扼黃安熊登武扼應山黃土平靖
各關伍維壽扼隨州小林姜玉順屯軍隨棗間防賊回竄
二十八日公自德安還武昌 五月捻擾河南山東公飭
北岸各屬修築寨堡堅壁清野給守具頒發條約並定殺
賊准其保獎之制奏請委員督防荊州萬城大堤以病乞
假奉

旨著賞假一月調理 六月東捻蹂東萊督師李鴻章扼之於
膠萊河公檄譚仁芳劉維楨移軍濟甯助守運河公以病
奏八月舉行丁卯正科鄉試請以督臣李瀚章入闈監臨

七月西擒張總愚自渭北謀東趨公遣姜玉順自隨州
移軍赴豫扼守荆紫關鮑超乞病回籍公飭超部將唐仁
廉以馬隊赴濟甯 八月公以病請續假調理奉

旨著賞假一月襄水溢壞襄陽安陸等府及均州光化襄陽穀
城宜城鐘祥田舍天門漢川受害尤烈河水漫鄖陽府城
壞衙署民舍公設法拯撫以病劇奏請開缺 十月十六
日奉

上諭著准其開缺回籍調養 十一月初十日卸湖北撫篆回
籍 是年夏公倡建祖考星岡公祠於二十四都香花坪
倉場裏 十二月十一日公長孫廣漢生

戊辰同治七年公四十五歲

正月初九日公次孫廣江生

己巳同治八年公四十六歲

庚午同治九年公四十七歲

主修省城湘鄉試館捐銀一萬四千二百四十兩並捐出

講讓堂私宅爲試館歲修

辛未同治十年公四十八歲

壬申同治十一年公四十九歲

十月十一日公兄文正薨於兩江任內 是年秋公捐義

穀一千石入湘鄉二十三都社倉又捐義穀一千石入二

十四都社倉並定散放章程

癸酉 同治十二年公五十歲

甲戌 同治十三年公五十一歲

三月初一日公第三孫廣河生 是年夏公在籍倡建南嶽上峯寺甫落成奉到六月初八日

上諭著卽來京陛見 九月公啟程入都 十二月初五日

穆宗毅皇帝升遐

今上卽位初七日公到京十一日

宮門跪

安

乙亥光緒元年公五十二歲

二月十一日奉

旨召見奏對時言臣來京行抵蘆溝橋聞

大行宮皇帝賓天臣以素蒙

高厚之恩此次被召已到城外不能瞻仰

天顏實屬命薄因傷痛淚下

太后亦泣詢歷年行軍餉從何出對以臣兄國藩就地籌餉臣

亦習慣喫苦昔攻安慶江南曾與兵勇用草根伴米爲粥

兩宮溫語慰勉十五日奉

上諭陝西巡撫著曾國荃補授十六日具摺謝

恩二十日奉

上諭改授河東河道總督 三月二十八日請

訓 四月初三日出京二十二日行抵開封二十三日接篆視
事是月二十二日公配熊伯夫人故 五月十一日奏謝
兼兵部侍郎銜

恩尋勘黃河上下游南北各廳工程 六月奏萬錦灘黃河武
陟沁河並漲防護平穩 七月奏伏汛期內南岸各廳搶
修埽工親詣隄岸履勘足資抵禦尋武陟沁河陡漲公督
率道廳露處隄頂搶護平穩 八月萬錦灘黃河陡漲河
溜嚙上南河中河二廳各堡及北岸祥河下北 二廳工

段經道廳營汛搶護使大溜逐漸外移故例豫省歲料河工幫價撥帑項發長蘆山東兩淮鹽商生息公以欠解息銀甚鉅司庫無款再墊疏請

勅下各督撫臣飭商措解歸司庫墊款並發歲料幫價以後息銀得

旨俞允 九月奏節交寒露霜降兩岸險工均搶護平穩公自工次赴濟甯閱河標兵 十月公以南路應河自濟甯至台莊三百餘里湖河殘廢宜先濬泲河廳屬韓莊湖口雙閘及滕汛馬令各減閘並運河廳屬棗林仲淺河口疏請勅下山東撫臣轉飭藩司先行借撥銀兩俟戶部籌撥款到歸

遵得

旨允行 十一月公以來年江北漕船仍行河運疏請撥丙子年運河另案工需銀兩並請撥豫省司庫銀兩採辦丙子年黃河上游七廳歲料先是山東撫臣丁寶楨於直東界辦隄壩兩工疏請設立廳汛

詔下公議至是公至隄工履勘奏言切近大河迎溜坐灣之處尙宜酌量幫寬須將蘭陽口門以下至長垣縣境興築隄工並將民埵卑窄段落幫培高厚再行設官防守惟鉅款難籌擬變通辦理查河南蘭儀直隸長垣境均應築隄長垣下首東明境內卑窄者多應幫培擬由直隸督臣河南

撫臣於本省派撥將弁帶勇前往興築河工亦撥弁兵幫同力作其東省單薄隄埵仍由山東撫臣派勇增培北岸尙有金隄衛護宜先防守南隄保全山東運道及江南財賦之區惟設官經費甚難請將銅瓦箱失事後裁撤文武官員四十五缺先將南岸復設同知都司各員並撥額兵堡夫分段酌量派定廳汎名目並分隸管轄至歲守之資須試辦二三年由河臣履勘定議奉

旨交部議奏 十二月飭兩道各廳慎防浚汎

丙子光緒二年公五十三歲

二月公以山東各州縣衛被災蠲緩運河各汎開額設長

夫工食無出疏請仍借撥兗沂道河銀發給 五月公以
下河南廳祥符上汎十六堡拋築輒石壩工告竣疏請以
提用釐局銀兩專案報銷得

旨允准 閏五月奏謝

天恩頒賞

欽定勦平粵匪方略

欽定勦平捻匪方略各一部是月武陟沁河水漲匯萬錦灘黃

河東注南北兩岸大溜趨逼分投搶護平穩 八月奏謝

天恩頒賞

穆宗毅皇帝御製詩文集各一部奉初九日

上諭曾國荃著補授山西巡撫公籲請

陛見奉

旨著毋庸來見 九月公以河神廟落成疏請

欽賜匾額 十月二十六日交卸河督篆以病赴漢口就醫籲

請開缺 十一月公在漢口奉

上諭著賞假兩箇月調理毋庸開缺公至長沙醫治 十二月

在籍奉

上諭山西地方緊要著卽馳赴新任

丁光緒三年公五十四歲

二月二十六日公自長沙起程 四月二十三日行抵太

原省城接篆視事時山西大旱已兩年饑民遍山谷前撫臣鮑源深發倉穀拯民不能贍五月公捐廉爲倡勸官民捐輸留釐金興工賑疏請以本年應解京餉銀二十萬兩留省賑濟得

旨俞允時

朝旨促公解西征軍餉公以饑民就斃日眾司庫徵收無出疏請以廣西浙江福建江蘇四省應解山西協餉改解西征糧臺抵解晉省應解西征之餉奉

旨交部議奏六月公以災區太廣疏請照天津上年賑案請旨飭部頒發虛銜實職空白執照各二千張派員赴各省勸捐

八月山後賊自包頭迤西出掠麻泥茂明等處公檄提督張樹屏自包頭馳擊賊西走

詔飭戶部撥銀二十萬李鴻章撥銀二十萬以七成撥山西三成撥河南並著截留江安漕米四萬石由李鴻章曾國荃運解山西以備賑需凡有商賈運赴晉豫米石暫免抽釐使商販暢行藉資接濟時晉省州縣告災至七十六屬饑民至三四百萬眾公咨請直隸總督李鴻章檄天津道黎兆棠臬司丁壽昌候補道王定安會辦晉捐 九月工部右侍郎閻敬銘遵

旨馳晉局歷查賑公派員至蒲備差遣

詔以山東本年冬漕八萬石撥給山西接續賑濟疏言晉省普
災停賑無期懇

飭諭兩江督臣沈葆楨飭兩淮運司瓜棧及四省督銷局道員
卽日於鄂湘西皖各票商每大票勸捐銀二百兩每小票
勸捐銀四十兩備來年春賑李鴻章檄王定安轉運江廣
漕米五萬石定安從獲鹿井陘批嚴鑿坂首先入晉其後
各糧循途而進者不下二十萬石十一月疏請將本年
下忙應解之京餉緩至明年上忙徵收補解派員至河南
南陽府賒旗鎮安徽潁州府六安州等處購米疏請
飭河南安徽撫臣轉飭沿途免釐護送時遼州忻州長子武鄉

崞縣夏縣沁源等州縣大饑晉省成災州縣已有八十餘
邑之多饑民逾五六百萬眾公委員先行正賑一月繼判
輕重加賑是時糶賑各糧直隸獲鹿河南清化鎮山西太
原什貼平陽府皆有轉運局公以各糧由直至晉以直省
獲鹿爲交接之所以晉省什貼爲分撥之所并陘平定僅
運道所經咨請李鴻章飭王定安改駐太原什貼往來稽
查東路各局尋疏請以定安留山西委用是月張樹屏擒
斬包頭匪首王歪子等而青龍洞匪首朱登鰲等糾饑民
掠晉豫交界之葡萄峪河北鎮崔延柱擊之走蛋平公檄
知縣馬丕瑤募勇二百名知州賴昌期募勇四百名遮之

先是九月公奏請將光緒四年江鄂未提漕米六萬石撥放晉賑部議以京倉宜多積儲未允至是月公與閻敬銘覆奏言臣敬銘周歷災區二千里目覩慘狀殘喘呼救枯骸塞途統計一省之內每日餓斃何止千人陝豫面面皆災來源早絕晉中富饒之區僅榆次平遙太谷祁縣介休等縣雖經委員勸捐然該處富戶各保各村已逾三載安有餘資分潤鄰邑方今節逾大雪寸澤未霑來春荒象不堪設想仍懇

恩施將江鄂未提漕米六萬石全數撥給山西以救殘黎疏入奉

特旨允准先是公疏請於山東積款內借撥銀六十萬兩解交李鴻章爲轉運漕糧平糶經費閻敬銘復疏請於六十萬兩內分撥三十萬兩爲購糧之用山東巡撫文格以庫款支絀撥銀十萬兩李鴻章奏請

飭東省寬籌接濟公與閻敬銘疏請於現辦晉省賑捐等省關稅釐金項下藉撥江蘇江西浙江湖北湖南四川廣東各銀六萬兩安徽五萬兩廣西三萬兩卽在捐款內扣還並派道員王定安往山東轉運東漕所有隨漕輕齋等項銀兩照數分撥得

旨俞允文格復移借銀五萬兩爲閻敬銘購糧之用是月公次

子紀官考試蔭生以員外郎籤分戶部廣東司行走 十
二月王定安至山東德州設轉運局公以天津賑捐局旬
日得銀近十萬疏請

特旨派外省司道籌辦晉省賑捐奉

旨報可

曾忠襄公年譜卷三

戊寅光緒四年公五十五歲

正月公檄道員丁彝綬設局河南道口鎮接運德州東漕議以三成由道口運清化鎮駛運入晉接濟潞澤以七成由道口車運河南孟縣渡黃河至洛陽分局接運達晉平陸縣對屏之會興鎮復轉輸於各南路臬司黎兆棠等自天津轉運漕糶各糧自獲鹿達什貼平陽接濟汾陽霍陽各郡閭敬銘採買皖豫之糧亦輸於會興鎮分給蒲解絳三屬是月公以山西地畝五十三萬餘頃地利有限省北大朔代忻及歸化七廳每歲秋後糧販委輸而南直達蒲

絳近則沃野千里強半罌粟蓄積漸耗民食日匱南路山
确磽瘠向以陝西米麥爲大宗今則渭南肥饒之地徧地
毒物反仰給於渭北糧乏來源勢成坐困爲將來裕食備
荒計必宜申明舊禁乃與閻敬銘疏言凡有栽種罌粟者
責令族長甲長押令拔除改種五穀如花戶不遵者稟官
究治知情徇隱者罪之州縣官吏私徵罌粟畝稅者立予
參撤得

旨報可並著各省按照此次章程一體嚴行查禁時民飢日甚
朔州甯武告警大青山後馬賊出掠拒斃官兵南路鹽梟
悉起爲盜 二月公派提督葉義信等分軍會剿尋平之

奏借直隸勁勇六千移屯直晉之交備賊公以晉張樹屏
一軍僅三千人檄記名布政使劉連捷募勇五千人自湘
馳晉復奏請撥北路各廳州縣倉穀分賑 三月公派道
員羅嘉福馳往直隸邯鄲縣恭請

聖井崗鐵牌來省設壇步禱省城及平蒲潞澤各府沁霍解
絳平定各州均得雨數寸尋得

詔撥部庫銀十萬兩賑饑 四月先是

諭旨著再由江蘇安徽江西浙江福建湖北湖南山東四川廣
東每省協濟山西河南兩省銀各數萬兩至是月公與閻敬
銘以賑務益迫請於各省指定確實數目疏言晉省地瘠

民貧素無蓋藏卽遇豐收不敷一年之食向日蒲解汾平
仰給於秦潞澤遼沁仰給於豫其餘腹地州縣無不以口
外爲糧之來源去歲秦豫亦被旱災口外收成連年歉薄
糧源旣竭仰給無從謀挽輸於數千里外曠日持久而不
得一飽道遠費繁而無由速至此採辦之難也晉中四面
皆山不通舟楫現籌糧運以河南之周家口道口直隸之
泊頭山東之館陶有水運可資者爲稍便然相距晉界均
在千里內外舍舟登陸顧車極難一入晉疆則山徑崎嶇
道路逼仄用馬騾馱運展轉飛挽分撥災區况又千數百
里不等大禱之後牲畜倒斃一空非重資無人應募屢蒙

恩旨撥發漕糧及晉省委員在各處採辦之米往往滯於中途萬難速到饑民之口不得不寬籌經費多設分局節節轉輸以致腳價日昂財用日絀去年每糧一舫運百里給腳錢七八文者今增至十數文猶難暢行買糧既已多費及比運費反少三數倍價銀固已難籌腳費尤無所出從前直隸境內經督臣李鴻章飭令廣覓腳力絡繹於道抵晉始有停頓之虞近則津門舟車兩缺臣率丁壽昌費盡心力而亦苦艱於漕轉是境外亦有壅滯之憂此挽運之難也溯自去夏開賑勉力支持方意改歲後春雨渥足地利堪資乃時過立夏僅霑微雨農夫荷鋤而待澤布穀催種

以無期前日上中之戶今悉變爲待賑之民初不料災荒
至於如此之久也頃派署藩司江人鏡前往晉祠乞水回
城再申祈禱冀沛甘霖惟念乞賑黎氓羣如嬰兒之望乳
汁嗷嗷待哺命在須臾糧運之遲速兆億之死生係焉臣
敬銘派員赴楚皖產米之區購買糧石運赴河東藉資平
糶由周家口設局轉運原欲隨運隨糶隨糶隨糶隨糶川流不
息無如時勢日艱大違初願所得糶銀立須撥充運費不
能稍資周轉卽臣國荃所籌獲鹿以西轉運未到之糧將
近二十萬石每石運費從少以八九兩約算已非二百餘
萬金不可臣等但求迅速挽輸不敢多望糧米此又迫於

艱危不得不思所以變計也自來災區困苦民志往往不
堅匪徒煽惑甚易亦屬恆情甯朔之變特往事耳刻下積
欠滿兵綠營練軍月餉或一年或八九箇月不等至少亦
須發半年各兵弁領餉本屬無多際茲糧價奇昂縱令按
月放餉已不足支半月之食况乃積欠之益多乎若不設
法騰挪更覺譁變堪虞此兵餉防餉練餉之必須籌畫者
也錢糧早已停徵留夫款無所出驛站之開銷各官之廉
費及一切雜支之萬不可緩者司庫酌量點綴每月亦須
二萬餘兩從前指望仰屋堪嗟自去年籌賑以來州縣如
有不實心竭力者臣等查明無不立予參撤其中亦有盡

心愛民勤勞卓異之員理宜量子體恤酌發應支之款以鼓其氣乃竟因此處處掣肘雖有賢能亦難望其展布矣近日州縣等官多有饔殮莫繼者且有得力之員因辦賑焦勞過甚遂至一病不起無以爲殮者官民交困不知何以至於此極也各州縣請銀請米並請籌備牛具籽種之稟紛至沓來艱危慘痛之詞不忍卒讀祇望從前部議所允各省協款早賜惠解扶持饑民危局方免決裂崇朝然而未可以慰旦夕之望耳古稱易子而食析骸而爨今日晉省災荒或父子而相食或骨肉以析骸所在皆有莫之能禁豈非人倫之大變哉體察情形非加賑三四箇月不

足以度活孑遺至於南路幾於有地無人他日善後事宜無從措手刻計款項之可恃者幸有欽奉三月十五日

上諭加恩著再由江蘇安徽江西浙江福建湖北湖南山東四川廣東每省協濟銀各數萬兩爲一鉅宗應懇

寄諭該各省督撫再行加協晉省銀六十萬兩尅期匯解疏入詔下江蘇安徽江西浙江福建湖北湖南山東四川廣東各籌撥銀六萬兩尅期解赴山西以應急需是月公檄布政使江人鏡至太原縣晉祠

聖母廟請水設壇

關聖廟連日步禱旋省城及東南各州縣均得雨時業戶多

流亡公飭賑捐局司道籌備籽種招徠勸耕復奉

詔旨截留南漕八萬石賑饑公派道員朱其詔設局於蘇曹

五月公以晉省瘡痍難復疏陳目前切要事宜其一爲清
釐荒地也此次大祲之後丁壯轉徙他鄉老弱填委溝壑
災重之區十室僅存二三次亦不及五六荒田廢地無邑
無之急宜招徠開墾免致額賦虛懸惟直豫陝三省鄰封
皆歉流亡之戶或客死而不歸接壤之氓多自芸之不暇
是招徠旣非易事卽開墾亦徒託空言臣擬檄飭州縣先
就有主之田酌給籽種假貸牛力其力能自備者無論矣
此外無人地畝卽責成地方官督同公正紳耆按畝清查

另立冊簿一面出示鄰境勸其來耕如實係死亡絕戶及寄居他處者待至今年秋後不歸准令本戶近支承種次及遠族或支派遠近不同則以輩分年齒長幼爲序本族無人方准同甲同村或同村人少亦許外村外縣外府客民領種其承佃之法由鄉約社老稟明地方官給予印票交佃戶收執或值本戶歸來當年所獲之糧除納賦外悉予承種之人應俟明年播種之時方許認回倘耕至五年本戶不回卽由該族戚村甲承爲永業蓋晉省地多磽瘠人工牛力所費不資若竭力以芸他人之田而本戶坐收現成之利轉使承種者工本無著旣失持平之義將生畏

阻之心此不能不設法招至者一也其二爲編審丁冊也
溯查明制魚鄰冊以田爲經以戶爲緯地丁之糧本分爲
二地則永無消長丁則時有減增我

聖主仁皇帝特施浩蕩之恩

諭令天下丁冊以康熙五十年人數定爲常額續生人丁永不
加賦

世宗憲皇帝又以各邑丁糧攤入地糧自雍正四年迄今百五
十載率土無田之民永免追呼之累獨山西一隅辦理稍
歧乾隆年間經前撫臣覺羅石麟鹽臣吉慶暨御史姚成
烈戈濤等先後條奏請併丁於地屢次推廣猶未改歸一

律按之冊籍有全未能歸併者二十餘州縣有量歸十分之二三者三十餘州縣歷任牧令因賦稅之額有常考成之典喫重遂不復計及丁口之盛衰但論額徵之多寡循列徵收小民迫於催科始則賣妻鬻子以供賦者有之繼則逃入無何有之鄉官衙以無丁可徵畏吏議其桀黠者或攤甲村之糧於乙村之丁亦有之其循良者則徑代賠丁糧厚受公私之累遂至一蹶而不可復振比比皆是然則晉民有無田之課州縣有賠糧之缺官民交困行之豐年猶受其病處之兇歲更何以堪持久不變殊非承宣聖化之道也臣擬飭該州縣等另立糧丁細冊按里按甲分戶

稽查註明原額丁口若干現存丁口若干其缺額之丁無
丁之糧應乞

天恩准於核實酌減至於有丁之糧則歸之於地以定永久之
賦庶於國計民生兩有裨益如蒙

俞允臣卽當派委委員會同該管道府詳細確查專案奏明辦
理統候

聖訓遵行其三爲均減差徭也溯查漢制民年二十而傅給徭
役唐立租庸調法一年之中一丁出力二十日宋設雇役
差役歷代互有得失惟念北方差徭之重由來舊矣晉省
爲秦蜀孔道自平定州以至永濟縣東西大驛延袤一千

四百餘里東南至潞澤八百餘里爲赴豫大道北至歸綏
包頭一千餘里爲赴北口大道凡軍差餉差藏差絡繹於
道州縣供億之煩幾於日不暇給車騾旣資之民間役夫
亦責之里甲其不能不擾累者勢也竊惟徭出於賦賦重
則役重賦輕則徭輕而各屬辦理各有不同有闔縣里甲
通年攤認者資眾力以應役其法尙爲公允有分里分甲
限年輪認者初年攤之一甲一里次年攤之二甲二里各
年之差徭多寡不等卽甲戶之認派苦樂不均更有豪猾
刁徒恃有甲倒累甲戶倒累戶之弊將其地重價出售而
以空名自認其糧迨三五年乘間潛逃卽本村亦莫知其

踪跡本甲旣代賠無主之糧又代認無主之差貽害靡窮
控告無路於是而流於窮乏無依者不知凡幾官晉士者
莫不知民間疾苦由於差徭之重倍於正賦也而無術以
蘇之此次若不廓清錮習以紓殘黎流毒伊於胡底特是
大差固不敢詒誤積弊亦不可不除爲今之計惟有減差
均徭之一法尙堪略爲補救臣擬檄飭州縣除各項大差
持有傳單勘合循照常例支應外其本省軍差餉差委員
向無定例者均應遵通飭條款辦理其餘概不准藉端苛
派如有擅索車馬者卽將舞弊之人照例治罪並將該管
官吏參劾至於虛糧認差之弊擬卽乘此大禮一律釐正

5
湔除核減以後仍令閭縣按糧均攤不許分里分甲此苑
彼枯亦不准飛灑詭寄張冠李戴庶幾事理得平稍合前
賢因賦定役之義或亦補偏救弊之一端也疏入得

旨報可是月公籌款掩埋露齒奏請以官錢店糧店展緩裁撤
六月公設局收養幼孩以晉省續勸捐輸銀錢糧石已
有成數無可再捐奏請停止又以新募湘軍並舊有樹軍
餉項無出奏請裁撤練餉並截留各路協餉及推廣捐輸
以資籌防自晉省大饑錢糧無涓滴之入而出款較往歲
爲增公倉皇補苴朝不謀夕至是公奏請以上年南路被
災之平陽蒲解絳四府州並所屬各州縣應徵光緒四年

下忙及從前奏准緩至光緒五年秋後帶徵上忙蠲餘錢糧一律蠲免北路忻州代州保德州各屬及太原汾澤潞安大同朔平甯武霍隰遼沁平定各府州屬並口外各廳分別開徵時山右種罌粟者較去歲減十之六七公以乘此大祲糧貴之時勸民改業可期事半功倍奏請以後種罌粟者將該戶地畝充公令公正耆老社首經營以備地方公用得

旨嚴飭地方官紳實力奉行是月復大旱 八月公買牛給貧民勸耕劉連捷募勇五千人至晉公檄以千人駐太原以千人駐陽高山陰以三千屯包頭巡山前山後先是部議

令撤練軍樹軍至是公奏言樹軍欠餉至七八箇月無從
籌給南路千餘里別無勁旅不能並裁練樹兩軍萬一大
青山賊竊發則劉連捷專顧北路張樹屏專顧南路不至
有意外之虞得

旨仍著陸續裁撤時晉省再荒 九月公疏請續撥山東漕米
十二萬石並撥部款二十萬兩充運費得

俞旨由山東巡撫督飭糧道提前趕辦務於年內全行起運其
隨漕輕費等銀一並先行扣留備用公遂奏請展緩賑捐至
來年麥熟時候再行停止設立河東分局以便轉運是月
大雨雪 十月公檄道員王定安丁彝綬赴山東接運東

漕疏請遵

旨提前趕辦趁運河未凍卽由糧道籌撥庫款至東豫購糧就近分運道口館陶獲鹿三處而以折色所徵之銀照數歸款時晉省賑糧屯保定等處未運者尙數萬石國子監司業汪鳴鑾請飭停運變價公疏陳晉省此時糧價尙未平減仍請照舊轉運復與閻敬銘會奏辦賑出力人員請准照海運河工章程分別獎敘並請緩解河東道庫鹽課暫顧賑需均得

旨著照所請 十一月公以東漕十二萬石運費在百萬以外疏請由江蘇安徽江西浙江山東五省各撥銀六萬兩湖

北湖南廣東四川各撥銀五萬兩得

旨允准丁彝綬以病留道口轉運局時王定安至山東德州轉運局隨兌隨運由獲鹿東陽關道口三路入晉時陽荒車少饑民多匿山谷定安創各縣分募法由直東州縣派人赴鄉招募以五十輛爲一批一攬頭領之皆用民價平雇數百里內鄉民樂從車輛輻輳皆爭先挽運惟恐後時兩月間東漕十二萬石悉達災區云 年終

賜福字一方

卯光緒五年公五十六歲

正月時晉省饑民尙四十餘州縣東漕十二萬石不能贍

公疏請續撥東漕尾數九萬餘石及東省所收光緒四年分豆子二千七百餘石撥充晉省籽糧得

旨允准山東巡撫文格解運費銀三萬至德州局 二月王定安分道運米豆入晉公遵

旨停止晉省捐輸 三月奏請以和林格爾托城兩廳沙磧鹽廢地糧一律豁免得

旨允准復奏設濬文書局於太原省城刻六經四書小學近思錄呻吟語牧令全書五種遺規荒政輯要各書是月停止山東晉捐奏改捐輸總局爲善後總局將前所請清釐荒地編審丁冊均減差徭三端次第興辦 閏三月東漕尾

數運竣王定安撤德州局回晉公以晉仍苦旱奏請緩解
西徵月餉並以河東丁丑綱引積滯請分三年帶銷均奉
俞旨 五月撤道口蘇曹獲鹿清化平陽轉運各局嚴訊販買
幼女採買牛馬給民開懇公以上忙收數無幾各屬得雨
過遲奏請暫緩停捐 六月

詔撥部庫銀並分撥山東安徽等省地丁釐金鹽釐協餉各
項銀五十萬兩籌辦晉省善後 七月公以河東戶口耗減
潞鹽運銷日滯疏請酌減引費以紓商困晉賑之起也以
運糧爲最要凡撥留漕米江廣十一萬石江蘇八萬石山
東米豆近三十萬石此外招商局平糶之米奉天天津採

買捐助之米及閩淮兩處捐米約共二十萬石通計前後賑糧爲數近七十萬石設轉運局於天津德州三道入晉道直隸者匯於獲鹿局而接運之局六曰仕貼局曰太原省局曰平遙局曰靈石局曰霍州局曰平陽局分達於太原汾平定霍隰是爲北一路道山東者匯於館陶局而接運之局三曰蘇漕局曰東陽局曰良馬局分達於潞遼沁是爲中一路道河南者匯於道口局而接運之局八曰楊樹灣局曰清化局曰周村局曰翼城局曰孟縣局曰鐵謝局曰會輿局曰茅津局分達於澤蒲平陽絳解是爲南一路至是公疏請獎敘總分二十局出力人員凡各省勸辦捐

賑官紳及河南護糧員弁皆請獎敘有差 八月山西己卯科鄉試公入闈監臨先是三年間外省賑糧未至借常平倉穀賑饑至百餘萬石是年六月間公奏准晉省歷次借出倉穀凡實欠在民者一律豁免至是公疏請由本省陸續籌銀五十萬并此次奉撥銀五十萬限三年補還倉穀得

旨允准 九月公病請假一月奏委布政使葆亨代辦武闈十月公開單報銷晉省賑款凡各屬賑過貧民三百四十萬二千八百三十三口用銀至一千數百萬兩用糧至一百數十萬石 十一月奏請以前明壽陽縣知縣藍尙質

列入祀典以彰遺愛並請以被災較重應行清查糧賦之陽曲太原等六十四州縣從本年九月起至明年六月底止凡無主房業由官發給印照與未荒以前民人典買房地現需更名過割一切稅契銀兩均免其徵收時札薩克郡王那木濟勒旺楚克之母福晉索果特氏將積存俸銀購買耕牛解晉助耕公疏請從優獎敘 十二月公以晉省荒地太多勸墾不易奏請以永濟虞鄉解州芮城平陸吉州汾西垣曲陽城沁水石樓十一州縣准將光緒六七兩年錢糧徵收一忙蠲免一忙以利墾荒得

旨允准先是東灘營所轄之封門口汛設防兵百名備晉豫邊

至是公以豫疆靜謐檄東灘營都司撥回六十名操練疏請裁河東引鹽續增加費羨餘並暫停減額引以保正課是月晉省東北南三路皆得雪年終

賞福字一方

庚辰光緒六年公五十七歲

正月公分別歸併減豁未攤丁糧暨請豁坍荒銀米豆穀疏言山西清釐荒地編審丁冊事宜臣督率司道遴派委員實心查勘兩載以來該印委親履隴畝認真清釐現已一律告竣其目有三查山西攤丁入地一案始於雍正九年自乾隆元年至五十九年七次辦理攤丁已歸併者凡

四十九州縣自嘉慶元年至道光二十六年六次辦理攤丁已歸併者凡三十六州縣前後辦過攤丁州縣凡八十五處此外全未攤併者尙有遼州等八州縣又丁糧攤入地糧十分之五者有屯留等四縣十分之三三者有吉州等三州縣十分之一者有河曲一縣通計現在地丁未歸併州縣凡十六處又屯丁未攤入地者有汾陽河津臨汾鳳臺四縣除現由該印委等體察情形酌將該屬有丁之糧均勻攤入地糧照徵外目前缺額之丁無丁之糧共計短正耗銀二萬一千三百七十三兩有奇皆係逃亡故絕無丁可徵自應欽遵前次

恩旨核實減豁俾民間永遠無丁倒累戶戶倒累甲之苦此現
辦併減丁糧之情形也至清釐荒地一案臣屢飭該印委
等分別老荒新荒其新荒地畝不過因遇災荒偶廢耕作
應由臣另案奏請停徵緩徵一俟年歲大轉卽當規復原
額照舊催科此外老荒之地約分四項曰水冲曰沙壓曰
石積曰鹽鹼緣晉省表裏山河黃流由北而南復由西而
東蜿蜒迴淤二千餘里而汾潞漳沁滹沱諸水皆發源於
晉每遇暑雨秋霖山水陡發洶湧湍急頃刻變爲澤國河
身遷徙旣無定所阡陌坍塌原隰改觀故水來則有冲塌
之虞水退則爲沙石所掩甚至積澤深窪時久漸生鹽鹵

謙氣過重百穀不生凡此四項耕犁既不能施糧賦將從何出往時州縣自顧考成鞭笞追呼責之里胥里胥藉端苛斂飛灑攤派仍取之窮檐雖在豐年已不勝苦累矧值大禮更何以堪臣現飭該印委等清出太谷等五十六廳州縣坍荒地一萬一千八百九十八頃六十五畝九分九釐九毫四絲共計短缺地糧銀四萬五千三百五十六兩有奇米豆四千二百二十七石有奇穀一千十石有奇草九十束有奇均係坍荒無著無款賠抵自應永遠蠲免此現擬豁免坍荒之情形也臣待罪晉疆已歷三載每閱刑名案牘或因制錢數十致釀人命或因瓜餅小物戕害民

生非其風氣獨薄由於土瘠民貧產物絕少賦繁徭重謀生過難若

朝廷寬一分賦役則閭閻增一分培養且山西通省地丁雜稅歲徵銀三百萬有奇今缺額丁糧及坍荒地畝兩項纔銀六萬餘兩米豆等項纔五千數百石於庫帑所損尙微而於窮黎所裨已鉅謹繕具簡明清單仰懇

天恩准將遼州夏縣屯留壺關甯武神池五寨榆社偏關保德永和崞嵐河曲興縣吉州右玉等十六州縣缺額丁糧暨汾陽河津臨汾鳳臺等四縣缺額屯丁共銀二萬一千三百七十三兩九錢一分七釐六毫四絲七忽一微又太谷

忻州代州洪洞浮山永濟榮回虞鄉臨晉萬泉平陸芮城
稷山河津長治壺關高平陽城遼州偏關和順榆社懷仁
繁峙山陰興縣崞縣右玉太原翼城太平夏縣隰州曲沃
蒲縣介休沁州沁源武鄉陵川沁水應州定襄左雲鄉寧
岳陽奇嵐平魯甯遠清水河朔平府朔州鳳臺襄陵陽曲
臨汾等五十六廳州縣坍塌無著地糧共銀四萬五千三
百五十六兩三錢四分五釐六毫七絲一忽二微米豆四
千二百二十七石八斗四升七合四勺六鈔四撮五圭二
粒穀一千一十石二斗三升九勺草九十束九分概予永
遠豁免庶民間積累從此清釐瘡痍可期漸復得

旨允准先是同治間陝西倡亂遣其黨四出招誘新疆回亂大起陷伊犁俄羅斯以中國方有事東南發兵據伊犁以代收復爲名時同治十年五月也光緒三年新疆平時俄人往往庇匿逋寇

朝廷慮諸將忿極啟釁四年

詔侍郎崇厚以全權大臣出使俄羅斯議交還伊犁事崇厚與俄人定約議以伊犁歸我賞兵費銀二百八十萬而劃伊犁西界數百里與俄又劃界數百里跨天山以隔南八城其他侵佔口岸尤多崇厚赴黑海畫諾

上怒褫崇厚職逮問時光緒五年也至是

詔毅勇侯曾紀澤自英國赴俄議約公以山西綏遠城爲近邊
要隘劉連捷方乞假省親檄其弟劉鴻年統馬步八營屯
包頭屏蔽歸綏會

詔公備邊公函商將軍瑞聯督旗兵聯絡聲援晉省軍需支用
款目自咸豐二年至同治三年六月止開單報銷後至三
年七月以後迄八年六月回捻充斥河防邊防戒嚴追師
絡繹供億尤繁八年以後至光緒五年但減客勇集練軍
僅防歸綏之兵未能裁撤然用款少矣公撫晉時卽值大
稔補苴不遑未及清理而州縣交代冊均有軍需借撥之
款司中無款給還勢不能不以墊款列作抵款後任又以

軍需未辦報銷往往以抵款虛懸不肯接受彼此爭執莫能結算至是公以軍需積至十五六年之久報銷一日不清卽抵款一日難撥而歷時過久款目浩繁不能循照舊章造冊疏請援照成案開單報銷得

旨允准公以太原府屬榆次縣自康熙間定例歲貢西瓜六百四十顆而里胥苛派道路盤費民間苦累往往歲逾千金乃奏准永遠蠲免復疏請以新荒地畝洪洲浮山等五十州縣逃絕荒地自光緒五年上忙起停徵四年忻州榆次等四十五州縣無力播種荒地自光緒五年上忙起停徵三年得

旨允准 三月公以舊創復發疏請開缺就醫得

旨著賞假兩箇月安心調理毋庸開缺時晉省各局分四端吏治局五曰保甲曰發審曰交代曰清查攤款曰候審軍務局四曰籌防曰籌餉曰軍裝曰軍需報銷文教局二曰濬文書局曰通志局因賑務新設局三曰善後曰收養公所曰恤寒公所至是公遵

旨裁報銷局恤寒公所候審併入發審清查攤款併入交代軍裝併入籌防書局併入通志收養併入保甲籌餉併入善後 四月公以晉省攤款過重疏請將各州縣每年攤補承辦平好鐵斤不敷銀兩在釐金項下動支並請將倒

支腳價免扣三成以輕官累 五月公假滿病尙未痊疏
請續假一月 六月

皇太后聖躬欠安公遵

旨咨送醫士汪守正至京時晉省善後次第就緒新荒地畝則
飭各州縣籌備牛種復以災重者分別按畝給銀三四五
錢不等災輕者復分別按畝給錢一二三百文不等流亡
聞風歸墾荒地已不及十分之一二歸併丁糧又續經查
出坍荒缺額之地丁等銀五千三百餘兩米豆三百一十
餘石奏明請豁差徭則就民情地勢分爲大驛次衝偏僻
三項一應差使均令照章支給其格外科派需索概行禁

革約計每年供億必不少之數由閤縣按畝均攤較舊章或減十之五六或減十之七八通計每年爲民間節省差徭錢百餘萬緡倉穀則每石價銀九錢至一兩上下者隨購登倉凡穀價在一兩三錢以外者概令緩辦以各屬買穀銀兩解存該府州庫中俟價平採買公疏陳情形並請獎總局司道葆亨松椿王定安暨在事各員是月公力疾銷假時俄意在起釁增兵守伊犁將以兵船翔海上 七月

詔公督辦京東軍務屯山海關著來京陛見七月初三日公卸山西巡撫篆留步隊三營防晉二十日公率添募親兵三

營起程先飭劉維楨郭寶昌兩軍由輪船北上湘毅馬步八營由大同張家口進時俄以我不允其議由桃花江行船至伯都訥以兵船馳至大連灣之大孤山海口復揚聲將由日本海口黑龍江進兵二十八日公在太安驛奉到二十六日

上諭此時事機至迫著卽迅往山海關妥籌布置暫無庸來京
陛見 八月初三日公抵保定病復發

詔趣公行十七日公力疾行二十二日抵天津先是

諭博崇武所帶旗營練軍歸公節制公以所部宋慶劉維楨郭寶昌等軍除宋慶軍二千人分屯營口外祇九千人兵力

軍薄疏言僅能專顧山海關一路若調遣旁軍兼顧旁路數月之後事機見端難免貽誤二十八日奉

上諭該撫威望素著謀略深長當此防務喫緊之時實有非他人所能勝任者曾國荃總當懍遵前旨力任其難所有旗營練兵仍歸該撫調遣以一事權 九月初四日公力疾由津起程十一日抵山海關檄鄂軍劉維楨二千人屯威遠城皖軍郭寶昌二千人屯傅家嶺金家山劉鴻年劉連捷葉必信楊西平袁大升等部五千人屯二郎山回馬寨等處顧小河口石河口秦王島咨提臣李長樂令部將楊玉書以千人屯老龍頭長龍岡宋慶九營與博崇武旗兵皆駐

關外營口奏請就近歸將軍歧元節制並奏足疾加劇懇
恩賞假一月均奉

詔旨允准並

賞給人參六兩俾資調理時左庶子張之洞以敵船若入遼海
必趨營口奏言公宜駐營口公覆陳營口距錦州三百里
距奉天四百里上下左右路路皆通縱駐軍於營口未必
能制敵不窺伺旁路山海關爲東三省入

京要隘若舍近畿而遠謀營口未見其宜且調遣出關失天
津昌黎二軍犄角之勢萬一敵船乘虛而入營口之軍糧
餉子藥皆無來路恐不戰而自潰矣應仍駐山海關以資

控扼並言晉

經費以示體

優詔報可 十月

詔以俄國議約前

飭公及時布置公

月 十一月

假期滿病仍

旨力疾視事一摺

恩賞福字荷包銀

長子紀瑞故

辛巳光緒七年公五十八歲

正月公兄子紀澤自俄馳報公言俄約已有成局二十五日公奏陳遣撤前後收錄餘勇二千四百餘名二月奉上諭陝甘總督著曾國荃補授卽行來京陛見十六日公抵天津交卸山海關防務與李鴻章會商檄留防軍二十七日公以病請寬予假期就醫尋奉

上諭著賞假三箇月就醫調治三月初三日自天津起程四月初三日抵長沙驚聞

大行慈安皇太后升遐初十日奏泣陳哀悃恭慰

聖懷一摺六月二十三日公次子紀官故七月初四日在

長沙奏陳假期已滿病勢未痊懇

恩開缺調理奉

旨著賞假三箇月安心調理毋庸開缺 閏七月初十日公返

湘鄉十三日抵里第 八月初一日奉到閏七月十四日

上諭近聞關內外降回潛至陝境窺探曾國荃病體如已就痊

著卽赴新任毋庸來京請訓初五日公奏陳病狀懇

恩開缺尋奉

上諭著准其開缺安心調理一俟病體痊愈卽行來京陛見

是年公捐建衡山懸鐘石烏金寺

壬午光緒八年公五十九歲

公奉到正月

諭旨著卽行來京陛見旋於四月二十五日公在長沙奉到十四日

上諭兩廣總督著曾國荃署理兩廣地方現在籌備邊防關係緊要著卽刻起程馳赴署任毋庸來京請訓 六月初十日公起程從郴州道樂昌至粵 七月十一日抵廣東省城 十二日接受兩廣督篆及鹽政印信時法已陷越南河內省城滇粵軍皆出關備邊提督黃得勝部二營防欽州吳全美統師船十艘至越洋巡練公檄善後局籌款出洋購買雷艇魚雷洋礮等件 八月十六日奏陳邊防事宜一

摺先是有人劾潮州鎮總兵方耀辦理積案妄殺甚多創立花紅名色勒捐潮屬富戶等款

詔署督臣裕寬確查據奏至是公查勘驗不實會奏以白其事時以御史李肇錫劾奏濫保道員王定安部議降二級調用尋奉到七月二十一日

上諭吏部奏遵議大員處分一摺前任山西巡撫現署兩廣總督曾國荃應得處分著加恩改爲革職留任 十二月二十日遵

旨奏保大鵬協副將賴鎮邊明德協副將利輝赤溪協副將吳迪文崖州協副將梁棟材龍門協副將戴朝佐五員堪勝

水師總兵之任奉

旨留中是月廣東高州府梅麓匪徒莫毓林等糾眾越電白縣城劫獄縱囚公檄記名提督黃得勝移防欽州二營馳赴高州圍捕尋奏請以電白縣知縣董汝礪陽江鎮右營都司鄭廷熊摘去頂戴 是年公捐修衡山石地坊至黃龍壩通衢

新編 漢書 卷之六

三

曾忠襄公年譜卷四

癸未光緒九年公六十歲

正月奉

上諭飭查瓊州鎮總兵彭玉修撰黃思永廣東學政馮爾昌各
參款公查勘不實先後覆陳得白先是八年萬州黎匪作
亂至十一月擒斬匪首符亞新等二十五名全境肅清至
是月二十八日公奏陳籌辦善後情形保獎補用道劉鎮
楚等各員並請

勅部議卹守備蕭良仁及開復瓊州鎮總兵劉成元等官時公
奉到八年十二月

上諭總理各國事務衙門奏法越交涉一事法人現欲與中國會商請飭豫籌辦法一摺法越一事法人願與中國派員商辦李鴻章現與法使寶海議大略辦法三條亟須滇粵各省先事妥籌以備臨時會議分界保護一節滇粵民力究能保護至越南北圻各省並何處爲滇省保護之界何處爲粵西保護之界至通商口岸是否借設保勝爲宜越官劉永福現住山西興化宣光等處將來保勝能否作爲近邊口岸就所議第三條內南北分割之論以越之富良江各分保護之界卽於入界處設立總局均須規畫情形豫爲酌度著將應行籌畫各節查照該衙門前函詳慎妥議如何有利無害堪以

行之久遠迅速奏明以憑核辦 二月初八日奏伏查法越交涉一事署北洋大臣李鴻章現與法使寶海所議其目雖有三端其事仍歸一貫越南國境向分南北兩圻富春係其國都南圻各省已多爲法人佔踞北圻各省法人久已垂涎富良一江尤其注意所在 臣等檢閱地圖富良江源出滇省直貫北圻之中雖非南北圻分界之處今若劃分富良江或劃分南北圻各爲保護中國保其北法人保其南則越之富春都城已爲中國保護所不及若並富春歸我保護則越南之地我所保護者十之七法人僅十之三目下中國是否力能及遠法人是否帖服無詞似非審

度地形通籌局勢有未易遙爲臆決者此分界一事當由滇南粵西會同確查詳慎妥議而後可定者也至於保勝距富良江之上游其地與滇邊之蒙自等處接近若在該處設立通商口岸則滇省之屏藩旣撤滇疆之鎖鑰胥開洋商輪船溯江往來洋土各貨沿江上下滇之蒙自一處又當其衝日後商務日興難保法人不復請以該處爲通商口岸蓋富良江旣距滇省下游蒙自又爲滇省內地利害於雲南爲切關係亦於雲南爲重此通商一事宜以雲南之議爲定者也兩粵邊境與越南接壤者廣東止欽州一隅本非要衝廣西則沿邊延袤千數百里在在與越境

毗連將來畫界定擬後粵西自當留兵防護究竟粵西之
某卡某隘接越南之某省某地何處爲要道何處爲間道
其間山川之形勝道里之險夷必須躬歷周知庶防衛可
期扼要臣等現已函致西撫臣由西省揀派明白地形之
員履勘邊境繪圖附說徑呈總理衙門以備核覽此留兵
保護一事宜以廣西之議爲定者也竊以爲此時釁端不
可開和好不可失富良江之通商亦勢難阻止但可共而
不可分越之國越自主之中國與法共保之許以通商之
議而渾其分界之名爲越南籌安全之方卽仍不失保護
之議法人苟不利越之土地諒亦不能別生異說再肆吞

併之謀奏入奉

旨留中 三月二十八日奉

上諭總理各國事務衙門奏
務一摺現聞法兵已攻破
變情殊叵測在我保護屬
備豫廣東原駐廉瓊水師
越洋認真巡哨凡海軍應
稍涉疏懈此次籌備各節
務當悉心經畫實力整頓
我聲威用資鎮懾並期實

大局 四月初九日覆奏云法人用兵越南注意專在富良
一江富良江之北爲越南諒山高平等省延袤千數百里
在在與粵西毗連若溯富良江而西則可由保勝直通滇
省中國保小扞邊之策首重粵西次則滇南現在粵西防
軍分駐越之北圻各省廣西藩司徐延旭業已出關自必
妥爲布置滇軍之駐越境者尙在富良江之上游中隔劉
永福保勝一軍未與法國兵鋒相接至於粵東陸路與越
接壤者止有欽州一隅彼此皆係邊界偏陬無關全局水
路之廉瓊洋面雖與越洋一水相通其實巨浸渺茫聲勢
不相聯絡目下越南各港口法人均駐有兵船據探中國

招商運糧船亦爲法人所阻並奪其糧米五萬餘石粵東舟師若境駛近越洋巡哨港口之外風濤洶湧駐泊綦難倘或避風駛入港汊與法船遙遙相對逼處之餘恐未能相安無事萬一越之兵船駛入港口法人出而阻攔彼時剛旣啟爭柔亦示弱尤覺進退不易倘若於廉瓊洋面駐紮操防則於越南相距太遙仍不足以壯軍威而資鎮懾昨據越南陪臣阮醵來稟法人有借助俄國師船之舉並聞該國續有兵船東來不日可抵香港夫以法攻越屢勝之後又復濟師揣厥隱情顯示戒心於我其鋒未可遽撓粵東舟師遠出外海後無應援設若法人謂我援助越南

因而與我爲敵以在越境之戰艦扼我軍之前以泊香港之師船截我軍之後腹背受敵危殆堪虞從來用兵若不能出於萬全卽未可輕於一試粵東舟師遠出彼族未必懾我威稜轉恐釁自我開騰其口說在越南未蒙保護之益而在中國海疆或反因此而多事譬之抱薪救火自燎其衣似非計之得也吳全美一軍不如仍駐虎門逐日操練不明作橫海揚戈之舉但隱示勒兵觀釁之形庶聲實之間使人不測縱未能折衝制勝總不致別肇他虞較之跨海懸軍似覺稍有把握初十日公奏請將審明聚眾劫獄之候補都司莫毓林革職覆訊定議是月公以捐助皖

賑經安徽巡撫裕祿奏奉

諭旨交部議敘著隨帶加二級 五月先是八年十一月間公接總署函酌令水師提督以舟師退紮虎門嗣因綏靖安瀾海鏡清三輪須燂洗方能赴防至是月初公接北洋大臣李鴻章電囑飭吳全美會同丁汝昌前赴廉州查探初六日即赴欽州之白龍尾越南之江平等處瞭形勢時越匪竊發公飭參將莫善喜募軍防堵檄黃得勝自高州移屯欽州令吳全美統安瀾兵輪並上年調閩之濟安飛雲兩輪借撥粵海關遂州海輪馳赴瓊廉洋面遣潮州鎮總兵方耀部三營馳赴欽廉節制黃得勝兩營與吳全美互

爲聲援復飭南韶鎮總兵鄭紹忠記名總兵鄧安邦訓練
嚴備 六月奉到五月十六日

上諭法越構兵一事久未定局法使脫利古與李鴻章會晤以
中國是否助越爲言意在挑釁甚爲叵測亟應先事籌謀以
杜狡謀著將沿海防務實力籌辦認真布置不可虛應故事
徒令外人輕視公會撫臣覆奏云廣東洋面延袤三千餘里
東連閩省西接粵南南濱巨浸之中臣等察看形勢竊以
爲今日防務虎門最要黃埔常州白兔崗尤爲門戶鎖鑰
更宜先事預防虎門地方除威遠下橫檔兩礮臺及鵝頸
礮臺業經修竣此外沙角礮臺及上橫檔浮州山飯籬牌

等處必須作速修築虎門沙角以內至黃埔常州百數十里之地亦宜多築土台白兔崗白鶴山魚珠沙路更應趕緊修築便可與大黃河中流砥柱礮臺聯爲一氣沿路水道則暗置水雷以輔之此豫籌先守門戶以固省垣根本之情形也又守邊之道控扼在乎得地而守禦尤在得人今欲防守各礮臺必須屯集重兵方可以資防護竊計虎門沙角及黃埔常州兩要隘每處須屯萬人省城外抵大黃河中流砥柱等處共十餘里亦宜有團練萬眾嚴備防守現在法人叵測和戰未定不宜遽招多營徒資耗費臣等已函商總兵方耀等密選將官能充管帶統帶者數十

員能充哨弁百長者數百員議定在江北各屬挑選驍勇
派候補道周炳勳選湘楚久經戰陣者四十員充當教習
會同各鎮將訓練對敵分合進退之方諭以奇正埋伏步
伐止齊之法遇有警報卽令號召成軍防守各臺各壘此
審度緩急豫籌布置之實在辦法也又查廣州海口虎門
以外尙有蕉門橫門厓虎虎跳磨刀兩口均可繞至城右
其餘港汊可通內地者甚多若逐處設防非惟兵力不足
亦且斷難周密臣查沿海沙戶漁船實有萬數千號其大
者船堅礮巨於各港口水道淺深潮洑消長無不熟悉臣
等擬將各澳漁戶多方聯絡編聯名冊無事聽其各安生

業設有警報則調集支河港汊之內分段巡防以輔兵力之不足此外沿海各郡縣亦經密飭地方文武將各營兵丁認真訓練各鄉團練多築碉堡以期人自爲守敵難猝攻此布置沿海地方港汊鄉村豫籌有備無患之情形也

臣曾國荃定於聞警之日前駐虎門前敵營壘之內相機調度晝夜激勵將士鏖戰不懈以期固守疆圉尋奉上諭著來京陛見 七月二十九日卸粵督篆起程 十一月十三日到京十四日進內城十五日

宮門跪

安召

見本日具奏謝

恩賞六十生辰

御書蓋勳繁社區額一面

御書福壽字各一方壽佛一尊紫檀嵌玉如意一柄蟒袍面一

件小卷吉綢一件十六日

皇太后召見十九日奉

上諭著加恩在紫禁城內騎馬二十日召

見

皇太后垂詢法越事甚久 十二月

賞福字一方大荷包三對小荷包一箇

御覽卷之全言卷四
甲光緒十年公六十一歲

正月元旦上

朝慶賀初四日奉

上諭署理禮部尙書初六日到禮部衙門任事初九日
頒到

穆宗聖訓全部初十日謝

恩召

見十七日

皇上在乾清宮賜廷臣宴公入座第三席

賜平金蟒袍一件甯綢袍褂一套古鉢一件如意一件鼻煙一

瓶二十日奉

上諭署理兩江總督兼辦理南洋通商事務二十二日召

見

皇太后溫語慰勉 二月初二日請

訓出都十三日起行 三月十二日行抵江甯省城十三日接

篆視事時法攻越南北甯以兵艦五艘翔吳淞口外 四

月十二日公出省察看沿江兩岸礮臺時提督李朝斌以

兵輪屯白茆沙長江提督李成謀駐鎮江會法總兵福祿

諾至天津議和不成聲言以兵輪往江甯十四日公在鎮

江奉到初八日

諭旨令公嚴備十七日公回省備防以提督王紫田守下關礮臺道員李光久守雨花臺楊明海守崇明雷玉春守福山曹德慶守吳淞張景春守江陰陸路礮臺陳湜率劉端冕鍾紫雲易致中守鎮江等處礮臺吳家榜守瓜洲並奏以李成謀統江南兵輪李朝斌專顧蘇淞奉

旨俞允 五月公檄總兵潘鼎立道員趙濟川募軍赴廣西檄王正和張陞楷募軍援臺灣江南防軍單弱令提督吳隆海添募兩營 閏五月初一日法犯我越南諒山防營爲我軍所敗江海戒嚴公遵

旨抽調恪靖親軍良營衛隊營北上歸神機營訓練令黃少春

部恪靖三營馳赴鎮南關
福建爲質以索兵費法艦
遣陳湜以四營馳江陰筈
路援應曹德慶劉連捷南
花臺下關時法使巴德謀

八日電

諭公以全權大臣馳赴上海
欽派熟悉議約之員會辦二十
諭派陳寶琛會辦邵友濂劉黻
萬不能允越南照舊封貢

稅各條切實辯論請旨定奪所需繙譯派福連攜簡明條束
照會文件前往備查曾國荃出省後防務責成李成謀李朝
斌妥辦如所議無成曾國荃卽回江甯布置切勿登彼船隻
受其挾制 六月初三日公率道員陳鳴志龔照瑗湯壽銘
馮邦棟登輪初四日抵滬與巴德諾脫議約公以狀電

聞十九日奉

上諭現派曾國荃在滬與法使議約該使無理要求婪索巨款
萬難允許雖經美國照約出爲調處成否尙不可知亟須豫
備戰守况法船現聚閩口彼族詭計多端伺隙攻瑕均未可
定該大臣等不得因有調處之說稍涉疏懈仍當堅持必戰

之心勿存游移之見二十八日奉電

諭據曾國荃電送巴德諾照會無理已甚不必再議惟有一意
主戰著曾國荃陳寶琛卽回江甯辦防許景澄同往助理劉
麒祥隨同辦理劉連捷回甯由曾國荃調遣吳淞等處防務
責成李成謀李朝斌分別籌辦章合才會同邵友濂鎮撫上
海民心保護各國商民勿稍大意二十八日公由上海返江
甯夜抵吳淞口與李成謀劉連捷曹德慶熟商布置二十
九日察看寶山縣各口行抵江陰與陳湜張景春商量調
遣以厚吳淞兵力三十日抵鎮江與易致中劉端冕鍾紫
雲商戰守事宜 七月初一日抵下關派吳隆海馳赴吳

淞飭陳湜等軍備戰先是六月法佔我臺北基隆是月初三日法犯我馬尾壞船廠

上震怒

詔各路統兵大臣沿海各口如有法兵輪駛入卽督率防軍合力攻擊時法據閩口毀長門礮臺公飭湖北提督程文炳統六營從漕運總督楊昌濬奉

命援臺法聲言欲入長江毀我水師警報日至公檄張景春馬融和添募淮勇八營劉連捷添募四營陳湜易致中等添募十營奏請

飭部月撥餉五萬又請設局宜昌加抽川省鹽釐奉

旨俞允 八月初二日公遵

旨堵塞吳淞海口十六日奉到七月十八日

上諭補授兩江總督兼辦理通商事務大臣會大學士左宗棠
將道江西至福建督辦軍務二十六日抵江甯公撥給恪
靖各營餉需派輪載赴湖口時劉銘傳及道員徐承祖奏
請裁長江太湖水師舢板五成改添小輪 九月二十八
日公會兵部尚書彭玉麟奏言十餘年來五省商旅無虞
盜劫實賴舢板分汎晝夜梭巡之力舢板船身輕便行駛
靈捷橫河側港蘆葦叢雜沙堆水淺之處亦可游泳而入
外來盜匪莫敢入境潛蹤今若改用十丈長小輪微特造

船經費無從籌畫卽應用機器亦宜購諸外洋且廢十船而成一船江面汎地立見空虛實非數號輪船所能照料查舢板能到之處有輪船所不能到者萬一匪類乘虛竊發商旅受累不淺且此項輪船以之禦外侮則嫌不足以靖內寇則不如舢板之能徧及也是水師舢板不宜裁減一時未能改用輪船奉

旨俞允十月初二日公遵

旨撤陳澧總統奏派浙江補用道朱式雲接辦海防營務初三日北洋援臺兵輪抵滬先是九月十五日電

諭公撥南洋兵輪援閩公以兵輪無多至是月十二日始奏派

總兵吳安康統開濟南琛南瑞澄慶馭遠五船赴閩部議
革職十三日奉到九月二十四日

寄諭兩江總督曾國荃應得革職處分著加恩改爲革職留任
十一月初三日奉

上諭都察院代遞候選知縣王元超密奏據稱長江下游礮臺
多不堅固江陰口係唐定奎駐守又令張景春分統事權不
一長江宜專守下游總口乃節節分防兵力單弱倘沿海有
警土匪勢必蠢動等語著曾國荃將所奏各節妥籌布置初
六日公覆奏長江礮臺所慮者不在於未能堅固而在於
未合法度目下事機緊迫祇能就現有之臺或添造平臺

以厚其力或加用鹽包遮護舊臺以遏其鋒總期與敵礮
足以相持又查江陰下游吳淞申江之口乃入蘇松之門
戶非長江之鑰鑰也守蘇松當以吳淞爲重鎮守長江當
以江陰爲要隘臣以重兵守吳淞爲保蘇松也以重兵扼
江陰爲保長江也上年唐定奎乞假卽係張景春代統六
月防務萬緊臣奏派張景春接統該軍嗣奉

諭旨催唐定奎赴防臣又奏明將銘武各營歸唐定奎統領其
新招春字四營歸張景春管帶仍歸唐定奎節制原欲事
權歸於畫一况有李成謀水師數船劉連捷南字六營同
駐江陰聯爲一氣此江陰將才可恃之一端也原摺稱長

江宜專守下游總口未列地名不知果何所指若指吳淞則已設守矣若議鎮江等處礮臺不宜分守臣爲外固門戶內備堂奧起見如僅專守江陰竟置鎮江天塹之險於不顧兵家無此辦法又稱長江有警土匪乘機蠢動現值冬防臣與漕臣撫臣迭飭地方官稽查保甲倘或土匪竊發尙可及時撲滅臣治軍以律馭下最嚴當局自愛者則願受約束以成材就中趨利者或不免造言而尋隙所幸聖慈在上俯納愚忱 十二月初三日吳安康統五輪出洋十八日遵

旨將沿江礮臺及各營駐紮處所營官銜名繪圖註載由驛馳

奏時法提督孤拔尋擊南洋援臺五輪二十九日至石浦
洋與我艦遇澄慶馭遠二輪被逼入石浦內港三十日夜
爲法雷艇所沈開濟南琛南瑞馳泊鎮海口外

乙酉光緒十一年公六十二歲

正月二十四日

上諭朕奉

皇太后懿旨三載考績爲國家激揚大典中外滿漢大臣有能
恪共職守勞勩最著者允宜特加甄敘以示優眷兩江總督
曾國荃夙著勳勤辦事諳練著開復革職留任處分 三月
奏參澄慶馭遠兩船失事員弁請添築吳淞礮臺時滇粵

軍在關外者屢獲大捷基隆堅守數月援兵四集南北洋
嚴備敵不得逞 四月和議成 五月初四日公奏言馬
江之挫劔石浦之疏虞全臺被封漕糧被阻其受制之由
皆因海上無一鐵甲兵輪又少快船魚雷與之角逐於洪
濤巨浪間故不能出奇制勝吳淞爲蘇滬要隘江陰爲長
江門戶擬先購快船五艘魚雷船十艘鐵甲船兩艘應懇
飭下安徽江西湖北湖南四川五省每年共辦洋銀一百萬以
七年爲期專備購船之用俾臣得所藉手二十八日奏陳
部議籌餉開源節流各條內有關江蘇防營款項分別酌
擬繕單具奏

勅部立案施行又奏金陵機器局兼辦各省軍火工作日繁現
議就勢擴充以省購費而裕利器 八月初六日奉

上諭岑毓英等奏保關外出力官軍業經降旨將該督撫等分
別加恩因念兩江總督曾國荃籌濟各路軍營餉需軍火尙
能不分畛域自應量予恩施曾國荃著交部從優議敘 十

一月初五日奏辦江甯府屬賑撫事宜十五日遵

旨籌辦旗營加餉銀兩及江南裁撤勇營並撤水利忠義各局
時醇親王奕譞奏請將長江水師舢板船宜裁一半營哨
弁兵酌量裁併卽以裁出之餉添製淺水輪船分隸巡防
詔下詳議公奏言查長江自江南狼山上達湖南湘陰曩時在

符嘯聚行旅戒嚴今則按江路之遠近以定礮船之疎密
計失事之等差以定功過之輕重迭經長江提督每年周
巡一次督飭訓誡皆以汎地爲重今若裁一半則地段過
長師船過少前距二三十里泊一船者今須相距五六十
里矣前此大港汊大口岸泊數船者今祇二三號矣顧此
失彼呼應不靈哨弁之推諉由此而生匪徒之覬覦由此
而聚商販民船因而裹足勢必巨商各懷畏劫之心悉挂
洋旗行走釐捐必大減色於五省餉需大有關繫此酌裁
水師利少害多之實在情形也又就淺水輪船而論上年
法越交爭中國講求用船之法所少者在於鐵甲雷快等

船淺水輪船其船身馬力均不甚大難安重大礮位既不
足禦外洋來船之侮又不能追逐內江淺處之梟至於支
河港汊乃盜賊潛蹤之處則更不能駛入其地以靖內患
也又就造船經費而論須籌備銀百餘萬乃可造淺水輪
船二三十號隨時修理機器之費每次少則需用數百兩
多則需用數千兩竊恐裁三百餘號舳板不足供二三十
號淺水輪船之用而添二三十號淺水輪船又遠不敵三
百餘號舳板之得力也此廢棄舳板一半改設淺水輪船
有損無益之實在情形也 是年三月三十日公兄澄侯
公沒於鄉

丙光緒十二年公六十三歲

五月十六日公奏保記名提督張景春曹德慶劉青煦督標中軍副將譚碧理漕標副將田恩來撫標參將閔殿魁蘇松鎮總兵黃本富七員均堪獨當一面懇

恩交軍機處存記 七月十三日奏請以徐屬歲科兩試仍照舊制分場連考免予分棚 八月二十日公出省閱兵 九月二十二日公回江甯 十二月奏運河東西堤工告竣

丁光緒十三年公六十四歲

正月二十四日公遵

旨會議江蘇安徽不便分期鄉試擬請酌增同考官兩員三

月十二日奏請於江甯省城建江南提督福珠洪阿專祠

四月增築吳淞江陰洋式大礮臺 五月遵

旨奏保雷玉春等九員能勝實缺提鎮之任 七月公以履任

三載請

旨陞見奉

上諭著來京陞見雨江總督著裕祿署理 八月初四日奏統

兵大員記名布政使劉運捷在軍營積勞病故臚陳戰績

懇

恩從優賜卹十六日交卸兩江督篆二十一日起程北上三十

日在清江途次奉

上諭河南鄭州十堡漫口黃水經流潁亳等處向爲匪徒出沒之區近來兩湖地方時有會匪滋事目前黃水橫決深恐游勇土匪勾結爲患不可不豫籌防範裕祿著卽回湖廣總督本任曾國荃如已起程無論行抵何處卽著迅速回任務將應辦各事妥速籌辦俟河工地方各事宜諸臻安謐再行奏請陛見 九月初六日回抵江甯省城接篆視事公派江蘇臬司張富年督辦河工挑濬楊莊以下舊黃河二百餘里以分沂泗之水騰出中運河預備洪河盛漲挾黃北行可以容納 十月遵

旨裁湘淮各軍長夫以濟河工要需 十二月張富年疏濟興
化大團閘丁溪場古河口小海三河以備高郵開壩可由
新洋射陽兩河門龍港等口入海復以范隄各閘過窄另
於左右開挖越河先是侍郎徐郁因鄭州黃河決口奏請
挑天然等河至是公復奏言該侍郎原奏請挑天然引河
張福口引口與碎石河毗連本係由淮入黃之咽喉昔人
建導淮之議皆從各引河入手祇以張福口河底淤墊太
高挑不得法且恐沂泗之水倒灌而入順清河爲清江三
閘來源曩時築壩堵閉以資保衛自黃河北徙此壩久廢
今旣引淮入黃仍須將順清河壩堵築如式庶三閘可保

無虞另勘得陳家集密頭地方可開引河上接張富口下
達吳城七堡已於十月開工張富口起至順清河止分爲
三十八段派員按段承挑至高郵五壩已損者二可開者
三湖水涸涸下注較之本年伏秋盛漲時存水已多數寸
堤工局稟請啟壩臣等查下河方在水涸之時車邏壩洩
水較緩開放無礙以上辦法核與該侍郎所奏數條尙屬
不謀而合時李鴻藻李鶴年奏請規黃河故道公覆奏言
山東築堤浚河已著成效來年黃溜仍前由大清河入海
東省可不致受災即使積雨成潦受患亦當輕減於
國計無甚大損若東南則不然皖北各屬皆產米之區劫後

江蘇祇存裏下河一隅尙稱完善鹽米兩大宗歲入課釐不下三四百萬其供於官者如斯入於民者何啻倍蓰昔日黃河在南常有潰決今則全河險工即使趕修堅固而溜勢湍悍變幻靡常設有疏虞於

國計民生所關實非淺鮮權其利害輕重殊多窒礙

戊子光緒十四年公六十五歲

三月十五日奉正月二十三日

上諭三載考績爲國家激揚大典中外滿漢諸臣有能職守恪恭勞勩最著者允宜特加甄敘以示優眷兩江總督曾國荃勳勤卓著歷久不渝著交部從優議敘是月二十日奏請增

築吳淞口獅子林地方洋式大礮臺 五月新挑張福口
引河各工疏濬舊黃河各工及下河工程一律完竣 六
月奏提督唐定奎勦勞卓著遺愛在民請於徐州府城建
立專祠是月合淝土匪劉文弼作亂公派壽春鎮總兵郭
寶昌平之 七月奏保提督楊文彪等六員堪勝水陸實
缺提鎮之任 八月公以江蘇揚州鎮江徐州江甯安徽
廬州滁州及安慶以下各處被旱鳳陽潁州泗州暨臨淮
各屬被水奏請截留江北河運暨江蘇應行河運通倉米
石賑飢民奉

旨俞允 九月公奏請將紳商捐款照籌餉例核減二成給獎

捐款興辦揚屬湖河堤壩各工及皖省陂塘工程又奏以鎮江各屬旱災最重截留江北漕糧不敷徧給請將蘇漕十萬石一併留辦兩省賑撫 是年十月初八日公會孫兆祥生

己丑光緒十五年公六十六歲

皇太后懿旨現在歸政伊邇著賞加太子太保銜先是海軍衙門奏請由天津至通州接修鐵路御史余聯沅等奏請停辦

詔問公正月公覆奏乾嘉以來士大夫但知誦習詩書不知機器爲何物道光季年而外釁起咸豐年間各國通商不能

不講求洋務同治初年始制輪船光緒初年始興電綫風氣一開卽法令亦不得而遏泰西鐵路之利各國皆同中國所欲摹倣而收其利權者已非一日臣以爲不開於今日必開於將來勢爲之也與其毀已成之股票而不足取信不若堅自強之定見而先立始基蓋人情樂於觀成而難於圖始卽如出使外洋一節當年羣臣鄙夷不屑者諸多有人言及幾何無不掩耳而走不數年而人人思奮樂於趨事無他安於所習耳夫風雲雷雨至變也習見之而爲常江淮河海至險也習行之而無懼鐵路一事爲中國前代所未聞一旦創辦小民駭異無怪其然逮落成而後

向之所稱有害者未必盡然而徵兵運漕隨發隨至裝貨搭客候往候來殆如輪船電綫之共稱便利有可決其必然者是月籌款加賑安徽鳳潁泗州等屬來安滁州天長江蘇徐州清淮甘泉儀徵江南常熟宜興荆溪各州縣飢民 三月奏江蘇籌辦海軍衙門要需銀八十萬兩統存北洋生息專爲購艦設防等用遵

旨查辦已革道員徐承祖浮冒銅價研訊確情定擬賠繳 四
月奏保總兵銜綦高會袁九皋等堪勝實缺提鎮之任
六月奏請增設微山湖礮船巡緝私梟 八月先是上年
江安被災英國君主捐賑銀百磅至是月公奏請

飭下總理衙門照會駐京公使致謝以重邦交又以駐滬領事
律師担文亦集鉅款賑飢懇

恩賞三品頂戴以示獎勵 十月奏請於南洋防費項下籌撥
十萬兩購辦外洋新式後膛槍礮及應配子彈公以運河
東西堤險工疊出飭堤工局司道履勘奏言宜築者約有
數端一閘工查汜水汎之子嬰閘灌溉高寶兩邑農田金
門較寬上吸全河之溜年久失修坍塌已甚上年突出奇
險暫用土工實堵蓄洩不靈不過一時權宜之計非從新
修築不足以資捍禦又高郵汎之車邏南關兩耳閘病既
相同修宜如式此兩汎閘工之不容緩者也一日磚工查

邵伯臨鎮高郵一帶工程舊式均用磚砌民房櫛比肆市如林近皆臃裂酥鬆每遇盛漲居民處處窅潮滲水前今兩屆復經汎漲該工損壞愈甚若不急籌折砌隱患滋大此各汎磚工之不容緩也一日涵洞沿堤舊設涵洞係爲濟農而設必使過水通靈庶於農田有益今擬查明各涵之應築者一概動撥公款爲之修整此沿堤涵洞之不可緩者也先是蘇浙大水公於賑餘項內各撥銀三萬賑撫不贍而江甯各屬及安徽泗州鳳陽皆宜溥賑奏請仿照上年江蘇安徽賑捐章程續行開辦半年專備江蘇浙江安徽賑款復就關稅司道各庫隨時借款動用俟捐款收

齊歸補是月遵查上海織布局務嚴催承辦商務道員鄭
官應到滬勒限究追以重商本 十一月公籌銀五萬商
由江蘇撫臣剛毅籌撥五萬連

恩帑十萬委員至江蘇各屬賑飢並製棉衣分投散給是月設
局重修兩淮鹽法志 十二月遵

旨飭江蘇防營操練嚴訊虛額剋餉等弊 是年七月十四日
公會孫兆龍生

庚光緒十六年公六十七歲

正月公於籌防支應兩局及松滬釐局江海關籌借銀二
十六萬派遣員桂嵩慶錢寶傳以十萬至江蘇各屬加賑

道員任錫汾以十六萬至浙江各屬加賑得

旨嘉勉二十六日奉

上諭本年朕二旬慶辰著該部查明該大臣子弟具奏候旨施
恩 二月奏請以已故總兵喻吉三戰功事蹟

宣付史館立傳並祀前大學士兩江總督曾國藩祠 閏二
月遵

旨裁併各局奏言兩江擬留各局如籌防支應火藥機器電報
等局皆爲當務之急已邀

聖明洞鑒其餘地方以善後保甲鹽務以督銷分局等局爲大
宗用員旣多開支較鉅議者以爲裁歸藩臬運三司可節

經費可一事權未始非規復舊制之意然就善後而論與保甲相輔而行無論稽查城門清查戶口等事事極繁瑣本非兩司所能躬親亂後民房大半被燬田地大半荒蕪界址難查諸多軫轄一經入訟非勘不明向來地方衙門遞呈有費勘丈有費止差有費管押則其費更重劫後遺民何以堪此今事關善後者皆由局員隨到隨辦需索不禁自絕小民稱便且歷來奸宄潛生每發覺於保甲其中保全甚大此善後保甲等局必須擬留之實在情形也就督銷而論從前承平之時祇有課而無釐軍務定後釐較課重若不設局則鹽釐偷漏難收是以在湖北湖南江西

安徽等省各設督銷總局再由總局揀派賢員在各州縣
銷鹽之地設分銷各局售出一引之鹽隨收一引之釐行
之二十餘年未有一商一引短繳絲毫此督銷分局必須
擬留之實在情形也是月奉

上諭曾國荃之孫曾廣漢著加恩以主事用 三月公以各省
軍米賑糧皆准免釐奸商藉以夾帶釐款暗虧奏請仿照
上年安徽奏准章程凡各省購運軍米賑糧經過江甯各
屬釐卡循照舊章完釐飭卡員按照數目專款存儲一俟
積有成數分別解還各該省凡軍米稅釐以充軍餉賑糧
稅釐以助賑款 四月奏請以福建陸路提督蕭孚泗戰

功事蹟及新授福建臬司徐文達政績

宣付史館又奏保游擊舒永勝等九員堪勝實缺提鎮之任請
交軍機處存記 七月奏請於太平當塗縣采石地方建
立前兵部尙書彭玉麐專祠撥銀賑順直水災 八月公
捐義穀一千石入湘鄉育嬰堂 九月捐製棉衣一萬件
分解順直給放飭順直賑捐道員胡家楨製棉衣褲三十
萬件以二十萬件解順天十萬件解天津二十八日公曾
孫蔭椿生公疾作 十月初二日薨於位遺疏入十四日
奉

上諭兩江總督曾國荃秉性沈毅蒞事公忠韜畧閎深經猷遠

大咸豐年間由優貢生從戎在江西湖北等省迭殲巨寇克復安慶之役出奇制勝懋建殊勳蒙

文宗顯皇帝特達之知不次超擢同治初年簡任浙江巡撫仍帶兵勦賊激勵將士掃蕩無前直達江甯雨花臺苦戰兩年之久卒能攻拔堅城擒渠掃穴粵匪之平厥功最偉

穆宗毅皇帝特沛殊施賞加太子少保銜錫封一等伯爵賞戴雙眼花翎朕御極後優加倚任疊昇封圻均能盡職其在山西巡撫任內救災恤民政績尤著光緒九年來京召對命署禮部尙書旋卽簡授兩江總督到任後整頓地方營伍撫綏鎮攝卓著聲威上年歸政慶典我

皇太后追念前勞賞加太子太保銜該督感激圖奮雖傷病時發猶復力疾辦公並未請假忠誠篤實爲國家柱石之臣方冀克享遐齡長承恩眷遽聞溘逝震悼良深曾國荃著追贈太傅照總督例賜卹賞銀三千兩治喪由江甯藩庫給發賜祭一壇派護理江甯將軍副都統承綬前往致祭加恩予諡忠襄入祀京師昭忠祠賢良祠並於湖南原籍江南省城建立專祠此外立功省分准其一併建祠其生平政績事實宣付史館任內一切處分悉予開復應得卹典著由該衙門察例具奏靈櫬回籍時著沿途地方官妥爲照料伊孫特用主事曾廣漢卽著承襲一等伯爵毋庸帶領引見附生曾廣

江著賞給舉人准其一體會試監生曾廣河著賞給員外郎分部學習行走伊曾孫曾兆龍曾兆祥曾蔭椿均著俟及歲時由吏部帶領引見候旨恩施用示朕眷念勳臣至意欽此旋

頒諭祭文云朕惟彤弓寵錫旣炳績於旂常丹旄神歸宜升香於俎豆溫綸用賁清醴斯陳爾原任兩江總督一等威毅伯贈太傅曾國荃賢序通經戎旃投筆才儲大將能接要於孫吳德婉難兄遂齊蹤於方召始建旗乎湘渚繼弭節乎江潯氣懾鯨鯢威申貔虎戎通雷岸江淮之界方釐陣薄雪山濤霍之塗頓啟爰殲巨憝邁克堅城固已績著上游勳隆開府

疊膺異數洊陟崇階泊乎楫權南迴旌旂東指蟻封迅掃前
凌聚寶之山虎穴深探直抵長干之里運奇決勝犁窟擒渠
統率楚師肅清江表遂膺茅土礪山申誓於信圭兼畀封疆
溯水遙持夫英蕩撫綏西晉拯饑而絳縣汎舟筦任東河下
楫而黃流順軌紆籌宏遠碩畫淵長厯典封圻允稱柱石復
督師於榆塞正率屬於秩宗旋以南邦擅襟帶之雄東海扼
波濤之險俾開鈴閣坐鎮金陵近悅遠來麟屋靖搏桑之氣
民懷吏畏口碑騰棠棣之輝介遐齡而珍物寵頒舉慶典而
宮銜特晉方冀盡勳永賴繁祉長延遽覽遺章彌深愴念旣
格金之致賻更祠宇之推恩贈太傅於崇班錫諸孫以渥澤

象其行誼諡曰忠襄特遣重臣俾光祀典於戲經猷濟世實
資杞梓之卿材功德在民允荷馨香之盛禮靈其來格式克
欽承